


VIRGÒ DIKUMI, NE BEENA

YUDA BINUNU LUKÀMÀ NE

MAKUMI ANAAYI NE BÌNAAYI

 Mwoyi wènù awu mu dindà emu. Ndi ne disànkà dyàbùngì bwà kwikala cyàkàbìdì mwab'ewu mu dindà emu ku mudimu wà Mukalenge. Kuulu nkubì be pambèlu apu, kàdi, kaa, s'mbilenga be lwà munda emu's. Eci's kì cikondo cimwèpelè citùdiku mwà kwamba ne mbîmpè kwikala munda batàngile pambèlu, kì mmwômò anyi? kutàmba kwikala pambèlu kàdi tupongwela munda.

² Mwua mwikishe bîmpè makèèlèlè dilòòlò awu ne ndi ndyumvwa bilenga byà dikèma mu dindà emu. Nènku tuvwa bapìcile mu cikondo cilenga cyà dikema makèèlèlè dilòòlò awu, kì mmwômò anyi? Cikondo cilenga cyà dikèma's! Nènku ndi ngànyisha aci. Tukàadi bapete. . . disangisha adi ndifwànàngàne ànu ne divwà dyenzèke kwàka ku Shreveport, dyàmba kwikala ànu—ànu ditùngunuka dyà dilondangana dyà Nyumà wenda ùtùngunuka. Uh-hum. Pa nàнку tudi ne disànkà dyàbùngì ne kusàkidila kwàbùngì kùdì Nzambì bwà bwîmpè Bwèndè ne luse, ne bwà bèènù. . .nwènù bàdì bàfila nyumà wenù kùdìYe mu dyelangana dyà kaapa bwà Wàmòna mwà kutùlombola ne kutùludika.

³ Nwamònu's, wèwè ne batèèleji bàà bàkandameena, nànsha Nyumà Mwîmpè kààkubuululakù kantu to. Bìkèngela wikalè ne cintu kampànda, cidì cikwàta mudimu mu dyumvwangana. “Bàvwa mu mwaba ùmwèpelè ne mu díyi dimwè,” ke dîbà adi kulwakù cyonà cìfùmina mu Dyulu cìvuma. Nwamònu's. Kàdi paùdì ne. . .Nànsha mèmè mwà kusambila bìshi, ne kushààla mundaamuunya ne bufùkù mwikàle ndonga ne nsambila kumpàla kwà Mukalenge, kupweka mwab'ewu, pàmwàpa mwikàle ne dilaabiibwa pambidì, kubànda mwaba ewu kàdi kuumvwa dikàndameena adi, nwamònu's, Yèyè—Yèyè ùdì ànu. . .bidì ànu bìMubungamije dyàkàmwè, Yèyè kààkubuululakù kantu nànsha kàmwè to. Kàdi paùdì ubwela mwab'ewu mwinshì mwà dilaabiibwa ne umvwa ne batèèleji bèèbè bàdì mwinshì mwà dilaabiibwa, s'ki dîbà adi didì Nyumà Mwîmpè ùbanga kukwàta mudimu dîbà adi, ne Ùbanga kutwà eku ne eku ne kutwènzela bintu binène. Pa nàнку, nudi numòna anyi?

⁴ Ncyèna mwanjì kuyiikila ne mpaasàtà pa. . .Ngǔmvù

Itabuujja Nàka nènku ke mémè kuumba kubwela lubilu bwà kumòna—bwà kumòna cìvwaye. . . cikaavwayè mulongolole bwà mu dindà emu. Mpindyewu, Mwanèètù Neville, nènkwambilè mùdì bwalu, nêmbangè kàlaasà kakesè aka ne bu mémè mwà kujikija lwà pa dībà dikumi ne òmwè jaajaaja, mbìmpè, nenkushilè mwaba bwà ùbanga kuyiisha. Acì cìdì bishi? [Mwanèètù Neville ùdì wàmba ne: “Èyowà, kùtàcishikù dilaabiibwa to, tùngunukà ànu cyanààna.”—Muf.] Kaa, ndi ngìtabuuja ne dilaabiibwa didi paanyimà apa, kàbìdì, dilaabiibwa didi paanyimà apa kàbìdì. Yèyè’s ùdì. . .

⁵ Mwanèètù Neville misangu yònsò ùtu ne. . . Bwà beenyi bàdì kaaba aka bàtù kabàyiku banji kulwa mwaba ewu kumpàlampala, yèyè ùdì (ncyèna ncyàmba ne mbwalu ùdipù to, kàdì) muntu wa ngàsà, kì mùtùye misangu yònsò ànu nànkù awu. Yèyè ùtu misangu yònsò ùbala ànu awu—awu. . . utèèka Mufundu awu mu cyenzi wà ne, “kutàmba kunanga dyàkalenga dyà mukwèbè,” misangu yònsò mu Kilistò ne *kutàmba kunanga* misangu yònsò. Nènku nkacya ànu mene ngàmumanya yèyè utu ànu mùshindù awu’s; kì ng’ànù kacya wikalangana mu tabernacle emu to, kàdì ànu kacya ngàmumanya ne ciine aci nkukaadi bidimu byàbùngì. Musangu wà kumpàla wùndì ngeela meeji ne ndi mvùlukakù ne ngàakamòna Mwanèètù Neville, bwà kumumanya, mvwa muye kamutèeleja ùyiisha musangu kampànda kwàka ku èkèleeziyà wa ba-Méthodistes, yèyè. . . mwàmwa mu Howard Park, kùkaadi bidimu byàbùngì, byàbùngì menemene. Kùkaadikù, ngeela meeji ne, kukaadi bidimu makumi àbìdì (ngeela meeji) anyì bipite apu kacya ngàmumanya. Dībà adi yèyè. . . nènku ùvwa. . . mmukwàte mudimu, yèyè pèndè, ùdì. . . Kaa, ngeela meeji, too ne mu matùkù mashààle aa, yèyè ùvwa ànu wenza mudimu misangu yònsò mu maalu à meetu à micì ne bikwàbò kuntwaku, mu Henryville, mùdìye ùfùmina amu; ne ùkwàta mudimu bwà kudidìisha, eku uyiisha kàbìdì. Mùshindù wùngààkenzà mu mwoyi wànyì, mémè pàànyì, too ne matùkù mashààle aa, kì twètù kubanga kwikala katùyì mwà kwenza cìngà cintu to ànu cyòcì eci. Pa nànkù ndi ne disànkà bwà bwalu abu. Ndi ne disànkà bwà Mfùmwètù wa mudimu mupyamùpyà, kì mmwòmò anyì, Mwanèètù Neville? Èyowà’s, mukalenge! Ncyà bushùwà ne mémè ndi muCiswe. Èyowà’s, mukalenge. Mémè ndi ànu musànkishiibwe Nendè be!

⁶ Nènku mpindyewu ngeela meeji ne nebashiye tùlaasà twà cilongelu cyà Dyalumingu ku luseke. Èyowà. Tùlaasà twà cilongelu cyà bânà twà Dyàlumingu, kabààkutùbweja to bwalu mwaba ùdì. . . mbuumushe bìvwàbò bakòsòlòle naabi abi, ànu bwà kushiila èkèleeziyà mwaba too ne mu ndekeelu mwàmwa.

⁷ Mpindyewu, dilòlòlò edi netwàngate cikondo cinène cyà ndekeelu eci, cyà Laòdikiyà. Nènku makèèlèlè dilòlòlò tuvwa bangàte cikondo cyà Filàdèlèfiyà aci ne babwelè too ne ku

ntwàdijilu wa cikondo cyà Laòdikiyà ne ditentamangana dyà pankaci pààbi apu. Ne pashiishe maalu masokoka manène awu àkabanga Nzambi kutùbuulwila pankaci pàà bikondo abi ne: “Ciibi cyunzulula,” ne “dikàndà dikesè,” “kushààla mulame Diyì Dyànyì,” “mwikale ne Dìna Dyànyì.” Tuntu tukesè twònsò muntwamu, mùshindù wà dikema ùvwa Nzambi mutùvwiye tulelèlè kutùdi awu, bwà bwalu bwine abu tudi ne disàkidlila dyà menemene, menemene.

⁸ Nènku kanùpù mwoyi to, kwòkò kwikale beenyi munkaci mwètù bàdi balwè ne babèèdi, netùsambidile babèèdi mu dyàlumingu dilwalwà, lumingu lujimà kuumukila ku leelù. Nènku aci neciikalè . . . bu Mukalenge mwà kwanyisha. Nènku aci neciikalè . . . Nutu misangu yònsò ànu numòna mùshindù wùndi muswè kucyàmba awu ne: “Bu Mukalenge mwà kwanyisha anyi”? Bible ùdi wàmba bwà kwenza nànkù ne: “bu Mukalenge mwà kwanyisha.” Katwèna banji kumanya; Yèyè kî mungambilaku ne nêngiikalè mwaba ewu, ne èkèleeziyà neikalè mwaba ewu, ne twètù bònsò tudi bafwànyine kwikala kaaba aka, anyi cikwàbò cintu to. Dìbà adi piikalàbi ne ndiswa Dyèndè, netwikalè kaaba aka, nudi numòna’s. Cyòci kaciyi diswa Dyèndè to, mu bushùwà bwà bwalu, katwàkwikalaku to.

⁹ Mwanèètù Neville neàtùngunuke ne kucimanyisha ku ndongamu wendè wa ku tudyòmbà, ne bakwàbò bashiilèshiiàngàne, Ngeela meeji, mwanèètù wa balume ewu ne bakwàbò bàdi ne ndongamu yà ku tudyòmbà abu. Nènku dìbà adi nùlwayi pa bwebwebwe ne mwènù pèènù mwònsò mu dyàlumingu mu dindà, bwalu tudi bindile musumbà munène wà bantu kaaba aka bwà kubàsambidila, ne tudi baswè kubwela. Netwikalè . . . èè, twànji tumònaayibi, ndi . . . Kwòkò musumbà munène bu ewu, bidi misangu yònsò ànu bitambe bwimpè bwà kwikala ne twarta twà disambila bwalu mbapàtàkane bikolè be, nudi ànu . . . ewu ùsàkila mukwèndè eku ne bintu byà mùshindù awu. Ndi ngeela meeji ne nwènù babàtèèke mu bulongame bwà ne balwè ànu ku umwe ku umwe bidi byènzaku ne . . . byepula cibwejàkàji munkaci mwà bantu, nudi bamanyè’s.

¹⁰ Nènku—nènku pashiishe ànu . . . Nènku kabyèna nànsha bikèngela bwà wèwè kjuuka to ànu pàdi karta kèèbè kabiiikidiibwa. Sòmba wèwè ànu mwaba wùdi awu pawikalà usaama ne mudyùmvwè bibi, ne kabyèna bikèngela bwà wèwè kwikala mwimane mu mulongo mulemule awu to. Ànu pàdi karta kèèbè kàbiikidiibwa, bànda ànu buludi kuneeku bwà bakusambidile ne utuuluka, ne mukwàbò ùbànda, ànu nànkù. Mèmè ntu mutambe kunanga aci bikolè be. Ntu pa ciibidilu ndòmba bansongàalume bwà kulongololabo nkwasà kampànda, bwà ne muntu yèyè muumvwè bibi pàcidiye mwindile apu, ntu mbiikila ndambù mukesè ku musangu; yèyè mudyùmvwè bibi, mòna’s, kwanji ànu kumulekèla—kumulekela windilaku mu nkwasà wèndè amu too ne . . . anyi ùsòmba mu nkwasà

too ne pààbìikidiibwa nombà wendè, too ne pìikalàbo mwà kumusambidila.

¹¹ Ne mémè ndi ngiitabuuja dyondopa dyà kùdi Nzambi; ndimwè dyà ku malongesha manènè à mu Bible. Kàdi ku dyondopa dyà kùdi Nzambi kùdi ne cintu cìdi citàmbe ànu dyondopa dyà kùdi Nzambi nkàyaadi. Dyondopa dyà kùdi Nzambi dìdi dyàmbe ànu ne “kùdi Nzambi ulwàlwa cyàkàbìdi.” Dyondopa dyà kùdi Nzambi ditu dyàkula bwà cinyi? Nceyèyà cyà dibìikà dyètù dyà ku lufù. Kwòkò kakùyì dyondopa dyà kùdi Nzambi to dìbà adi kakwèna dibìikà dyà ku lufù to, nwamònu’s. Ne kwòkò kakùyì Nyumà Mwìmpè mpindyewu bwà kutùbàtiiza to, kakwèna Mwoyi wà Cyendèlèlè mu buloba bùcilwalwà to. Bible mmwàmbe ne: “Eci ki cyeyà cyà lupàndu lwètù.” Kàdi nudi bamanyè cìdi *cyeyà* anyi? Ki “citùpà cyà kumpàla cyà mushinga,” nwamònu’s. Wèwè muyè kafuta. . . Twàmbèbi ne udi musùmbe ferme, bàvwa bàkeba nendè ndola binunu dikumi, nènku wèwè kufuta binunu bìbìdi, ki mfranga yèbè yà “cyeyà” nyòyi ayi, bàdi bàyìbìikila ne ki cyeyà cyàyi. Mpindyewu, pìikalabi ne dibatiiza dyà Nyumà Mwìmpè edi dìdi ànu cyeyà cyà cilwalwà, kaa, nebìikalè cinyi patwà—patwàpetà mushinga mu kaabujimà? S’nebìikalè byà butùmbi!

¹² Mpindyewu, mu dindà emu netùteete bwà kuswikàkaja, bu Mukalenge mwà kwanyisha, bimwè byà ku bintu abi, byà. . . munkacinkaci mwà bikondo byà èkèleeziyà (byòbi ebi ànu mwòmò *emu* mene) mùdi cintu kampànda cyènzeka. *Binunu Lukàmà ne Makùmi Ànaayi ne binaayi abi, Bàshààdìlè, Virgò Mukùtakàne awu, Virgò wa Lungènyi, ne Ditwìbwà dyà Cìtampì cyà Nyumà Mwìmpè, Cimanyinu cyà Nyama wa lwonji*, bintu byònsò abi ànu. . . Ki ndekeelu wa cikondo, ne bintu byònsò bìdi bisanganyiibwa ànu mwab’ewu mu kaaba kàmwèpelè, nànkù ki bwà cinyi bìvwa bikèngela bwà twètù kwangata ànu muvù mujimà wà mashika ewu bwà kwakula pa cyòci eci, kàdi twètù. . .bwà kwangata Mukàndà wà Bwàkabuulwìbwà, kumòna mùdiWu ùswìkakana pàmwè.

¹³ Nukààdikù bamòne anyi? Dishidimuka ndyènze lwendu ànu mùshindù wùmwèwùmwè awu, Mukalenge Wood. Cidi. . . Eci, muntu ùdi ànu ne byumvwilu byèndè bimwèbimwè abi, ùdi ne byumvwilu bisambòmbò, anyi byumvwilu bitaanu, èyowà’s, byàkadiye naabi kacya yèyè—kacya ànu yèyè wàlwa pa buloba kukaadi bidimu binunu bisambòmbò. Kàdi ànu lwà ku shòò eku, ànu katùpà kakesè kàà ndekeelu aka, bidimu lukàmà bishààle ebi. . . Ekèlekèlè! Kulwaye, paanyimà apu, wènda bitekète mu ditempu dyà ngombe. Kàdi kuumukila ànu ku ditempu dyà ngombe aku, mu bidimu lukàmà bishààle ebi, mmuumùke ku ditempu dyà ngombe muyè ku—ku fusée udi mwà kubùuka pabwìpì ne kilòmèetà binunu bisatu ne nkàmà yìbìdi ku dìbà òmwè. Ki mùdiye mubàndisha lubilu nànkù, kuumukila ku ditempu dyà ngombe too ne ku fusée. Nènku, tàngilàayi,

mbyenzèke ànu mu ndambù wa bidimu bikesè byàshàadi ebi, mòna's, ndi mufwànyine kwamba ne kùkaadi bidimu kabiyi bipìte pa makumi àtaanu bikolè to.

¹⁴ Pàncìvwà mwànà mukèsè wa balùme lwà mu Utica Pike emu, bàvwa ne cyà kale. . . kùvwa muntu dyèndè Elmer Frank uvwa kale wàwa musòmbele mwab'ewu. Ûtu mwenze bu ndumbùlùlà ku tubàdi kwàka. Wàkasela inábànzà wa citende lwà kuntu kwàka mu njila uvwa tatwànyì wènzela wendè—wendè tatwèndè mudimi, dìnà dyà mukàjì awu ùvwa Lusher. Nènku bàvwa. . . nènku ùvwa ne, màshinyì à mùshindù kampànda; àvwa ne manùvelè, udi upàtuka uya ku luseke lwàwù aku kàdi kwela manùvelè mùshindù *ewu*, nènku ówò àvwa ànu ne bitheshi bimwè. Nènku uvwa ne—ne cindundu cinène cyà mpungi, ne bikèngela wèwè kucyèla mùshindù *awu*. Ne bàvwa bàmba ne: “Cintu aci cìvwa mwà kuya lubilu lwà lukwacisha bwòwà lwà kilòmèètà makumi àsàtù ku dībà òmwè.” Mpindyewu, Papa wàkapweka e kwangata ndambù wa lusenga mu ditempu, ne ku—ne kubanda naalu kuntwaku ne kulwèla mu mifuku bwà wàmòna mwà kuàlaminyina panshi, bwà kumòna ní mmawànyine bulelèlè kunyema kilòmèètà makumi asatu ku dībà òmwè. Nwamònu anyi? Kàdi's bìvwa bikèngela bwà nwènù kwikala bamòne njila ayi, uh-huh; mmawànyine kuya ànu bu mu kilòmèètà dikumi ne yisambòmbò mu nùnkù *ewu*, ne dikumi ne yinaayi mu dibànda dipweka mu nùnkù *ewu*. Nwamònu anyi? Pa nànkù nudi nuyisangisha pàmwè, nudi nupeta kilòmèètà makumi asatu ku dībà òmwè.

¹⁵ Ndi mvùluka twètù bânà bwònsò, Maman ùvwa mwà kutwòwèsha bwònsò màyi, dībà adi bu bataanu bàà ku twètù, tuvwa mwà kukùlama ku lupangu alu bwà kuwùmva. Tuvwa mwà kuwùmva alwa, mu ntàntà wa kilòmèètà kule, tuwùmvwila mwab'ewu, akungula, mvuung, mvuung, mvuung. Bantu bwònsò bàvwa mwà kwimana ne kukwàta tubalu twàbò, nènku mèmè kupàtuka mu ditempu dyà nkata yinaayi dikoka kùdi tubàlù, ne kutùkwàta mùshindù *ewu*, nudi bamanyè. Cintu aci cyènda cìbànda ne njila awu, ekèlekèle, cìvwa ncintu cyà dikèma. Nènku—nènku ndi ànu ngeela meeji ne, aci cìvwa nkwàka, mvwa ne bidimu bitwè ku mwandamutekète, nwamònu's. Mmunyi. . . Aci's cìvwa lwà mu cidimu cyà 1914, ne kwela ànu meeji mùshindù wàkashintuluka bintu abi kacya ànu kwine kwònsò aku. Kàdi nwamònu's, nènku cìvwa ànu mmu bidimu makumi ànaayi bishàale ebi anyi cintu kampànda. Kadi, tàngilàayi, ùvwa ne bidimu binunu bisambòmbò bwà kwenza byònsò abi ànu mwab'ewu mene, bwalu Bible mmwàmbe ne yèyè neàcyènzè mùshindù awu: “Mu matùkù mashàale, nebànyeeme bàtwa eku ne eku, ne dimanya nedivulangane.”

¹⁶ Kacya nukàatuku bèlè meeji bwà Nahum, pàvwaye—pàakamònyaye cibeeba cyà Outer Drive mu Chicago, kùkaadi bidimu binunu binaayi anyi? Nudi. . . Wàkamba ne: “Àvwa

mwà kufwilakanangana mu njila myalàbàla ayi.” Mpindyewu kùdì. . . Ntu nkààdiku mufike mu matunga à kale mùvwàbo ne. . . misèèsù yàbò bu mùdì mu Oslo ne myaba mishìilàngàne, mbikolè bwà kupeta mwaba wà kwendela, yìdi bunène ànu bukumbane bwà di—ditempu kupiciladi mu bimenga byàbò abi. Kàdi pàmwàpa ntàntà mmufwànyine kwikala bu wa kuumukila apa too ne ku cimanu cyàcya, ki cìvwa bwalàbàle bwònsò bwà misèèsù yàbò, bwalàbàle ànu bukumbàne bwà ditempu kwendela mu mùsèèsù. Èè, wamònu’s, Nahum wàkamba ne: “Yìvwa njila minène.” Ne kwambayè ne: “Neyìkalè mwà kunyeema bu mikenyi,” màkalù aa. “Nènku neyìkale mimwènèke mifwànàngane ne bimunyi,” ki makènkè àdìyì naayi awu. Ne kwambaye ne: “Neyìkale mwà kufwilakanangana edi ne dikwàbò,” dikùmakana dyàwù adi’s. Mupròfetà awu wàkajuuka pamutù pàà cikondo ne kutàngidilayemu kule menemene, munda mwà bidimu binunu bìnaayi, ne kubimòna bilwa. Anji elààyibi meeji ku bwalu abu! Uh-hum. Disonsodiibwa.

¹⁷ Kàdi tudi ku cikondo cyà nshìikidilu, balunda bàànyì. Cidi ànu. . . Nènku ke mùdì kàbìdì Mifùndu, bu mùdìbi ne bintu byònsò ebi bìdi munkaci mwà kwenzeka, Mifùndu yònsò mitèèka ànu mwómò emu mene mu cikondo cyà nshìikidilu eci mene. Ki mèmè kudyàmbidila, mu dindà emu ne, bu Nzambi mwà kutùkwacishaku, tuvwa mwà kuswikakaja bintu ebi, bimwè byà ku bintu ebi, bùngì bwònsò butùvwa bafwànyine kwenza abu. Ne pashìishe dilòòlò edi cikondo cinène cyà ndekeelu aci, cyà èkèleeziyà wa Laòdikiyà, mùdici cìpeta Mukenji wàci ne pashìishe cyèpuka ne cìbenga kujingulula Mukenji wàci, cìkabwela buludi mu ngiikàdìlù wa cìvùmvù udi Nzambi ùtwila mukana Mwèndè. Nwamònu’s, mu ngààkwilu mukwàbò, cidi cìMwendesha ku mwoyi Wèndè ànu mene ku dikwelela meeji. “Nènkutwilè mukana Mwànyì,” mwàkambàYe.

¹⁸ Mpindyewu, ndi ne ndambù wa Mifùndu mifùnda kaaba aka yìndì muswè kwikala nteela mu dindà emu. Kàdi ndi ndikonka ní mbifwànyine kwikala bikolè bwètù twètù, bwà katanci kakesè cyanààna, bwà kujuuka bwà mwaku wà disambila:

¹⁹ Taatù wetù wa mu Dyulu wa Ngàsà, patùdì tulwa cyàkàbìdì mu dindà emu mu ditùkù dyà Nsabatu edi apa. Ne pambèlu apu, mvùla mmutwadije kumyamina, ne lupeepèlè lwà mashika lwà nêjè lutuuta; kàdi tudi ne disànkà dyàbùngì mutùdì ne musàkà pa mitù yètù leelù ewu, mutùdì ne kaaba kakesè, ne tucidi ànu ne ditùnga mutùdì mwà kulwa kukuukwila Nzambi mu mùshindù kàna wònsò udi kondò kèètù kàà mwoyi kàtwàmbila bwà kukuukwila awu.

²⁰ Dìbà adi tudi tumòna mu Dìyì Dyèbè ne cyòci eci kacỳakushààla ntàntà mule menemene to, pa nàнку, Taatù, tudi tulòmba bwà Wèwè kutùlaabaku maanyì nangananga, leelù ewu, bwà twamòna mwà kupeta cidi citàmbe bwìmpè ku eci cidìku bwà twètù kupeta aci, ne kwikala badìlongolole bwà mèbà

àdi kumpàla kwètù patwikalà katùciyi mwà kwenza nàнку. Katwèna bamanyè ne ntoo ne ku dîbà kaayi to, bidi mwà kwenzeka mu mbingu, ngondo, anyi bidimu, katwèna bamanyè to, kàdi míngà misangu katwàkwikala ne mùshindù wà kwenza cyôci eci to. Pa nàнку tudi tulòmba, Taatù, bwà Watùlamakù mu bulombodi Bwèbè bwà Bunzambi, ne swàku bwà meeji ètù ikale Kùdì, ne dyelangana dyà meeji dyà mu mwoyi wètù diikàle diitàbiibwe ku mèsù Kwèbè, Éyi Mukalenge.

²¹ Tùfwilèku luse ku mpèkaatù yètù. Tudi tulòmba nàнку patùdi tuyitonda Kùdì apa, bwà ne tudi benzè mpèkaatù ne balalùke ku Njila. Ne katwèna bakùmbànyine bwà kubìikidiibwa ne Bèèbè Wèwè to, tùvwijeku ànu basadidi Bèèbè bàà difutu, Mukalenge. Nènku netùjinge bwà kwenza cyònsò cyÛdì utwàmbila bwà kwenza aci, mudimu kàna wònsò ùdi mutèèkiibwe kumpàla kwètù awu. Tudi baswè kuwèza, twakidilekù ànu mu Bukalenge Bwèbè, Mukalenge; bwà twamòna mwà kukwacila mudimu mu edi, dîbà dinène dyà dyanza bwòwà didi buloba bùpìcila edi.

²² Tùbènèshèku mpindyewu ne Bwikadi Bwèbè, tùlongèshèku ku Nyumà Mwimpè Webè, ne angàtààku butùmbi ku diikala dyètù pàmwè kaaba aka edi. Bwalu tudi tulòmba nùнку mu Dìnà dyà Yesù. Amen.

²³ Mpindyewu ndi muswèku, dyàmbedi, ndi muswè kwanji kujingulula umwe ne umwe wa ku balunda bàànyì bàdì mwab'ewu aba, bàndì mmòna mu dindà emu aba. Mbikolè be mwab'ewu mu mèbà à bufùkù, bukènkè bwètù bùdì lwà paanyimà pàpa mu myaba mipwekele yàya bùdì bupangisha mwà kumòna bantu. Nènku's mbyenze ànu bu bikolè bwà kumwèna ku cyambilu eku dilòdò, nènku's mbikolè kàbìdì mundaamuunya. Ndi mmòna bààbùngì bàà ku balunda bèètù bàdì bafùmine pambèlu ku bitùpà bishiilèshìilàngàne byà ditùnga, bwà ngaamòna mwà kubajingulula bìmpè leelù ewu kutàmba mùmvwà mufwànyine bufùkù. Nènku's nebìikale batàmbe kwikala bàbùngì bwà kuteeta kubàtèèla bònsò, kàdi ndi muswè bwà nwènù kumanya ne ndi cyà bushùwà nnwànyisha. Nènku paanyimà pàà cyakwidi cicolè cyònsò eci ne bikwàbò, mùvwàbì bikèngela bwà mèmè kwenza mu Mifundu, bwà kwenza . . .bwà kupàtula Bulelèlà. Kì ncìmvwà mèmè muswè kwenza to, kàdi cìdì Nzambì mufunde kaaba aka bwà kwenza, nudi numòna's. Ne pashiishe ki Cyôci aci. Kàdi nànsha nàнку ndi mmòna bàna bèètù bààbùngì bàà ku malongolodi ne bikwàbò, basòmbe ànu naanyi too ne mpindyewu, pa nàнку ndi nnwànyisha bikolè, bikolè be. Nwènù . . . Disambila dyànyì ndyà ne Nzambì àtungunukeku ne kunùbènèsha ne kunùkwàcìsha.

²⁴ Nènku mpindyewu . . . [Mwanèètù Stricker ùdi wamba ne: "Mwanèètù Branham?"—Muf.] Éyowà's, mwanèètù. ["Bu mèmè mwà kupeta dyanyisha dyà èkèleeziyà bwà kwakula pa kaaba kàà bantu bwònsò bàdì kaaba aka aba, tudi baswè bwà ùmanyè

ne tudi tukwanyisha.”] Twasàkidila, Mwanèètù Stricker. [“Ne tudi bakunangè.”] Twasàkidila, Mwanèètù Stricker. [“Nènku tudi tulòmba bwà ngàsà ikalè neebè mu bintu byùdì mufwànyine kukèngela bwà wèwè kupìcilamù, bwà twamòna mwà kwimana ku luseke lwèbè.”] Twasàkidila, Mwanèètù Stricker. Twasàkidila, nwènù èkèleeziyà, abi’s mbilenga byà dikèma bwà nwènù kwamba ciine aci. Ndi ngànyisha aci bikolè bitàmbe.

²⁵ Muntu kampànda ùvwa wàmba makèlèlè dilòòlò awu, ngeela meeji ne ùvwa m’Mwanèètù Fred uvwa mumbiikile ku tèlefonè wàmba bwà bwalu bwà cikèenà-kumòna anyi cilòòtà civwa mwanèètù kampànda mupepe, uvwa mucilonde ànu kumpàla kwà kuumuka makèlèlè dilòòlò awu, mumòne mwimane pa cibèndà cyà buloba ne ditutu difiike diikàle dibùnguluka paanyimà. Ndi mumanye ne yèyè ùdi wènda ùlumbatangana naanyi. Kàdi aci, bu mùdibi ànu ne. . .yèyè—yèyè kèna mwà kwenza cintu pàdì Nzambi kàyì mwanji kujikija to, ne pashiishe—pashiishe ndi—ndi. . .pàdì dībà dyàkana bwà mèmè kuya pa dībà adi kaayi. Pa nànkù. . .

²⁶ Kàdi ndi—ndi ngeela meeji ku eci, kacìyi bwà “kwikalaku banène to.” To, ncyèna muswè kwikala nànkù to, nwamònu’s. Kàdi ndi ngeela meeji ku *Musambu wà Mwoyi*:

Nsòmbelu yà bantu banène yidì yitùvùlwija
bwònsò

Nwamònu’s, cyàkenzà Pòlò, cyàkenzà Irénée aci, cyàkenzà Luther, cyàkenzà Wesley, anyi cyàkenzà Martin Munsantu, ne cyàkenzàbò.

Ne nsòmbelu yà bantu banène yidì yitùvùlwija
bwònsò

Ne tudi mwà kuvwija nsòmbelu yetù yà dikèma
ne dyanyina,

Pa kuumuka, kushiya paanyimà pèètù
Bidyacilu byà makàsà pa lusenga lwà bikondo;

Bidyacilu byà makàsà, bìikalà pàmwāpa
mukwàbò,

Mwikale wendela mu màzuwà pa mbù wa
kàyì tuseku wa mwoyi wa pànu apa,
(Bwalu paanyimà pàà mèmè mumane
kuya, nwamònu’s, ne muyè.)

Mwanèètù kampànda kàcìyi ditèkèmena ne
mudiine ne màzuwà mu màyi, (wàngula
ùmwè wà ku mikàndà eyi ne ùwùbala,)

Mu kumòna aci, neàkoleshe mwoyi cyàkàbìdì.
(Ki bwalu mbwabu.)

Twikale biimanyine kuulu, dībà adi, munkaci
mwà kwenza,

Ne mwoyi mukolè bwà dîna lutàtù kanà
lwònsò, (Mèmè ndi munange aci, kadi
nwènù?)

Kanwikadi bu ngombe yà tumàmà, yìdìbo
bàsàka to! (Yìdì yikèngela kuyisàkaku.)

Kàdi ikàla cilòbo mu lutàtù alu! (Ndi—ndi
munange aci.)

²⁷ Mpindyewu, mwanèètù mutekète wa balùme, George, ùvwa ne ciibidilu cyà kwikala ne wà nànkù awu ùvwaye munange; ngaakawambulula ku diyiiisha dyà ku lufù lwèndè. Tuvwa pa ciibidilu . . . Mvwa nsòmba nteela *Musambu wa Mwoyi*, nudi bamanyè's, ne yèyè ùvwa ùsòmba ùtèèla *Kusabuka Mushoonyi*. Nwamònu anyi? Kàdi's nutukù bawùmvwe ne:

Dibwela dyà díbà ne mütòotò wà dilòòlò,
Ne dibìikila òmwè disungùlùke bwànyì
mèmè!

Nènku kakwikadikù ditwà dyà mikèmu ku
mushoonyi to,

Pàngààpità ku mbû, (Nukààdi bacyùmvwè
misangu ne misangu.)

Bwalu byònsò bìdì pambèlu bìyaaya pàmwè ne
cikondo ne cibwàshìbwàshì,

Nkwaka yidi mwà kuya naanyi kule,

Kàdi ndi ntekèmena bwà kumòna Mwendeshi
wa bwátù bwànyì mpàla ne mpàla

Mpangùikala musabuke mushoonyi. (Ndi
mutwishiibwe ne yèyè wàkacyènza
pààkasabukaye mushoonyi.)

²⁸ Nànkù awu, ne díbà adi wànyì ngwà ne:

Pa kuumuka nshiya paanyimà pàànyì

Bidyacilu byà makàsà pa nsenga yà cikondo,

Bwà bakwàbò, pa kubimòna, bàdi mwà
kulonda,

Kukola mwoyi ne kutungunuka ne kuya.

²⁹ Bwalu, mu ditùkù dinène kampànda Yesù nealwe (nènku ki citwikalà mwà kulonga mu dindà emu aci), byònsò nebìikalè bijikè díbà adi.

³⁰ Mpindyewu, mvwa ngeela meeji mu dindà emu, bu mùdìbi ne katwàkupeta mùshindù mu mayiisha à èkèleeziyà aa . . . Mpindyewu, pàmwàpa, bu Mukalenge mwà kwanyisha, àbidì àdì panshi aa, ndi mufwànyine kwenza mulongolongo wà masangisha makwàbò makesè pa *Èkèleeziyà Mulelèlà ne wa Mashimi*, kuumukila ànu ku Genèsè, kwenda naaci mu Bible mujimà ne kucikenketa too ne mu Bwàkabuulwibwà. Èkèleeziyà yònsò yìbidì ayi, ànu ciikalàyi mwà kwenza aci. Nènku díbà adi pàmwàpa dîngà ditùkù patwikala . . . bu Mukalenge mwà kwanyisha, netwikale bamane kwibaka èkèleeziyà bwà

nwâmòna mwà kupeta ndambù wa myaba yà kusòmba . . . Nudi mwà kukèma bwà búngì bwà bantu bàdi babìikile bwà kulwa ne bambe nàнку awu; bàdi ànu bendesha màshinyi balwa ne bàmòna ne mwònsò mmùpate patapata, pa nàнку bàdi ànu bàtùngunuka, nwamònu's. Nàнку awu bòbò . . . katwèna ne mwaba to.

³¹ Nèнку pàmwàpa bu mùdì mu muvù wà lu- . . . mu cikondo cyà muvù wà luuya pàdiku lupeepèlè lwà luuya anyi cikampànda, mwaba wutwangata cibambalu cinène cyà manayi cyà cilongelu citùmbùke anyi cikampànda, nebìikale bîmpè be, dîbà adi kwangata Mukàndà wà Bwàkabuulwibwà, anyi cikampànda, anyi Mukàndà wà Danyèlè ne Bwàkabuulwibwà, ne kuyitwàngaja pàmwè bwà twamònakù mwà kucìpeta.

³² Mpindyewu, katwenàku bafike ku ditàngila bwalu bwà beena Yudà to. Beena Yudà bàvwa . . .

³³ Mpindyewu, ànu mûngàmbì, mu—mu Cikondo cyà Mîdimà cyà cidimu cyà 1500, balombodi bàà Kàtòlikè, pàvwàbo bàshikika, pààkasangàbo èkèleeziyà ne mbùlâmàtadi pàmwè, cìvwa mmwènu wa ne: “paanyimà pàà bukalenge bwà bidimu cinunu.” Bààkeela meeji kakùyì mpatà to ne bàvwa—bàvwa mu Bukalenge bwà bidimu cinunu bwalu èkèleeziyà úvwa mupetè mupinganyi wendè, umwe mufwànàngàne ne Kilistò bwà kusòmbayè pa nkwaswa wa butùmbi. Nèнку cìvwa mwà kucisanga ne èkèleeziyà ne mbùlâmàtadi, byònsò kulwabi bîmpè, ne “Bukalenge bunène bwà bidimu cinunu bùvwa munkaci mwà kwenzeka.” Bàcìdi ànu biitabuuja nàнку. Kàdi aci's ndipanga. Bwalu Bukalenge bwà bidimu cinunu kabwèna mwà kulwa to, kabwèna mwà kubanga, kakùyì dilwa dyà Kilistò to.

³⁴ Kilistò ke udi ubweja Bukalenge bwà bidimu cinunu mu cyalu, Yèyè m'Mwànà wa ditanta; ne pààlwàYe, dîbà adi ke pààtwàdijà bidimu cinunu. Nèнку pènzekabi, nekwikalè Dyambwibwa dyà Èkèleeziyà wabànda, ne pashiishe dipingana dyà Kilistò. Nèнку vùlukàayi mpindyewu ne, pàdi . . . Bwalu cintu cìdì cilondà citùdì bindile ncinyi? Dyambwibwa dyà Èkèleeziyà.

³⁵ Mpindyewu, kanùbwejakaji Dyambwibwa dyà Èkèleeziyà ne Cilumbulwidi cyà ku Nkwasa Mutòòke nànsha. Bwalu, Dyambwibwa dyà Èkèleeziyà, kakwèna cilumbulwidi nànsha cimwè to, wamònu's, wèwè ukaadi mumane kutwilangana naaci ànu pa buloba apa. Ncyà bushùwà: “Bwalu aba bàdi mu Kilistò kabèèna mwà kulumbulwishiibwa to.” Yesù wàkamba ne: “Ewu udi utèeleja Mèyi Àanyi ne wìtabuuja Yèyè udi muNtùme ùdi ne Mwoyi wà Cyendèlèlè ne yèyè kàakupita ku cilumbulwidi to, kàdi ùkaadi muumùke ku lufù muye ku Mwoyi.”

³⁶ Mmunyi mutùdì twenza ciinè aci? Tudi tubwela mu Kilistò ne tubàtijiibwa mu Mubidi ùmwè, mu Kolintò wa Kumpàla

12: “Mubidi ùmwè.” Tudi babàtìjìibwe mu Mubidi wà Yesù Kilistò, ne Nzambi ùkaadi mumane kulumbulwisha Mubidi awu. Yèyè kênaku mwà kutùlumbulwisha kàbidì to, bwalu Ùkaadi mumanè kulumbulwisha Mubidi awu. Nènku ku dyanyisha ne ngàsà wa Kilistò Yèyè ùdi ùtùbweja mu Yèyè mwinè, Kolintò wa Kumpàla 12: “Ku Nyumà umwe nkutùdi bwònsò babàtìjìibwe mu Mubidi wùmwe awu, ne balekèlèdiibwe ku manyooka ónsò bwalu Yèyè ùkaadi mutwàle manyooka.” Kaa, kanwènaayikù ne kusàkidila kwàbúngì Bwèndè Yèyè! Yèyè wàkatwàmbwila manyooka. Kakùcyèna kàbidì cilumbulwidi to! Kàdi aba bàdì bàbènga bwà kubwela munda Mwèndè, Mubidi awu, Mubidi musokòme . . . Tudi tubwelaMù munyi? Ku dilabulangana dyà ku cyanza anyi? To. Ku mukàndà mufùndilangana anyi? To. Ku dibàtiiza dyà mùshindù kampànda, dyà màyi anyi? To. “Ku Nyumà umwe, Nyumà Mwímpè, nkutùdi bwònsò babàtìjìibwe mu Mubidi awu!”

³⁷ Mpindyewu nwavùlukaayi ne, netwàkulepu bikolè menemene mu dindà emu. Anyi udi mu Mubidi awu anyi pambèlu pàa Mubidi awu, kí pankacinkaci Pàwù to. Kakwenaku beena Kilistò bìmpè ndambù to. Nènku—nènku kùdi . . . anyi udi mwena Kilistò anyi kwèna mwena Kilistò to. Kakùtu nyuunyi mufiike mutòòke musangu ùmwè to, kakùtu muntu mukwacike kàyì mukwàcike to. Kanwèna mwà kupeta aci to. Anyi udi mwena Kilistò anyi kwena mwena Kilistò to. Anyi udi munda mwà Kilistò anyi udi pambèlu pàa Kilistò.

³⁸ Mpindyewu, ebi bìdi mwà kumweka bu ne ndilongesha, ncyèna . . . Ndi kule be ne kwikala mulongeshi. Kàdi dilongesha ncintu cyà citàpa, adi’s ndipà dyà pabwàdi mu—mu Mubidi wà Kilistò. Dyàmbedi kùdi bàpostòlò, ne pashiishe bapròfeta, pashiishe balongeshi, ne batangadiki, bampaasàtà; mapà à bwambi àtaanu mu Mubidi. Kàdi dilongesha ndìmwè dyà ku mapà à Nyumà. Mpindyewu, bikèngela ànu ne ntungunukè ne cìndì mmòna ne ncijalàme ne ntètè bwà kucitwadila bantu, ne kulonga ne kusangisha Mifùndu pàmwe. Mpindyewu, kàdi cidi ànu mu Kilistò cyanààna, bwà Mubidi wà Kilistò wùjinguludiibwè.

³⁹ Mpindyewu, nshapità yisàtù yà kumpàlà yà Bwàkabuulwibwà yidi yitàngila Èkèleeziyà. Bàà Bisàmbà byà bendè, beena Yudà, beena Etyòpà, ba-Afrikaans, bantu bàà mishindù yònsò pa buloba bàbadiibwa mu bàà Bisàmbà byà bendè bwà kwenza Mubidi ewu; bafiike, batòòke, bafiikùlùke, ne bikwàbò byònsò, ncisumbù cyà bilòngò, ne ncyà bushùwà, cidi Nzambi ùtèèka pa cyoshelu Cyèndè; ne ciinè aci ncyenza kùdi matùnga wònsò, bifuku, myakulu, ne bantu.

⁴⁰ Kàdi, mpindyewu, paanyimà pàa nwènù bamane kushìya nshapità mwi3 (Bikondo byà Èkèleeziyà ebi), Nzambi ùdi wàlukila ne wàngata beena Yudà, Èkèleeziyà kèna ùmwènka kàbidì mu ciinè cikondo aci to. Mbeena Yudà. Ne Nzambi kèna

ùkwàta mudimu ne beena Yudà bu bantu-nkààya to, Ûdi ùkwàta mudimu ne Izalèèlà bu ditùnga, misangu yònsò ànu bu ditùnga.

41 Ki mwàkacìpeta muntu kampànda dîngà ditùkù. Ndi—ndi mupete mikàndà búngì cyanààna mimfùndila pa bwalu abu, *Ntèndeleeleu Musopakaja*, mungààkambà dîyi pa. . . Bible mmwambe ne mwànà mulela mu masandi, udi ubiikidiibwa ne “m’mwànà wa mu matalà,” kàvwa mwà kubwela mu disangisha dyà Mukalenge to munda mwà nkongo dikumi, yìvwà mifwànyine kwikala bidimu nkàmà yìnaayi bìvwà mwànà mulela mu masandi kàyikù mwà kubwela mu disangisha dyà Mukalenge to. Ki mùshindù ùvwà disopakaja adi dibì; aci’s cìvwa mmukàjì kampànda ùlekela mulùme mukwàbò ushààla nendè bwà kulela mwànà, apu mwànà awu ùvwà musopakaja, kí nkùdì tatwendè to kàdì kùdì taatù mukwàbò wa pàtupù. Nwamònu anyi? Nènku aci cìvwa cibì cyà dikèma kumpàlà kwà Nzambì, bìvwà bìkèngela nkòngo dikùmi bwà kuumusha disopakaja adi kàbìdì, kumpàlà kwà Nzambì.

42 Kàdì aci kaciyèna cyàngaciibwa bwà cikondo eci to. Nudi ne Dilediibwa dipyadiyà mpindyewu. Kabèèna. . . Bàvwa ànu ne dilediibwa òmwèpelè kale wàwa, òvwà ndisangila dyà mulùme ne mukàjì dyètù edi. Tudi ne Dilediibwa dipyadiyà mpindyewu didì diikale dyà nyumà, adi didì dyùmusha dikooyika dyònsò adi. Ne twètù tudi bifùkùibwà bipyabipyà mu Kilistò Yesù, balediibwe cyàkàbìdì ku Nyumà wa Nzambì. Bifùkùibwa bipyabipyà! Pa mwaku ewu *cifùkùibwa*, bàmwè bàà ku nwènù bamanyi bàà mabàla balenga mwab’ewu bàdì bùmvwà (Wèwè kùyi mumanye to, udi mufwànyine kucikèba.), *cifùkùibwà* cidi cìfùma ku mwakù wa cyena-Ngelikà wa “bufùkì bupyabùpyà.” Kaa, byà mwomùmwè ànu ne mùdì cìfùkùibwà kaaba aka, mulela ku disangila dyà mulùme ne mukàjì; udi dibà adi bufùkì bupyabùpyà, mulela mu Dyulu. Wa. . . mu bufùkì bupyabùpyà bwà Nzambì bwà muntu mupyamùpyà. Bufùkì bupyabùpyà, ku Dilediibwa. Kàdì bìvwa bìkèngela bwà kwikalaci dilediibwa, ànu dyà mwomùmwè mùdì dilediibwa dyà mu bufùkì ne mushinga amu; Dilediibwa dyà mu nyumà didì ne mushinga ànu mùdì dilediibwa dyà mu mubidi emu.

43 Babàkà batekète mbafwànyine kusèlangana bàmba ne: “Mwanètù mukèsè wa balùme wa kumpàla, netùmwinnyikè ne ‘John.’” Yèyè kàyì mwanji kulediibwa to, John awu kí mmwanji kwikalaku to. Kwajiki. Ncintu cìmwècìmwè aci, nudi bafwànyine. . . búngì bwinè bwà byeejeejì bikwàtakaja binùdì nufwimbakaja pa bwalu bwà Dyulu, mùshindù ùdìdì dinène, pawikala kùyi mulediibwe cyàkàbìdì to kwàkwikalaku to. Kwajiki, wamònu’s. Bidi bìkèngela cìikale ànu mùshindù awu, bwalu bidi bìkèngela cìikale Dilediibwa. Nzambì mmwèle mikenji Yèndè ne byònsò bidi bikwàta mudimu bilondèshile mikenji Yèndè. Nwamònu anyi?

44 Mpindyewu, mu byôbî ebi, mùdi bàshààdilè bàà beena Yudà ne cyà kusungidiibwa. Nènku netùbàngatè dyàmbedi, bwalu cidi cishikika . . . Mpindyewu, kùtu misangu yònsò ànu mishindù yisàtu yà bantu díbà dyònsò, misangu yònsò. Ne kulama . . . kubilama mu meeji, mbwena kwamba ne: mwena—mwena kwitabuuja, mwena kwitabuuja wa budingìbudingì, ne mwena bupidyà. Byònsò bìsàtù abi. Ne kùdi mwena Yudà, udi mwipata bwà kutùpèèsha mpùngà; kùdi èkèleeziya wa civùmù; ne kùdi Èkèleeziya muujìbwe tètè ne Nyumà.

45 Musangu kampànda, Charlie Bohanon ùvwa mfùmù wa . . . anyì mutàngidi munène wa Kumpànyi wa Midimu yà Mbùlámàtadí yà nseke yà ku sud, pâm vwa mbenzela mudimu. Mwva ànu munkaci mwà kulonga Mifundu pa díbà adi, bu nsongààlùme. Ki yèyè ne: “Billy, muntu kanà yònsò . . .” Yèyè ne: “Yone ùvwa ne cyà kwikala mudyè ndùngu wa mbuji wa mubobe kàdi kulòòta cilòòta cikùtàkane kuntwaku mu—mu cisanga cyà Paatèmò.”

46 Mémè kwamba ne: “Mukalenge Bohanon, kabìvwa bikèngela bwà wèwè kwikala mwambe nàнку to.” Yèyè ùvwa mfùm wanyì wa mudimu, mutàngidi.

Yèyè ne: “Èè, pa buloba apa nganyì udiku mwà kuumvwa Aci’s?”

Mémè kwamba ne: “Cyumvwike. Ncyùmvwikè pìikala Nyumà Mwímpè pabwìpì bwà kuCìbuulula.” Ncyà bushùwà.

47 Ki yèyè ne: “Kaa, ekèlekè!” Yèyè ne: “Mémè kuteeta kuCìbala ne mpaasàtá wanyì kuteeta bwà kuCìbala,” yèyè ne, “twètù kudìsangana mu ngiikàdilu mubì be.” Yèyè ne: “Tuvwa ne—ne Mukàjì-musèla mwimane pa Mukùnà wa Sinààyi.” Nwamònu anyì? Ki yèyè ne: “Pashiishe twètù kupeta Mukàjì-musèla ne dragon upwidija màyi à mukana mwèndè, bwà kwenza bàshààdilè bàà dimiinu dyà mukàjì abu mvità. Twètù kusangana Mukàjì-musèla mu Dyulu. Bwònsò bàsàtù, musangu ùmwèumwè awu.”

Mémè ne: “Aci’s mpàdiku kakùyi dyumvwa dyà nyumà to.” Nwamònu anyì?

Yèyè ne: “Èè, s’ki bôbò abu, bwònsò ku . . . bàsàtù abu musangu ùmwè.”

48 Mémè ne: “Èyowà’s, mukalenge, kàdi awu kî mmùshindù ùvwàbo batèèkiibwe to. Nwamònu’s, udi ubiikila binunu lukàmà ne makumi anaayi ne binaayi abu ne ‘Mukàjì-musèla,’ civwàbo kabàyi to; bôbò bàvwa beena Yudà. Nènku ewu wàkapwidijila dragon màyi à mukana mwèndè bwà kumwenza mvità awu ki bàshààdilè abu, bashààdile bàà ku dimiinu dyà mukàjì bàvwà balame mikenji ne biikale ne, bujaadiki bwà Yesù. Kàdi Mukàjì-musèla ùvwa mu Butumbi.” Nwamònu anyì?

⁴⁹ Binunu lukàmà ne makùmi ànaayi ne binaayi, nshapità wa 14 wa Bwàkabuulwibwà, bàvwa biimàne mwaba awu pa Mukùnà wa Sinàayi, (Aci's ncilelèlà menemene.) biikàle ne Dînà dyà Taatù wabò pa mpàlà pààbò. Ncyà bushùwà menemene. Beena Yudà, bàshààdilè bàà beena Yudà.

⁵⁰ Nènku pashìishe ki dragon ulwàlwa ewu, balombodi bàà myânzù bàà cyena Loomò abu. (Bwalu, Èkèleeziyà Yèyè mwinè ùkaavwa mwambwibwe, ùvwa mu Butumbi ku Didya dyà Dibanji bwà bidimu bisàtù ne citùpà.) Pashìishe dragon awu, nwamònu's, *dragon* awu ùtu misangu yònsò ànu "Loomò," dragon mukúnze awu. Mpindyewu bwà kunùvwijilaci cyà bushùwà, mu—mu Bwàkabuulwibwà 12, dragon ùvwa cijji ne mukàji uvwa ne cyà kulela Mwànà wa balùme uvwa ne cyà kukòokeshà matùnga ònsò mwikàle ne dikombo dyà cyamù, ki yèyè kupwidijila màyi mukana mwèndè ne... anyi—anyi kwenza bàshààdilè bàà dimiinu abu mvità. Kàdi dragon mukúnze, cyà kumpàla, wàkiimana kumpàla kwà mukàji ewu. Pàkaavwa mukàji ùswa kulela Mwànà ewu, yèyè ùvwa ne cyà kudyà Mwànà awu pàvwaYe ànu ne Wàlediùbù. Mpindyewu, nganyi wàkiimana kumpàlà kwà èkèleeziyà wa Izàlèèlà (mukàji wa Izàlèèlà awu), bwà kudyàye Mwànà wèndè (Yesù) pàvwaYe ànu ne wàlediùbù? Loomò! Helòòde wàkatùma dìyi dyà patòòke ne—ne muntu yònsò ùvwa ne cyà kushipa mwànà yònsò kubangila pa bidimu bibìdi kupweka, kwenzekaku dishibeya dyàkashipa bânà bwònsò bàà beena Ebèlù mu ditùnga dijimà. Cintu ànu cimwècimwè cyàkenza Pàlò bwà kukwàta Mòsà, uvwa mwikale cifwànyikijilu Cyèndè, kushebeyaye bânà bwònsò kàdi kumupangilabo yèyè. Kaa—kaa—kaa—kaa, Nzambi's mmumanye mwà kubasokoka.

⁵¹ Kaa, kanwènaayikù ne disànka munùdi basokoka anyi? Kaa, mwaba wà cisokomenu's! Bible mmwambe ne: "Bwalu udi ne cyà kudibala wèwè mwinè mufwè ne mwoyi wèbè mu Kilistò, musokoka mu Kilistò ne mutwibwe citampì kùdi Nyumà Mwimpè." Dyabùlù kàvwaku mwà kukupeta to bu ne bìvwa bikèngela yèyè kukupeta. Kàvwa ànu mwà kucyènzà to, nudi numòna's. Wèwè udi musokoka mu Kilistò! Udibala wèwè mwinè mufwè! Ne nsòmbelu yènù mmisokoka mu Kilistò, misokoka mu Nzambi kupicila ku Kilistò, ne mutwa citampì kùdi Nyumà Mwimpè.

⁵² Mpindyewu, mpindyewu, bàshààdilè aba bàvwa virgò mukùtakàne; wakapwidijilaye màyi à mukana mwèndè bwà kwenza bashààdilè bàà dimiinu dyà mukàji awu mvità. Mpindyewu, bàshààdilè ncinyi? Mpindyewu, mwaba awu bikèngela bwà nwènù—nwènù kusangisha mishindù yisàtù eyi pàmwè mpindyewu. Kùdi èkèleeziyà wa mu *bufùki*.

⁵³ Nèngiikalè mwà... Pàmwàpa ndi mwà kucizòla kaaba aka ne kucitòokeshakù ndambù. Mpindyewu, Mwanèètù Neville, mèmè mwangate ndambù wa dîbà dyèbè, wamfwilaku luse bu

wêwè mwà kuswa. [Mwanèètù Neville ùdi wàmba ne: “Amen. Ncyèna naadi nànsha òmwè to.”—Muf.]

54 Mpindyewu, kùdi . . . Mpindyewu vùlukàayi ne kùdi cinyi aci? Mwena bupidyà, nèncifunde ne “MB,” mwena bupidyà, ne mwine awu ki ngènzàmpèkààtù. Nènku ki mukwàbò ewu udi wa mmwenekelu wa kwìsùkwìsù, nèncifunde ne “MK,” èkèleeziyà wa mmwenekelu wa kwìsùkwìsù. Ne pashiishe mukwàbò nyèyè ewu udi èkèleeziyà musùngidiibwe: “EM,” èkèleeziyà musùngidiibwe. Mpindyewu, nùbàlamàayi mu meeji dîbà dyònsò.

55 Mpindyewu, mu èkèleeziyà musùngidiibwè ewu mùdi bisùmbù bibìdi, mu ewu èkèleeziyà ùdi *apa* ne lwà *apa*, ùvwa mulejilbwe mu cimfwànyì kùdi Kilistò: umwe wa kùdibo ùvwa virgò mukùtākāne, ne mukwàbò ùvwa ne Maanyì mu mwéndù. Mpindyewu, nwènù—nwènù bwònsò . . . Mbanganyì bàdi bavùlùke bwalu abu? Netùfikeku ànu mu katanci kakesè emu.

56 Mpindyewu, dyàmbedi, kumpàlà kwà twètù kwenza nàнку, netùye ku binunu lukàmà ne makùmi ànaayi ne binaayi, byà mu Bwàkabuulwibwà 7 abi, bwà cyàmòna bushùwà mwà kuumvwika. Mpindyewu, nudi ne cyà kuvùluka cyòci eci. Ne nwènù bàdi bacifunda, m’Bwàkabuulwibwà 7.

57 Twanji ànu kwangataku dîbà dyètù. (Nènku—nènku nwènù—nwènù kanwàkubàtiiza to too ne—too ne . . . Paanyimà pàa disangisha mu dindà emu, mbîmpè.) Netwikalè . . . Nènteetè bwà kutèeka dîbà dyànyì dyà ku dibòko mwab’ewu bwà kutàngila dîbà bwà twamònakù mwà kupàtuka. Mpindyewu tudi ne—tudi ne mèbà matwè ku àbìdi mpindyewu, kàdi Mukalenge atukwacisheku bwà àtùpè dilonga edi.

. . . *paanyimà pàa maalu aa . . .*

58 Mpindyewu, tudi . . . Nshapità mwi6 ùdi wàkula bwà—bwà kabalù katòòke, civwà ciikale Nyumà Mwîmpè wàkaya wènda ùcimuna, bwà kucimuna. Pashiishe kulwakù kabalù kàa katòòkoloke, Lufù, ne Ìfernò wàkakàlonda. Ne yònsò wa ku babandi bàa pa tubalù abu.

59 Mpindyewu, “paanyimà pàa maalu aa,” paanyimà pàa kabùtu kanène aka. Dyàmbedi wàkapàtuka ùvwa Nyumà Mwîmpè pa buloba bujimà, “wènda ùcimuna ne bwà kucimuna”; pashiishe kulwaku ewu mu cikondo cinène cyà lukòta ne: “cipiminu cimwè cyà blé bwà dyeyà òmwè, bipiminu bibìdi byà orge bwà dyeyà òmwè, ne bikwàbò, kàdi kanwenzedi Maanyì Àanyì ne Mvinyò bibì to”; ki pashiishe kutùngunuka too ne pàakakàngulaYe bitampì ebi—ebi.

. . . *paanyimà pàa maalu aa ngákamòna banjèlò bànaayi bîmàne ku ntengu yînaayi yà buloba, bakwàte mpeepèlè yînaayi . . . bwà kayikadi yàlwa kutuuta pa buloba, anyi pa mbù, anyi . . . mucì kanà wònsò ewu to.*

Ki mêmè kumòna mwanjèlò mukwàbò ùtuulukila ku esètè, mwikàle ne cìtampì cyà Nzambi udi ne mwoyi: ke kwelaye lubila ne dÿyi dikolè kùdì banjèlò banaayi abu, bàvwabo...kwenzela bibi...bàvwabo bapèèshe bukòokeshi bwà kwenzela mbù bibi ne buloba abu,

Wàmba ne: Kanwènzedi buloba bibi to, anyi mbù, anyi...mucì, too ne patwàtwà basadidi bàà Nzambi wetu citampì pa mpàlà pààbò.

⁶⁰ Mpindyewu, vùlukàayi ne, basadidi bàtu misangu yònsò ànu...basadidi bàà Nzambi mbeena Yudà. Abraham ùvwa musadidi Wendè. Bàà Bisàmbà byà bendè kí mbasadidi to, m'Mukàji-musèla, mmwànà wa balùme. Ewu m'mwànà, ng'Èkèleeziyà ewu. Beena Yudà mbasadidi. Kaa, bu nwènù ànu mwà...bu ne tuvwakù ànu ne dībà dyà kukenketa myàkù ayi. Ntu misangu mivulè ngenza nàнку mu cibambalu mwàmwa, ngenda naaci mu myaba yònsò yìdici cyàmba ne ncifùnda. Beena Yudà's mbasadidi. Bu mêmè mwà kwimana mwab'ewu ne kupicishila dībà dyònsò pa "musadidi," ncyàkulenga myaba mikwàbò to, nudi numòna's. Pa nàнку vùlukàayi ànu ne, cilondeshaayi eku ne eku mu Bible, nenku nenùsangane ne mwena Yudà mmusadidi wa Nzambi.

⁶¹ Ndipàlakaja kaayi dilenga mwab'ewu ditùdi mwà kulonda, twètù baswè kwalukila ku Yèhezèkèlè 4, bwà kujandula mwaba awu ne Yèyè mmwambè ne: "Kùtukù cintu cyà mùshindù ewu cyenzèke kwònsò eku anyi?" Wàkatàngila bimanu bitumbùke, ne pàvwàye wènza nàнку, wàkamòna binyangu bidì byenjibwe mu cimenga. Ki kuyakù...kupàtukakù bantu bànaayi biikàle ne byamù byà dishebeyangana naabi. Ki kuyabò bwà kushipa bintu byònsò mu cimenga cyà Yèlusàlèmà amu.

⁶² Nènku kumpàlà kwà yèyè...kudìtwabò ku dishipa, kubàlamabo, kubiimanyika, bwalu kwàkalwa mukwàbò Muntu muvwàle bilàmbà bitòòke, mwikàle ne kalòndo kàà màyi à mufùndi (Mbanganayi bàkaadiku babalè ciinè aci?) kapàyika ku luseke lwèndè, Yèhezèkèlè 4. Pashìshe ùvwa ne kalòndo kàà màyi à mufùndi aka kapàyika ku luseke Lwèndè, muvwàle bilàmbà bitòòke, Yèyè kwamba ne: "Kanubwedi mu cimenga to, kanwanji kushipa cintu nànsha cimwè panùdi kanùyì banji kutwà dyàmbedi basadidi bàà Nzambi citampì pa mpàlà yàbò." Ki kupàtukaYe ne kutwàYe cìtampì, kwamba mene, bwà kutwà ne bânà bakesè ne bikwàbò byònsò citampì.

⁶³ Ne pashìshe aba bàvwà ne byamù byà dishebeyangana naabi, bànaayi bàà kùdìbo kulwa, kubwelabo ne kakùyì mpatà to kushimbulabo bintu byònsò, kabàyi luse to. Kushipabò balùme, bakàji, bânà, ne bintu byònsò bìvwà kabiyi ne cimanyinu cyà Muntu wa kumpàla uvwa ne kalòndo kàà màyi à mufùndi ewu uvwa utwà cìtampì. Ne cyà cinène...

⁶⁴ Mpindyewu, aci cìvwa mmu matùkù à paanyimà pàà Mukalenge wetù, pààkabàdimwijaYe bwà bwalu abu mu Maatàayi 24, mùshindù ùvwabi ne “Panwàmòna Yèlusàlèmà munyùngulukila kùdi bilwilu, kanùlekediku . . . kanùtùuluku ku musonga wà nzùbu to, anyi ewu udi mu budimi kàalukidi bwà kwangata cinkütù cyèndè to, kàdi àbwele mu Yùdaaya.” Josephhe mmufunde bwalu abu mwaba awu, ne mùshindù wàkayàbo mbilu. Nènku bààkapàndukà abu bàvwa ànu bààkangatà Mèyi à Mukalenge Yesù. Nènku pààkamònàbo bilwilu bijingè, ne Titùs, mu cidimu cyà 96 cyà panyimà pàà lufù lwà Yesù, pààkamònàbo Titùs mujingile nguumbu yà Yèlusàlèmà ne mubàkangile bwònsò muntwamu; bààkadyà mabeji à ku mucì . . . bààkadyà bizubu—bizubu byà micì, bààkadyà mashinde à mu buloba, kakùyì mpàta to bààkalamba bânà bààbò balela muntu ne mukwèndè ne kubàdya. Bààkabàkèngesha ne nzala, kubàtèèkamu ànu cyanàànà, ne ndekeelu wa byònsò kubwelamu ne kubàshebeya mu mùshindù wà ne mashi àkatuuta nkòkà kupatuka ne ku ciibi bu mùdi—bu mùdi dijiba dipòngoloka, misùlù yà mashi yituuta lubòlèlèlè ne pambèlu pàà ciibi. Kwoshabò ntempèlù, kuupulabo bimanu, nènku bìdi ànu mwaba awu too ne leelù ewu.

⁶⁵ Nènku Mosquée wà Omar wà ba mùzùlùmaanyi wàkiibakiibwa mwaba ùvwa ntempèlù ùsanganyiibwa awu. Ne Yesù wàkamba bwalu abu mu Maatàayi 24, kwambaYè ne: “Panwàmòna cinyangu cidì cifikisha kabütù citèèkiibwa mu mwaba wa cijila, mwaba wàkaakula mupròfetà Danyèlè awu, kwambaye bwà bwalu bwàci,” dìbà adi bìdi mu tubòko amu, bambe ne: “(ewu udi ubala, ùmvwè:)” Nwamònu’s: “Panwàmòna cinyangu eci, bukooya bwà mosquée wà Omar wà ba Mùzùlùmaanyi mutèèkiibwe mwaba ùvwa kale wàwa mwaba wà cijila ùsanganyiibwa.” Kàdi leelù ewu Mosquée mmujuula mwaba awu ànu menemene pàvwà mwaba wà cijila, ànu mu cipaapu cyà ntempèlù. Mosquée wà baa Mùzùlùmaanyi mmwibaka ànu mwàkamba Yesù ne nebyènzeke, èyowà, ànu mwàkambà Danyèlè ne bìvwa mwà kwenzeka, ne Yesù kucijadika ne cìvwa mwà kwenzeka.

⁶⁶ Tàngilàayi bapròfetà abu ne Nzambi awu bàdyanjila kwamba maalu aa, mwanèètù, bìvwa ne cyà kukuvwayisha nsuki yà mu dikoshi bwà kumanya ne tudì mu cikondo cyà nshìikidilu. Tukàadi ku ndekeelu! Kakucyena cintu nànsha cìmwè cidì cishàale to. Bintu byònsò ebi munkacì mwà kwenzeka ànu mwàkambàYe ne nebyènzekè, mòna’s, s’bìvwa ne cyà kutùkolesha ku mwoyi, kutùfikisha ku didilongolola. Yèyè kwamba, Yesù mmutùdimwije, wàmba ne: “Panwàmòna maalu aa ènzeka,” mutùdi tuàkula emu, yèyè ne: “ambùlùlaayi mutù wènù, bupikudi bwènù bùkaadi pabwipi.”

⁶⁷ Nènku nebitwambulwishe ku cinyi twètù mwà kupyàna buloba bujimà? Netùbùjimije, nànsha byà munyi. Katwèna—katwèna mwà kucimuna mùshindù awu to. Kùdi mùshindù ànu

umwèpelè wà kucimuna, nku Kilistò. Angàtà Kilistò, díbà adi udi ne cyà kucimunaa. S'bíkèngela ùumukè mwab'ewu; udi mwà kuumuka kumpàlà kwà disangisha edi kujikadi, udi mwà kuumuka kumpàlà kwà díbà kubweladi dilòlò edi, udi mwà ku-. . . kuya kumpàlà kwà dijuuka dyà díbà mu dindà, kumpàla kwà dyàlumingu dilwalwà edi udi mwà kwikala muyè, twètu bwònsò. Katwèna bamanye ne ndìbà kaayi ditwàyà to, kàdi udi mumanye ne udi ànu ne cyà kuya. Pa nàнку kí ndikùtákàne bwà kuciindija anyi? Udi—udi utàmbakana, udi—udi unaya ne lufù.

⁶⁸ Byenze bu dinàyà dyà mwonji ku mpengà kwà lupòngò. Bàvwa ne ciibidilu cyà kubànda pa mwonji ne banyungulukila ku lupòngò alu, bwà kumòna mùshindù úvwàbo bafwànyine kuseemena pabwípi; nènku dyàkàmwè, kumpàla kwà kutàbulukabo, ki bóbò aba mu lupòngò wòò. Nènku s'ki mùshindù unùdi nwenza, nunyungulukila ànu ku mpengà menemene kwà lupòngò. Kwèna mumanyè ne mmu kasunsa kaayi mwikalà cintu kampànda mwà kukutònkola to, ne kwèbè kumba kujika; mwoyi wìmana, njìwù yà màshinyi, ànu cintu kanà cyònsò cyènzeka, ne ufwà. Kàdi díbà adi kwèbè kúyaayà kwà Cyendèlèlè kùdi ànu kumpàla kwèbè aku. Ela meeji ku bwalu abu, mulunda wanyì.

⁶⁹ “Mpindyewu, panùdi numòna cinyangu cidì cifila kabùtu citèekiibwe mu mwaba wà cijila.” Mpindyewu, pashìshe, mu matùkù à dilwa dyà Titùs paanyimà pàà Yesù mumane kuumuka, Nyumà Mwìmpè nguvwa muntu uvwa ne kalòndò kàà máyi a mukànda ku luseke Lwèndè awu. Nènku kupicilaYe mu Yelusàlèma e kutèeka cimanyinu pa bantu. Nènku mpindyewu ndi muswè bwà umòne cintu kampànda, wèwè cidimba cyà èkèleeziyà. Kàbìdi ulaka mukana wamba mùdi ne Nyumà Mwìmpè? Yèyè kwamba ne: “Kanùtu muntu nànsha umwe wa kùdìbo citampì to ànu aba bàdi bàtwa mikemu ne bàdila myadi bwà binyangu bìdi byenjiibwe mu cimenga.” Mpindyewu, nkwepi kutùdi mwà kupeta muntu udi ne bujitu bwà menemene bwà buloba mpindyewu ne ngiikàdilù yàbò?

⁷⁰ Èè: “Mémè ndi Méthodiste, ndi Baptiste, Presbytérien, pa nàнку dishìlangana didi ku cinyi?” mùdìbo bàmba's.

⁷¹ Kaa, kakùyì bujitu bwà kashèndèndè abu bwà bajìmine, kalolo aku to. Kulekediku cintu nànsha cimwè cijuuka kàdi kwela bujindejinde mu musùukà wèbè to. Nànsha muntu mukwenzele bibì byà bishi anyì cikampànda, kudìdingi kuteeci! Kwikadi mupiile bwà kulekela cintu aci cyèlè lwongò mu musùukà wèbè to. Necibungamije Nyumà Mwìmpè kumunyemesha mu wèwè. Ncyà bushùwà ne necyenze nàнку.

⁷² Ndi mvùluka mùmvwà mwambè cintu kampànda mwab'ewu kùkaadi bidimu bibìdi anyì bisàtu cìvwà cyà mafi. Bàvwa bandumbùlùlù bààkambiikilà, ki mémè kuya ne. . . Mukàjàànyì musòmbè mwaba awu. Mvwà. . . mutù wànyì, kutuma. . . mvwa

ndyumvwa bu ne ùdi wàmba kuntaayika, nènku mèmè—mèmè kwalukila. Ki bôbò—bôbò kubiikila ku tèlèfone e kwambabo ne: “Umwambile apwekè mu mapingaja emu.”

Ki Meda kwambayè ne: “Mbandumbùlùlà abu.”

Mèmè kudyòsoka pambèlu pàà ciibi, kwamba ne: “Mwambile ne ncyèna nànshapù to.”

Yèyè ne: “Bill!”

Ki mèmè kwamba ne: “Mwambile ne ncyèna mwab’ewu mpindyewu mene to.” Ki mèmè kupàtuka.

⁷³ Pashiishe mèmè kupàtuka mwaba awu kàdi kudyùm vwa bibi be, ne kwalukila. Ki yèyè kumwambila; mèmè kucimòna cìmutàpa ku mwoyi.

⁷⁴ Mèmè kupaàtuka bwà kuya kasambidila . . . kulwaku muntu muneemu, ùvwa ne mwànà mukesè wa mu dibòko usaama. Nènku ndi mwenze ànu mbanga kutèeka cianza pa mwànà awu bwà kumusambidila, Cintu kampànda kungambila ne: “Wèwè udi mwena lubombo.” Nwamònu anyi? “Udi mumanye cyùdi mwenze.”

⁷⁵ Ki mèmè kwamba ne: “Mukalenge, ncyèna mwakànyine bwà kusambidila mwanèèbè wa mu dibòko to. Nwamònu’s, Nyumà Mwimpè mmubungame munda mwànyì ne kabyèna ne dikwàcisha bwà mèmè kutentekela mwànà byanza to. Indila ànu too ne pàngààyà kalongolola cintu kampànda.”

⁷⁶ Mèmè kuya kambila . . . kwambila ndumbùlùlà wanyì, kwamba ne: “Ndi—ndi mutùpàkane.”

Yèyè ne: “Pàànyì’s mvwa ngèèla meeji ne uvwa muyè.”

Mèmè ne: “To.” Mèmè ne: “Aci cìvwa . . . mèmè kufikisha mukàjàànyì bwà kwambayè cintu kampànda cìvwa cyà mashimi.” Mèmè ne: “Umfwileku—umfwileku luse, ncìvwa—ncìvwa ne meeji à kwenza nànkù to.” Mèmè ne: “Udikù mwà kumfwila luse bwà bwalu abu anyi?”

Ne kulomba mukàjàànyì bwà amfwileku luse bwà ciinè aci.

⁷⁷ Pashiishe mèmè kwalukila ku Green’s Mill kwàka, mùvwa mmu ngondo wa kashipu mpùmpùmpù. Kaa, mu diitu amu mùvwa mutalale ànu menemene, nènku mvwa nsanganyibwa mu nyòngòlò mu mapingaja mwònsò amu, mwikàle nsambila. Nènku mèmè kuya ne kwimana pa lubwebwe mwab’awu ne mvwa mwà kutàngidila mu tukùnà atu, ne bilenga be, ne mabèjì ne bikwàbò byònsò, ànu bipuwe; lwà pa dìbà itàànu jaajaaja, anyi yisambòmbò, mu mapingaja, mu movù wa luuyà. Cintu nànsha cìmwè, cìvwa ànu bushùwà ditùkù dyà dipolè, dyà luuya lukolè. Ki mèmè kwamba ne: “Taatu wa mu Dyulu, Mòsà, Wèwè wàkamwimanyika pa lubwebwe musangu kampànda ne Wèwè wàkapìcila mwaba awu.” Mèmè kwamba ne: “Wèwè mumfwile luse bwà bubì bùndi mwenze, udiku mwà kupitakù

cyàkàbìdì ne kwenza bwà nKumòne anyi?” Nènku ànu lwà ku dyàbakàji dyànyì ku luseke lwà kakùnà kùvwa mvùnda mukese mubange kutuuta ànu bipeepèlè byà menemene mu mabèji amu, kupwekalù ànu lwà ku luseke lwànyì mùshindù *awu* ne kupwekalù too ne mu micì amu. Mémè kudila ànu bu mwànà wa mu dibòko.

⁷⁸ Mémè kuumukakù, kwamba ne: “Ndi mumanyè ne mpèkaatù wanyi wámfwidiibu luse mpindyewu.” Nwamònu anyi?

⁷⁹ Nwamònu’s, misangu yònsò kuumusha miji yà bujindejinde munda mwèbè. Nwamònu anyi? Nànsha muntu mukwenzele cinyì, lekela. . . ikàlà ànu ne Nzambì munda amu wíkala mwà kuumusha bubì bwònsò munda mwèbè.

⁸⁰ Mpindyewu, beena Kilistò bàvwà bapetè didimwija dyà Kilistò aba, mpindyewu tàngilàayi, cifwànyikijilu cyà cintu citùdì twamba mu dindà emu aci. Beena Kilistò bàvwà bapetè didimwija adi aba, bààkapàtuka mu Yelusàlèma bwalu bàvwà bamanyè ne cìvwa pabwìpì ne kwenzeka.

⁸¹ Mpindyewu tàngilàayi bidimba byà èkèleeziyà, cifwànyikijilu cyà bantu bàvwà bàya mu èkèleeziyà, bàkashààla ànu bàà mu èkèleeziyà, kwambabò bwònsò ne: “Mòna’s, ki bilwilu bilwalwà ebi, ki mvitá yilwalwà eyi, mpindyewu tubwelàayaaku mu nzùbu wa Mukalenge túsambilè.” Kàdi díbà dikaadi dimane kupita. Kabìvwa ne dikwacisha nànsha dikesè to, nwamònu’s.

⁸² Kàdi bàvwa bàtàngila didimwija adi, bayiidi aba, bamanyè cyàkambà Yesù, ne bààkapànduka. (Bafùndì bàà maalu-malonda mbambe ne “Aba bàtubo bàbìikila ne ‘bàdì bàà munyiinyi wà muntu,” bààkamba ne: “bàvwa bàdya mubidi wa—wa muntu ewu uvwabò bàbìikila ne ‘Yesù’ uvwa ne ciibidilu cyà kubòndopa ewu.” Nwamònu’s, bàvwa bàngata mèèsà à Mukalenge. Kabàvwa. . .kàvwa mumanyè ne cìvwa ncinyì to, nwamònu’s, bwalu ùvwa muntu wa musunya, kàyi mwena kwitabuuja to, ne ànu mulongi wa maalu-malonda cyanààna. Ne yèyè. . .) Ne bààkapànduka ku ciiji cicolè cyàkalwà pa buloba aci.

⁸³ Mpindyewu, nudi numòna’s, ne pashìishe Yelusàlèma mujimà kubùtudiibwayè. Mpindyewu aci. . . Mpindyewu eci cidi cintu cifwànàngane ànu menemene, mu Bwàkabuulwibwà 7. Mpindyewu tàngilàayi! Kuumukila ku cikondo cyàkacìncimikà Titus Yelusàlèma aci, mu buloba, kakùtuku kwanji kwikala cikondo mu maalu-malonda citù buloba bujimà bubwele mu mvitá to too ne mu cidimu cyà 1914. Mpindyewu tèèlejàayi ne ntema! Mpindyewu apa mpààkapàmbuka Mukalenge Rutherford, ndi mutwishìibwe, mwab’ewu mene. Mpindyewu tàngilàayi:

Nènku paanyimà pàà maalu aa ngàkamòna mwanjèlò mukwàbò mwimàne. . . banjèlò banaayi biimane ku

ntengu yinaayi yà buloba, (S'mbiimàne mùshindù ewu, ku ntengu yinaayi yà buloba.) bakwàte mpeepèlè yinaayi yà buloba, (Mpindyewu, muntu kanà yònsò ewu mmumanyè cidì mpeepèlè yùmvwija mu Bible, mpeepèlè mbwena kwamba ne “mvità, dikòkangana,” dyabùlù mbukolè, mfùmù wa mu lupeepèlè, nudi numòna's.) . . . ne bakwàte mpeepèlè yinaayi . . . bwà kayìkadi yàlwa kutuuta pa buloba, anyi . . . mbù, . . .

Ne . . . mwanjèlò mukwàbò utùulukila lwà ku esètè (kwàlwilà Yesù aku), mwikàle ne citampì cyà Nzambi udi ne mwoyi: pamutù pàa cyanza cyèndè, mu cyanza cyèndè, ne kwelayè lubila ne dîyi dikolè kùdì banjèlò bànaayi abu, bàvwà ne cyà kubùtula buloba, wàmba, ewu . . . bàakapèèbwa bukòòkeshi bwà kwenzela mbù ne buloba bibi,

Wàmba ne: Kanwènzedi buloba bibi, anyi mbù, anyi . . . mici to, too ne patwàtwà basadidi bà Nzambi wetù citampì pa mpàlà yàbò.

⁸⁴ Mpindyewu, Nzambi kàtu ne cikondo to, Cyèndè Yèyè n'Cyèndèlèlè. Tudi tupimina ku bikondo, cintu cimwèpelè citùdì bamanye mbyàlà ne byà matumba ànaayi, ne kilòmèètà, ne bikwàbò. Nzambi ùdi Cyèndèlèlè, kàyi ntwàdijilu anyi ndekeelu. Nwamònu's, Yèyè ùdi—Yèyè ngwa Cyèndèlèlè.

⁸⁵ Mpindyewu, mu cidimu cyà 1914 buloba bujima bùwba bùbwela mu Àlèmanyè bwà mvità yà buloba bujima, ncyà bushùwà, buloba bujima ku mvità yà buloba bujima. Kàdi nuvwakù bamòne anyi? Ncyà bushùwà ne cìvwa cintu cyà pabwàci.

⁸⁶ Ndi muswèku bwà mulundà wanyì mwìmpè udi musòmbe kaaba aka ewu, tatwèndè wa Mwanèètù Wood, umvweku cyòci eci bìmpè menemene. Nwamònu's, bàvwà . . . yèyè's n'Ntemu wa Yèhowàh mukùdimune mucimà, nudi numòna's.

⁸⁷ Nènku dībà adi eci, bwònsò bwàbò bàvwà mu lwendu batàngile ku mvità. Nudi nucivùluka bìmpè, mu cidimu cyà 1914. Mpindyewu, kabyènakù bikèmesha anyi (ànu mu *Diimana dyà Mvità yà Buloba Bujimà*, ndi ne mipimbu yàci ayi, mu mupimbu mwibidi, lwà ku dibeji dyà makumi ànaayi ne dinaayi) bwà ne too ne leelù ewu kî mbamanye ne nganyì wakiimanyika mvità ayi to! Kaiser Wilhelm wàkamba ne kacya kàtuku mutume dîyi bwà cintu bu nàнку to. Kàdi, dyàkamwè, yàkiimana ne kakwena muntu udi mumanye ne mbwà cinyi to. Bàvwà bamòngane ne mvità, ki kulwaku . . . lwà ku mwalu wà mvità aku, ne kùdì . . . bwònsò kulwàbò: “Mijikè yònsò, mvità yikaavwa mijikè.” Ne bàkaavwa bamane kwela cyàlà ku ndòndò wa bupolè, kabàyi bamanye cìvwa cyenzèke to.

⁸⁸ Mpindyewu, mu bushùwa bwà bwalu, aci's ncifwànyine kwangata ditùkù dimwè anyi àbidi bwà kupàtula byònsò

abi. Kabàvwa bamanyè to; kàdi twánjààiyibi kukòsoloja ne kulenga myaba minène. Ùvwa n’Nzambi wákayimanyika, bwà kuuja Díyì Dyèndè! Ki Mwanjèlò wákayimanyika nyèyè awu. Banjèlò abu bàakaya ne cingoma cyà dishebeyangana naaci (Cinyi?) bwà kubùtula buloba bujimà, ne Mwanjèlò mukwàbò kwamba ne: “Anji indilaayi kakesè! Kwènji nàнку to, bikèngela tùtwe basadidi bàà Nzambi wetù aba cìtampì pa mpàlà yàbò, dyàmbedi.”

⁸⁹ Aci’s cìvwa ànu dibwayika dyà Mpenta, kale wàwa mu cidimu cyà 1906, 1914, lwà muntwamu. Mbanganyi bàà kunùdi bàdi bamananye nàнку? Kùdikù Mwena mpenta wa cyena kale munda emu, udi muvùlùke matùkù à kale awu kuntu kwaka anyi? Cyà bushùwà. Pàdìbi ne, mu bikondo byà ku cibangidilu abi, pàakabanga ànu Nyumà Mwìmpè kumata ne bantu kubangabò kupeta Nyumà Mwìmpè ne kwakula mu myakulu ne kusambidila babèedi ne bikwàbò, kutwadijabi ànu kwenzeka, anyi ànu lwà pankaci pàà bikondo bibìdi ebi; ànu mwàkapatukabimù, Èkèleeziyà ùvwa mulelèlà. Pashiishe beena Mpenta kubangabo kwenza dìngumba, beena Assemblées de Dieu, ne Église de Dieu, ne bikwàbò, ne kuditwabò mu tusumbù twàbò atu ànu mùdìbo mpindyewu emu. Pa nàнку cidi . . . Tukaadi ku ndekeelu wa cikondo, nudi numòna’s. Byònsò bidìpunga too ne ku ndekeelu, byònsò bìdi bipweka ànu apa buludi too ne ku ndekeelu.

⁹⁰ Mpindyewu, pa yòyì eyi, inaayi ayi. . . Nudi numòna’s, yàkiimana mu—mu ditùkù dyà dikumi ne òmwè dyà ngondo wa kaswàbàngà, pa díbà dikumi ne umwe jaajaja mundaamunya; ngondo wa dikumi ne umwe mu cidimu aci, ditùkù dyà dikumi ne òmwè mu ngondo awu, ne díbà dyà dikumi ne òmwè dyà ditùkù adi. Nudi bavùlùke musangu awu cyàkambà Yesù pa bwalu abu anyi? “Muntu wákaya mu budimi bwà mvinyò bwà kukwàta mudimu mu díbà kampànda, ewu kupeta dyeyà, ne mukwàbò kuyayè,” abu bàvwa beena mudimu bàà ku díbà dyà dikumi ne òmwè. Mmwòmò anyi? S’ki bòbò abu, beena mudimu bàà ku díbà dyà dikumi ne òmwè; bàvwa balamiibwe. Mpindyewu díbà dyàkànyì dyà kubwelabò, ne bàdi munkaci mwà kusangisha beena Yudà abu, bwà kwenza ditùnga kampànda. Bàvwa batangalaja pa buloba bujimà, lwà mu Iran mwàmwa ne mu myaba mishìlèshìlàngàne muvwabo kabàyi nànsha mwà kumanya ne Yesù ùvwa pa buloba to, kabàyi bamanyè kantu nànsha kàmwè pa bwalu bwà Dipungila Dipyadìpyà anyi cintu nànsha cìmwè to.

⁹¹ Nènku mpindyewu nudi mwà kutàngila mu cibèjibeji cyà *Look*, ne *Life* ne bikwàbò, baleeja bimfwanyi byàbò munkaci mwà kupingana. Yesù kàakacyàmbakù ne: “Panwàmòna mucì wa mfigi wèla ntòngà anyi”? Beena Yudà bàtu misangu yònsò ànu mucì wa mfigi. “Lukòngò elu kalwàkupìta to maalù ònsò aa kaayi mùle.” Nènku patùdi twakulangana apa bàkaadi bamanè

kwalukila, bàkaadi ditùngà, bamanè kupeta mfrangà yàbò sungasunga ne dìbèndelà dyàbò sungasunga, ne bikwàbò byònsò, ne ndijingùlùdìibwe ku O.N.U., bàdi ditùnga. Dikaadi dimane kushindama! Dikaadi didìlongolole! Mpindyewu, badìlongòlòle bwà cinyi? Ditwibwà dyà citampì dyà binunu lukàmà ne makumi ànaayi ne binaayi (Mpindyewu, netùkafikè ku cyòci aci mu katanci kakesè emu.) bàà Izàlèlèlà abu; beena Yudà abu, kì mmusùmbà wa mu Wall Street bàtù misangu yònsò biibila ne biiba ne bikwàbò byònsò to, Ndi njinga kwamba beena Yudà balelèlèlà, bakezùke, beena Yudà balelèlèlà bàdi balamè mikenji yà Nzambì kuntu kwàka abu.

⁹² Mpindyewu, beena Yudà balelèlèlà bàdi munkaci mwà kudisangisha cyàkàbidì mu Pàlèstìnà, ne ànu menemene cìvwà mupròfetà mwambè aci; ànu mùvwà Ishàmèlèlà ne Izàkà bàpyàngane mu muminu muntu ne mukwèndè, misangu yònsò balwangana mvità, mbidyànjila kwamba ne nebiikalèku mu ditùkù dyà ndekeelu, kàdi's ki bòbò abu mwaba awu bashikame. Ishàmèlèlà ànu lwà apa, ne lwà mu ntàntà wa kupita misèsù yibìdì ewu kàdi's ki Izàkà ewu, ne bùbìdì bwàbò (Baamùzùlùmanyi ne beena Yudà) balwanganyishangana ewu ne ewu mu buloba bwà kabùyì bwà kampànda to.

⁹³ Mpindyewu bwà kumòna ne Mukenji utùdì naawu ewu mmuswikakane naaci anyi to. Dìbà ànu mene dyàkeelàbo cyàlè bwà ne Izàlèlèlà wàshàadi ditùnga adi, òvwà ndìbà ànu dyòdì òmwèdimwè adi, ditùkù ànu òmwèdimwè adi, ngondo ànu umwèumwè awu, ne bikwàbò byònsò: Mvwa ku Green's Mill, mu Indiana, pàakammwènekèlè Mwanjèlò awu ne kuntuma mu budimi bwà bwambi ne Eci; paanyimà pàà Yèyè mumane kutuutakeena naanyi ku musùlù kwàka ne mungambile cìvwà mwà kwenzeka, pashìishe kuntumayè ne mudimu bidimu dikumi ne cìmwè pashìishe pa dìbà òmwèdimwè dyàkatwàbo cyàlè ne Izàlèlèlà nditùnga adi. Mbiswiikàkàne byònsò pàmwè.

⁹⁴ Nwamònu's, Mwanjèlò wa Mukalenge ùdì pa buloba patùdì twakulangana apa, nwamònu's, Ùdì wenda unyunguluka eku ne eku ulongolola byònsò bwà dilwa dyà Mukalenge. Nènku m'Banjèlò bàmwèbàmwè bààkuumvwa mpèkaatù pàakapwekàbo ku Sodomà ne kusanganabo. . .kwamba ne: "Tudi batùùluke bwà kumòna ne maalu ní àdì nànkù, mutùdì Twètù buumvwe."

⁹⁵ Nudi bavùlùke aci anyi? Ki Mwanjèlò umwèpelè kupwekayè mu. . .(Umwèpelè kushààla ne Abraham Musungula.) Sodomà ùvwa kwìnshì eku, ne Lotà ùvwa mu Sodomà, ne Banjèlò bàbìdì bàakapweka kuntwaku ne kubàyiisha ne kupàtula kasùmbù kakesè, kakesè menemene aku, virgò mukùtākàne. Nwamònu anyi? Èyo. (Kàdi Mwanjèlò umwèpelè awu wàkashààla ne Abraham.) Banjèlò aba bàakayiisha muneemu emu, Billy Graham wa cyena leelù ne bakwàbò, kubàpàtulabò.

96 Kàdi Mwanjèlò uvwa mwimane ne Abraham awu ùvwa mukomè nyimà ku ntentà awu, ki kwambaYè ne: “Abraham, mukàjèèbè Sarah, ùdi penyì?” Mmunyì mwàkamanyàYe ne mukàji awu ùvwa musèdiibwe, yèyè ùvwa musèlàngàne? Ne mmunyì mùvwàYe mufwànyine kumanya ne yèyè ùvwa ne mukàji? Ne mmunyì mùvwàYe mufwànyine kumanya dìnà dyèndè, dyà mukàji ne ùvwa Sarah? Yèyè ne: “Ùdi mu ntentà paanyimà Pèèbè apu.”

97 Yèyè ne: “Èè, mèmè’s ndi mukwenzèle mulayi.” “Mèmè,” nudi numòna ne Mwanjèlò awu ùvwa nganyì anyì, “Ndi mukwenzèle mulayi. Nènkumwènèkèlè mu cikondo cyà mwoyi, Sarah neàpete mwànà ewu.”

98 Nènkum Sarah, mu ntentà paanyimà Pèndè apu, kusekelaye mundamunda. Ki Mwanjèlò awu, ne nyimà Wendè awu mukoma, kwamba ne: “Sarah wàsekì bwà cinyì?” Nudi numòna cimanyinu cyàkapèèshàYe Èkèleeziyà Musungula aci anyì?

99 Nudi numòna cimanyinu cìvwàbo naaci mu Sodomà anyì?

100 S’ki mishindù yènú yisàtù ayi kàbìdì mwaba awu, ntwètù abu baalùkileku buludi cyàkàbìdì.

101 Tudi ne . . . bambi banène bàdì banyùkùshe buloba eku ne eku mwaba awu aba. Paanyimà pàà Billy Graham mumanè kupeta Nyumà Mwímpè, kàvwa mwà kupàtukila *apa* to. Aci’s ki budimi bwèndè lwà *kuntwaku* ne yèyè mmucìmanyè, ne Nzambì ngudi mumulamèku. Nwamònu anyì? Ne diyiiisha dyà mamanya à mu mutù adi, cintu cidìye ùtèèleja mwaba ewu aci, kàdi ùdi uteeta bwà kupàtula mu Sodomà, ùteeta kupatula, anyì kufila ngàsà kùdì virgò mukùtākàne awu. Nwamònu anyì?

102 Kàdi ki Abraham ne kasumbù kèndè aka, ne Yesù wàkamba ne: “Ànu mwàkadibi mu matùkù à Sodomà, ke mwikalabi mu dilwa dyà Mwànà wa muntu.”

103 Nwamònu’s, banjèlò abu nebìikalè pa buloba apa bènza cintu cimwècimwè aci. Nwamònu’s, ki bwà cinyì Billy ùtu uya kùdì ba-Baptistes ne bikwàbò byà mùshindù awu. Bikèngela ànu! Nwamònu’s, Jack Shuler ne bantu bwònsò banène abu—bantu bàà pambèlu pààpa bàba bìikalà mwà . . .benji bàà matàbuluja abu, bikèngela benze nàнку bwalu bàdì—bàdì munkaci mwà kupàtula. Kabààkènzaku bishimà kuntwaku to; ànu ndambù nàka, bu mùdì kutuuta bantu ne bufofo. Kàdi kuyiisha kwà Èvànjeeiyò kùdì kubàtuuta bufofo, nwamònu’s, ki mùdì Bible wàmba’s.

104 Kàdi mukwètù udi pambèlu *apa* ewu mmwenze cimanyinu eci, cimanyinu citàmbe-mfùkìlu, kùdì Abraham ne musumbà wèndè, ùdi mwikale Èkèleeziyà—Musungula awu.

105 Mpindyewu, mu cidimu cyà 1914, buloba bwàkadìtwà mu mvità, kàdi kubangila ànu kwìnè aku kabàtukù banji kupeta ditalala to; ku musangu ne ku musangu bààbùndulangana,

bààbùndulangana, bààbùndulangana, nènku bàdi munkaci mwà kwenza cintu ànu cìmwècìmwè aci kàbìdì. Kàdi cìvwàbo benza ncinyi? “Bakwàte!” Éyì Nzambi wa yààyà, wáfwakù luse’s wè! Bakwàte cintu cinène cìmvwà mumòne mu cikèènà-kumòna aci (cintu cyònsò mu kaabujimà cìvwa cìfika ku kabùtù), bakwàte bukolè bwà bômbè, bakwàte mvità bwà kabàlù kudìbutula bôbò biine too ne mwàlwà cintu kubàbutula; too ne pààpingana Izàlèèlà ne pààdisangishaye kaaba kàmwè, ne pashìishe Mukenji newùye kùdì Izàlèèlà ne yèyè neàtwibwe Cìtampì cyà Nyumà Mwímpè aci. Nwamònu’s, paanyimà pàà bàà Bisàmbà byà bendè bamanè kubìikidiibwa bwà kupàtuka; bantu nebàbìikidiibwè bwà kupàtuka bwà bwalu bwà dìnà Dyèndè, bàdi babìikidiibwe ànu *mwab’ewu* mu cikondo eci. Dìbà adi ànu Izàlèèlà ngudi wakidila Mukenji wà bidimu bìsàtu ne ngondo yìsambòmbò.

¹⁰⁶ Danyèlè ngwákamba nàнку, mmwambè ne nekwikalè, kùvwa mwà kwikalakù, kùvwa makumi mwandamutekète, hé, anyì, anyì, “bidimu mwandamutekète byamba mu cipròfetà bwàbò bôbò, bishààle kàbìdì bwà lupàndu bwà beena Yudà.” Yèyè ne: “Maasiyà, Mfùmù awu, udi Kìlistò awu, neàlwe ne ambe cipròfetà munkaci mwà bidimu makumi mwandamutekète abi. . . anyì bidimu mwandamutekète, Yèyè neùmushiibwè.” Yesù wàkayiisha bidimu bìsàtu ne cyàbìbìdì cìmwè kàdi kuumushiibwa, ne mulàmbù wa bwàcyàbwàcyà wàkambà Danyèlè awu wàkuumushiibwa. Éyo.

¹⁰⁷ Nènku pashìishe kuvwa mpùngà wakafidiibwa dìbà adi bwà bàà Bisàmbà byà bendè, e kupwekàbo too ne ku cikondo eci. Pashìishe nkushààle bidimu bìsàtù ne citùpà bwà beena Yudà. Mpindyewu twètù bayè ku Bwàkabuulwibwà 1, netwàngacilè ànu menemene ku ndekeelu (Èkèleeziyà kèna ùmwènaka too ne ku nshapità wa 19 wa Bwàkabuulwibwà to.), kàdi ndekeelu wa cyòcì aci, Eliyà ne Mòsà bàdi bààlukila cyàkàbìdì ne bayiisha beena Yudà. Bantu bàbìdì balaabiibwe ne Nyumà awu, anyì pàmwàpa bôbò abu nkààyaabò, kabàvwakù bafwè to. Ki bàbàshebeya ne bàshààla balàadika mu mùsèèsù wùdìbo bàbìikila ne *Sodomà* mwàkapoopediibwa Mukalenge wetù pa nkùrusè amu, “Yèlusàlèmà.” Nènku paanyimà pàà matùkù àsàtù, mòna’s, mwoyi (Nyumà wa Mwoyi) kubwela munda mwàbò ne bôbò kujyuuka, kubìikabo. Nènku dìbà adi pàmwè ne cyàbìsàtù cyà buloba cìvwa cisùnsula tupesetupese pa dìbà adi mene. Bààkenza bishimà ne bimanyinu kùdì beena Yudà.

¹⁰⁸ Mpindyewu ki beena Yudà bàlwalwàbo bwà kuyiisha mbôbò abu’s. Bàà pa buloba. . . kabèèna mwà. . . kabèènaku mwà kutaayishangana bàmwè ne bakwàbò anyì kushipangana bàmwè ne bakwàbò, anyì dibùtudiibwa kulwadi, pàdì beena Yudà abu kabàyi baalùkile pa kiinè kaaba aku to; ki Bible ewu ewu apa wàmba nàнку, wàkamòna Banjèlò bànaayi abu. Kàdi tàngilàayi nùmonè cidì cikèngelà kupetabò; bikèngela bàpetè Nyumà Mwímpè ànu mwàkamupetàbo amu.

109 Piikalabi ne Muntu uvwa ne kalòndò kàà máyì à mufúndi awu úvwà Nyumà Mwímpè, (Tudi bamanyè aci, bantu bwònsò, bàtu bàbala Bible.) èè, nànkù nyèyè Mwanjèlò umweumwe awu ulwàlwa kàbìdì ne Nyumà Mwímpè: “cìtampì cyà Nzambì udi ne mwoyi.” Efèsò 4:30: “. . .Nyumà Mwímpè wa Nzambì. . . batwìbwe cìtampì too ne ku ditùkù dyà bupìkudi bwènù.”

110 Ne kabèna mwà kwenza cintu nànsha cìmwè mpindyewu pàdì beena Yudà abu kabàyi bapingàne to. Nènku kùdì ànu ndambù wa mbingu nàka bààkatèeka cintu cyònsò mu kaabujimà pàmwè ne kubwelabo mu O.N.U. Cìkaadi tàyàdì's wè! Tukàadi ku ndekeelu, byònsò mbitwìbwe cìtampì mpindyewu.

111 Mpindyewu, mpindyewu tàngilàayi, bwà kujaadika ne mbeena Yudà, mpindyewu, nêngàngatè kùdì:

Wamba ne: Kanwenzedi buloba bibi to, anyi mbú, anyi dìnà mucì, too ne patwatwà basadidi bàà Nzambì wetù cìtampì pa mpàlà yàbò.

112 Mpindyewu, bwà kujaadika ne dibuulula edi ndyà cyà bushùwà, tàngilàayi eci, mvensà mwi4:

Ki mémè kuumvwa búngì bwà aba. . .bààkatwìbwà cìtampì: ne bààkatwìbwà cìtampì binunu lukàmà ne makùmi ànaayi ne binaayi bàà bisàmbà byònsò byà bânà bàà Izàlèlèlè.

113 “Beena Izàlèlèlè.” Bàdì penyì? Bàdì ànu mpindyewu badisangishe. Bàdì kuntu kwàka badìlongòlòle, bindìle bwà cikondo cyà ditwìbwà dyà cìtampì cìlwe. “Bàà cisàmbà cyà Yudà bààkatwìbwà cìtampì binunu dikùmi ne bibìdì. Cisàmbà cyà Luubènà, binunu dikùmi ne bibìdì. Cisàmbà cyà Gaadà, binunu dikùmi ne bibìdì. Azèèlè, binunu dikùmi ne bibìdì. Nefàtálmà, binunu dikùmi ne bibìdì.” Ànu nànkù ànu nànkù, Simeònà ne kaa, kùdì. . . ànu nànkù too ne ku Benyàminà, bisàmbà dikùmi ne bibìdì abi. Ne dikùmi ne ìbìdì kuvudija ku dikùmi ne ìbìdì bìdì byenza binunu lukàmà ne makùmi ànaayi ne binaayi. Nwamònu anyi? Mpindyewu ki cyòcì aci. . .

114 Mpindyewu nwènù batàngile mu nshapità wa 14, katanci kakesè cyanàànà, mwab'ewu nudi numòna ne:

Ki mémè kutàngila, ne mònaayi, Mwànà wa mùkòòkò úvwa mwimàne pa. . . mukùnà wa Sinàayi, mwikàle ne binunu lukàmà ne makùmi ànaayi ne binaayi, biikàle ne dìnà dyà Taatù wendè difúnda pa mpàlà yàbò.

115 “Mukùnà wa Sinàayi.” Mwànà wa mùkòòkò úkaavwa mwalùkile úfùmina mu Dyambwìbwa. Ne mwalùkile, mutwàkangata dilòdòlò adi amu, ànu mwàkatangalaja Yòzefù bàà Bisàmbà byònsò pààkatwìlanganaye ne bânà bààbò, kwambayè ne “Mmémè Yòzefù, mwanèènù!” Ki dìbà adi kukwàcìkabo bwòwà.

116 Nudi bavùlùke mu cikondo cyà èkèleeziyà mwaba utwàkacimòna awu, pàvwàYe mwà kwalukila apu anyi? Nànsha mene aba bààkatùbululà byanza Byèndè abu, ne nebàmbè ne: “Udi mupetè bibangu byà mpùtā yà misonso abi penyì?”

117 KwambaYe ne: “Ku byanza byà balunda Bàànyi.” Nènku kukùtulabo myadi. Ne dīkū ne dīkū dyònsò ditàpuluke edi pabwàdi edi pabwàdi, ne bààkadila myadi ne kudila myadi ne kudila myadi, bwalu bàvwa benzè bubì ebu. Maasiyà wabò mwinè, Nzambi mwinè awu. Nènku Yèyè neabàmbilè ànu menemene mwàkambilàYe kùdi—kùdi. . . Yòzefù kwambilaye Izàlèèlà, yèyè ne: “Kanùdifīkidi munda to, bwalu Nzambi mmwenze cyòci eci bwà kusungidila mwoyi.”

118 “Nènku Nzambi. . .” Bible ngudi mwambe ne “Nzambi wàkafofomija mèsù à beena Yudà bwà bàà Bisàmbà byà bendè bààmònakù mwà kupeta mpùngà (twètù’s, twètù biinè), bwà kwangata cisàmbà bwà Dīnà Dyèndè, Mukaj’Èndè-musèla mu bàà Bisàmbà byà bendè.” Kaa, mbilenga be! Ki mmwòmò anyi? S’ki bwalu mbwòbù abu.

119 Ki lukàmà lwènù ne makumi ànaayi ne. . . Mpindyewu nwènù baswè kumòna Mukàji-musèla ùdi ùseemena paanyimà pàà cyòci aci, bwà kuleeja ne binunu lukàmà ne makumi ànaayi ne bīnaayi kī m’Mukàji-musèla to, tūngunuka wèwè ànu ne kubala mpindyewu kubangila ku nshapitā wa 8; anyi, èyowà, nshapitā wa 8; anyi mvensā wa 8, mūndi muswè kwamba, mu nshapitā wa 7. Tūbangilāāyi ku mvensā wa 9—wa 9, bwalu mvensā wa 8—wa 8 ki ditwibwā dyā cītampi dyā Benyāmīnā, binunu dikūmi ne bibīdi abi.

Paanyimà pàà—Paanyimà pàà cyòci eci ngàkatàngila, ne, mònaayi, musùmbà munène, uwva muntu nànsha umwe kàyi mufwànyīne kubala to, (Ki Mukàji-musèla ulwàlwà ewu.) bàà matùnga ónsò, . . . bifuku, . . . bisàmbà, ne myakulu, biimàne kumpàlà kwà nkwasā wa butùmbi, ne kumpàlà kwà Mwànā wa mùkòòkò, bavwàle mizàbì mitòòke, ne malala à mabwà mu byanza byàbò;

Ne bààkeela lubilā lwà dīyi dikolè, bàmba ne: Lupàndù kùdi Nzambi wetù udi musòmbe pa nkwasā wa butùmbi, ne kùdi Mwànā wa mùkòòkò.

. . . banjèlò bónsò bààkiimana pabwīpì ne mu nyūngulukilu wa nkwasā wa butùmbi, ne pabwīpì ne bakùlù ne bifukūbwa bīnaayi abi, . . . kutwā mpàla panshì—kutwā mpàla panshì kumpàlà kwà nkwasā wa butùmbi, ne kukuukwīlabò Nzambi,

Bàmba ne: Amen: Mabènesha, . . . butùmbi, . . . lungènyi, . . . disàkidila, . . . luumù, . . . bukolè, . . . ngulu, bìkalè kùdi Nzambi wetù kashidi ne kashidi. Amen.

Ki umwe wa ku bakùlù wàkandamuna, ne kungambilaye ne: Aba mbanganyi bàdi bavwádika mizàbì mitòòke aba? ne bàdi bàfùmìna penyì?

Ki mèmè kumwambila ne: Mukalenge, wèwè's udi mumanyè. Ki kungambilayè ne: Aba mbàdi bafùmìne mu dikènga dinène, ne basukùle mizàbì yàbò, ne bayitòòkèshe mu mashi à Mwànà wa mùkòòkò.

Ki bwà cinyi bàdi kumpàlà kwà nkwasà wa butùmbi wa Nzambi, ne bà mukwàcila mudimu muunya ne bufùkù mu ntempèlù: . . .

[Katùpà kàà mukàbà wa mèyì munda mutupù—Muf.]
Nwamònu anyì?

¹²⁰ Mukàjèèbè ùtu wenza cinyi? Ùtu ùkukwàcila mudimu mu nzùbu. Wèwè udi musòmbe, ùdi ùkupa cyàkudyà cyèbè, ùlongolola bilàmbà. Wamònu's, yèyè ùdi ùkukwàcila mudimu muunya ne bufùkù mu nzùbu. Nwamònu anyì? Nènku ewu nùnkù, aba bàà mu matùnga ónsò, bàà Bisàmbà byà bendè, bàdi Mukàji-musèla abu, bàdi bàsanganyiibwa kumpàlà kwà nkwasà wa butùmbi wa Nzambi, pàmwè Nendè muunya ne bufùkù. Nudi bwónsò bavùlùke citùvwà bambe, makèèlèlè dilòòlò awu ne baakùle pa bwalu abu anyì?

. . .ne ewu udi musòmbe pa nkwasà wa butùmbi neàsòmbele munkaci mwàbò.

Kabààkwikala kàbìdì ne nzala to, anyì kabààkwikala kàbìdì ne nyòòtà to; nànsha díbà kadyàkubakenkeshila—kubàkenkeshila, anyì kakwàkwikala luuya to.

Bwalu Mwànà wa mùkòòkò udi munkaci mwà nkwasà wa butùmbi awu neàbàdìshè, ne . . . àbàlombòlè mu mpokolo yà màyì àdì ne mwoyi: ne Nzambi neàkùpulè . . . binsònjì byónsò ku mèsù kwàbò.

¹²¹ Mpindyewu, ki binunu byènu lukàmà ne makumi ànaayi ne binaayi mbyòbì abi (Izàlèlèlè) bàdi bindìle dilwa dyà Mukalenge ne bàdi kabàyi mwà kubwela pàdiku kakùyì kwanji kujika bwà bàà Bisàmbà byà bendè to, bikèngela kwanji kujika.

¹²² Mpindyewu, ndi mufwànyìne kwamba ànu kaacintu kakesè kàànyì kàà sungasunga, mùndì ntèkemena, mutwìshìibwe ne nenùkùmvwè. Pàvwà Lewi Pethrus wa mu Stockholm, mu Suède mwàmwa, mutàngidi wa bwónsò, mfùmù wa èkèleeziyà yà mu Philadelphie ayi, wàkatumina beena Yudà aba mùliyò mujimà wà Bible, tuuMapungila. Ndi ne kàmwè kàà ku tótò kuntu kwaka, civùlukilu cikesè cyà kùdiye. Beena Yudà misangu yónsò bàtu babala lwànyimà batàngije kumpàlà, kàdi's nudi bamanye muyààkwikala wàbò—wàbò mwakulu's. Nènku bàvwa mwà kubala Mikàndà eyi, nènku bàvwa bàmba ne: “Èè, piikalàbì ne Yesù ewu ki Maasiyà, ne Yèyè mmufwè ne Nyumà Wendè

mmwalùkile mu mmwènekulu wa Nyumà, Enzebi cimanyinu cyà mupròfetà tumònebi's, dîbà adi netùMwitàbùùjè.”

123 Ncyalu kaayi cipwàngàne cilongolola's wè! Mémè kudyàmbidila ne: “Mukalenge, s'ki dîbà ndyòdi edi mpindyewu. Mpindyewu ki dîbà ndyòdi edi, s'ki dyòdi edi.” Nànku ki mémè uyàaya mu ndekè ewu, Billy, ne mémè, ne Loyce, ki twètù kukwàta njila kuya.

124 Mwva ngenda nya mu Inde, ki mémè kwamba ne: “Mpindyewu, mu dyalukila, nëndifindè mwab'ewu mene ne nëntwàdilè beena Yudà Mukenji, nènku mbapàtule mwaba awu ngamba ne: ‘Ncyà bushùwà anyi?’”

125 Beena Yudà bàtu misangu yònsò ànu biitabuuja bapròfetà bààbò, twètù bwònsò tudi bamanyè aci. Bwalu Nzambi wàkabàmbila ne Maasiyà neikalè mupròfetà, ne bôbò bàtu biitabuuja ànu bapròfetà bààbò, ne Nzambi wàkamba ne: “Kwòkò kwikale munkaci mwènù muntu udi mupròfetà, mwena lumònò, ne piikalaye. . . Nényiikile nendè mu bikèèna-kumòna ne bikwàbò. Nènku—nènku cidiyè wamba cyòci cyenzèke, dîbà adi nùmutèèlejaayi, bwalu Ndi nendè.” Nwamònu anyi? “Kàdi cyòci kaciyi cyenzèke to, dîbà adi kanùcyùku mupròfetà awu to, bwalu Mémè—Mémè—Mémè ncyèna nendè to. Kàdi cyòci cyenzèke bulelèlè, cidiyè wamba aci, dîbà adi nùmutèèlejaayi, bwalu Ndi nendè.” Ne beena Yudà mbamanyè aci.

126 Ki mémè kudyàmbidila ne: “Kaa, ekèlekèle! Ki ncifwànyineku kwikala cilenga cyà dikèma anyi! Nèmbàpetè ànu batwè ku binunu binaayi anyi bitaanu biimàne kwàka, ne kubàlekela—kubàlekela ànu bàbala Bible awu ne bàmba ne: ‘Piikalabi ne ewu m'Maasiyà, tùMumònebi wenza cimanyinu cyà mupròfetà.’” Mémè ne: “Aci neciikalè cyalu kaayi cilongolola's wè!” Nkaavwa ne tikè wanyì mu cianza, ànu bu tusunsa makumi àsàtù kumpalà kwà dîbà dyà kubiikidiibwa ku mulongo wà ndekè wa ba-Arabes awu. Pa nànku mwva mwimane mu Caire amu, mu Ejiipitu, ki mémè kudyàmbidila ne: “Nzambi àtumbè! Mu mèbà makwàbò àbìdi beena Yudà nebààpetè cintu cimwècimwè cyàkapetàbo ku Mpenta aci, cyà bushùwà menemene.” Mémè kudyàmbidila ne: “Bu mémè mwà kwimana mwaba awu mwikàle mwà kubàmbila ne: ‘Ndàayi nudyàngacilè musumbà wa bantu munkaci mwènù ànu, ne nulwe naabò mwab'ewu, bwà numòne ne Yèyè ní ùcidi anyi Maasiyà.’ Nwamònu's, ne pashiishe nêngàmbè ne: ‘Mpindyewu, pa buloba bùmwebùmwe bwàkabèngelà bankambwa bèènù Maasiyà ewu abu, nudi nuMwakidila, elàayi byanza muulu nènku nenù—nenùpetè Nyumà Mwimpè mpindyewu mene.’ Nènku nebàtangadike èvànjeeliyò pa buloba mu citùpà cyàbò cyà buloba pàdìbo ànu. . . pààMupetàbo. Angataayi balombodi, kanùyì. . . Kulenga ànu mutù mupungilà-makunyi, balombodi abu, kubalekela bàtwàdija naaci.”

127 Ki Cintu kampànda kundenga e kwambaci ne: “Kùyi mpindyewu to, bwalu díbà kí ndyanji kukumbàna to.” Uh-hum. Bàà Bisàmbà byà bendè kí mbanji kuula to, nwamònu’s, ditùkù kí ndijikè to.

“Kaa,” mûngàakadyàmbidilà, “aci’s cívwa ànu mmèmè.”

128 Ki mèmè kubangulula, kàdi’s ki mèmè kutamba kudyumvwa bibì mu mùshindù wà ne ncívwa ànu mwà kucítwàla to. Ki mèmè kupàtuka kuya paanyimà pàà citanda ne kwinyika mutù wànyì, kwamba ne: “Taatù, ng’Wèwè udi munkaci mwà kwakulangana naanyì anyi?”

129 Yèyè ne: “Kùyi mu Izalèlèlà mpindyewu to, díbà kí ndyanji kukumbàna to.” Mèmè kubwela, kushintulula ànu tiké wanyi, kumushintulula disangu cyàkàbìdì, kuya ku mukwàbò njila. Nwamònu’s, bwalu díbà kí ndyanji kukumbàna to.

130 Kàdi dìmwè dyà ku matùkù àdi pansii aa Mukenji newùye kùdi Izalèlèlà, ne cyàbwayikà. . . Nzambi neàbàtùminè Mòsà ne Eliyà, mu Bwàkabuulwibwà 11, ne nebènzè bimanyinu ne maalu à kukèma ne cimanyinu cyà Yèhowàh; piikalà bwà bàà Bisàmbà byà bendè bujikè apu, ngàsà wa . . . ditùkù dyà ngàsà nedyùmukè mu èkèleeziyà wa bàà Bisàmbà byà bendè, cikondo cyà beena Mpenta necipitè. Màngumba neàtúngunuke bwalu àdi ajuukila apa pàmwè ne virgò mukùtàkàne awu (Netùbwele mu cyòci aci ànu mu katanci kakesè cyanààna.), kàdi bòbò nebàjuuke mu kiinè kasumbù aku.

131 Kàdi pashiishe pàdìbo bènza nàнку, pàdìbo bènza nàнку apu, beena Yudà nebàpetè dibàtiiza dyà Nyumà Mwimpè nènku nekwikale ditàbuluja kuntwaku diikalà mwà kwimanyika maulu mu matùkù à ne: “Mvùla kàlòku nànsha!” Nebènzè bimanyinu byà mishindù yònsò ne bishimà. Ki ndekeelu wa byònsò balombodi bàà cyena Loomò. . . Beena Yudà mbàdi ne mabanji à buloba bujimà, ne—ne pa nàнку Èkèleeziyà wa Kàtòlikè wa cyena Loomò neàkosè dyumvwangana dyèndè ne beena Yudà paanyimà pàà cintu eci cimanè kujika ne pashiishe nekwikale. . . (ndòndò uvwabo bàtwè pankaci pààbò awu), yèyè neàye kuntwaku, ne pashiishe ki piìmanà Nzambi bu mwàkiìmanàYe mu—mu matùkù à kale amu, ne kulwangena Izalèlèlà mvità. Ndekeelu wa byònsò nebàshebeye baprófetà bàbìdì aba, ne nebàshaalè balààdika mu mùsèèsù, bàbàtwila matè.

132 Ànu mwàkenzàbo mwambi wa beena Mpenta ewu ne mukàjèndè ne bàna mwab’ewu kukaadi ndambù wa mbingu lwà kuntweku, ne kadifù kakesè kàà bàna, kùlaku bunène *ebu*, bàpicilapù ne bàbàtwila matè, bàbàshiya balààdika mwaba awu mu muunya mukolè munda mwà matùkù àsàtù tàà ànaayi kabàyi bàbàjiika nànsha.

133 Nebènzè cintu cimwècimwè aci! Bible ngudi mwambe nàнку! Nebènzè cintu cimwècimwè aci ànu mwaba awu mene.

Nènku pènzàbo nàнку, paanyimà pàà matùkù àsàtù, balàadika mwaba awu bafwè, Nyumà wa Mwoyi neàbwelè mu baprófeta bàbìdì abu ne nebàbiikè ne nebàbandè mu Butùmbi. Nènku, lwà pa cikondo aci, ki pààbanga bingoma byà tupyà. Ki cikondo cyà nshìikidilu aci's. Ki pìikala bwèndè bwalu butùuke's.

¹³⁴ Kàdi kumpàlà kwà aci kwenzekaci, Mukàji-musèla wa bàà Bisàmbà byà bendè, musungula . . . Nekwikale bààbúngì bèènù basòmbe ku mèèsà, òimwè dyà ku maadindà aa, umwe neàngaciibwe, mukwàbò mushiya. Ndekeelu wa byònsò nèukonke ne: “Bwalu bùdi cinyi's?” Mwikale wendesha màshinyi, uyiikilangana ne muntu kampànda, mukàjèèbè anyi bayebè musòmbe mu nkwasu amu; kaciyi wàndamuna, kaciyipù. Wèwè neùnyeemenè mu nkita, nekwikale yimwè nkita mikanguke, mukwàbò kacya ànu mikanga ne: “Bwalu bafwè bakwàbò kabààkiikala ne mwoyi to munda mwà bidimu cinunu.” Nwavùlukaayi ànu ne, dîbà adi's nkujike!

¹³⁵ Neciikalè dilwa dyà mu musokoko, muntu nànsha umwe kàadyàkumanyaku ne necyènzekè dîbà kaayi to. Mbatùtùmine dîyi bwà kwikala badilongolole ne kutàbàle. Katwèna bamanye ne ndîbà kaayi to. Kàdi, cyònsò cìdiku aci, katwàkupangishaku nànsha umwe wa ku bàdi *apa* aba to; bwalu, pàdi ànu Yesù ùmwènèka, bilù byònsò bìdi bijuuka. Bafwè anyi bàà mwoyi, kî mbwalu to!

¹³⁶ Katwèna—katwèna tutwilangana Nendè dyàmbedi to, tudi tutwilangana muntu ne mukwèndè dyàmbedi. Bible mmwambè, Efèsò, nshapità mwi5, mMwambè ne: “Bwalu twètù bàdi ne mwoyi ne bashààle too ne ku dilwa dyà Mukalenge, panshi apa, katwàkupangisha anyi kucyàmakana aba bàdi balààle to.” Bàà mushinga mukolè bààkatwà cìtampi cyà mashi àbò . . . bààkatwà cìtampi ku bujaadiki bwàbò ne mashi àbò abu. “Katwàkupangisha anyi kucyàmakana aba bàdi balààle tulu to, bwalu mpungi neàdilè.” Cintu kampànda necyènzekè: “Èvànjeeliyò *cintu kampànda* neàdilè,” dimanyisha dyà dilwa Dyèndè. “Ne bafwè mu Kilstò nebàbiikè dyàmbedi. Ne twètù bàdi ne mwoyi ne bashààle netùshintulukè.” Biimane, ne tumvwa mùlwalwà dishintuluka adi: nsuki yà mvyà yùmuka, minyèngù yijimina, netùshintuluke mu katanci, mu mubùnyì wà dîsù. Nènku netùtwillangane ne bananga bèètù dyàmbedi ne: “Maman nyèyè wàwa, Papa, mulundà wanyì nyèyè wàwa. Kaa, Àlèluuyàh, tudi badilongòlòle! Ne pashìishe, bwònsò pàmwè ne bàvwà bafwè,” mwàmbambà Mifundu, “netwàngaciibwe muulu mu mpeepèle bwà kutuutakeena ne Mukalenge.” Bulondyanganyi bwà Dilwa.

¹³⁷ Kaa, kumòna papa wanyì mukùlàkàji awu! Kaa, ekèlekèle! Kumòna bananga bàà kale bààkapweka mu Diitabuuja mwàmwa abu, bwà kutuutakeena naabò. Nudi numòna kalolo kàà Nzambì, mumanyè ne bu twètù mwà kutuutakeena Nendè dyàmbedi tudi bafwànyine kudikonka ne: “Maman ùvwamu

anyi? Ndekeelu wa byônsò Maman mmufikeku—mmufikekù pëndè anyi? Tudi bayiishè bikolè ne mwètù mwônsò, tudì—tudi bateetè. Ûvwamù anyi? Manseba Joe udi apa anyi? Mwanèètù awu ùdi—ùdi kaaba aka anyi? *Kampànda* ùdimù anyi?” Nwamònu anyi? “Mukalenge, tudì baKunangè, tudì baKunangè, kàdi. . .” Dyàmbedi netùtwilangane muntu ne mukwèndè! Kaa—kaa—kaa! Kakwèna cyàdikonka to, tudimù bwônsò.

¹³⁸ Kabyèna bikèmesha to pààkiimanàbo kwamba ne: “Amen, butùmbi, ne lungènyi, ne luumù, ne bukolè, ne ngulu.”

¹³⁹ Bakùlù makùmi àbìdì ne bànaayi bààkatùùla bifulu byàbò byà butùmbi ne bààkapòna panshì mùshindù awu, bwônsò bwàbò bààkalààla panshì ne kuMukuukwila.

¹⁴⁰ Dìmwè dyà ku matùkù àdì panshì aa netwimanè dyàmwàmwà dyà buloba, kwàka nàka, pa mubàngubangu wà cijèngù cyà buloba, mwàmwa mu mwaba kampànda mu cibwàshìbwàshì; ne katwàkwikala banjì kufika mu Dyulu to, netwàngaciibwè muulu bwà katwilangana Nèdè mu mpeepèlè.

¹⁴¹ Pàkangata Leebèkà dipàngadika, ne lukàsà lwônsò, kupàngadika bwà ne ùvwa mwà kuya ne Eliyèzà pa kaameelu bwà kutuutakeena ne Yakòbò. . . anyi kutuutakeena ne Izàkà yèyè uvwa ne cyà kwikala bayèndè awu, kàvwaku mwanjì kumumòna to, mumanyè ne Nzambi nguvwa umulombola. Mwànà wa Yakòbò, anyi. . . Izàkà ùvwa ùsanganyibwa mu njila mupàtùke muyè mu budimi mu citaleela cyà dilòlò. Vùlukàayi ne, pàvwa pa dībà dyà dilòlò. Ki Leebèka ewu uvwa wendela pa kaameelu. Eliyèzà kwambaye ne: “Nyèyè ulwàlwa wàwa mpindyewu.” Ki Leebèkà kutùpikayè pa kaameelu, kuvùùlayè cibwikilu kwìsù. Kacya kavwa mwanjì kumumònaku to. Kàvwa mumanyè ne. . . Yèyè awu ke uvwa bayèndè, kàdi kàvwaku mwanjì kumumòna to. Ûvwa ùkatwilangana nèdè ku diitabuujà. (Ncyèna mumanyè mpàla wende to, kàdi, kaa, pàNgààmumònà!) Kuntwaku mmwenze ànu umumòna, cyà pa mwoyi kumwaba ne dinanga ku dimumòna dyà kumpàlà adi. Nènku yèyè pèndè kacya kàvwaku mwanjì kumòna mukàjì awu to, ki kumumònaye, cyà pa mwoyi kumwaba ne dinanga ànu ku dimumòna dyà kumpàlà adi. Nènku ki bòbò bàlwalwà bwà kutwilangana ewu ne ewu mu madimi aba. Ki kumubwejayè mu bukalenge bwà tatwèndè amu ne kumusèlayè.

¹⁴² Ke mùshindù wàmwbwibwa Èkèleeziyà mu mpeepèlè awu, munkacì mwà mpeepèlè, ne kutuutakeena ne Mukalenge mu njila Wènda ùpweka. Kaa, cimbu’s necifwe, cyà pa mwoyi cyàba ne dinanga ku dimòna dyà kumpàlà adi’s! Nènku patwimanyina mwaba awu pa mibàngubangu yà cijèngù cyà buloba ebw twimba misambu yà bupikudi ayi, kaa, ekelekèlè! Mùshindù mwine utwimba ne tuMutùmbisha bwà bwètù. . . bwà ngàsà mupikudi wàkatupèèshaYe. Pàbwikidija Banjèlò nseke yà—yà cijèngù cyà

buloba ne mitù yàbò minyika, kabàyi bamanyè citùdì twamba aci. Banjèlò kàbavwa bajìmineku to, kí mbamanyè ne kwikala musùngìdìibwe ncinyi to. Twètù ki bàvwà bajìmine, ànu twètù aba. Netùmvwè díbà adi ne ncintu cibi be cívwa citèèka kumpàlà kwètù, kadi Yèyè kutùpikula ku Mashi Èndè, mu cifuku cyònsò, mwakulu, ne ditùnga dyònsò. Nditùkù kaayi dyà dicyònkomoka diikalàci's wè!

143 Ntu munange musambu awu, ùdì mwambe ne:

Nekwikale disangila mu mpeepèlè,
 Mu lutùùlù, lutùùlu àbìdì àdì panshi aa;
 Nèntwilanganè neebè ne nkusekèlèlè kwòkò
 aku
 Mu nzùbu awu dyàmwàmwà dyà dyulu;
 Ngimbilù utukù kàyì mwànji kuumvwa, kàyì
 mwanji kuumvwa kùdì maci à cifwàkà to,
 Neciikalè cyà butùmbi, mùndì ngàmba
 patòòke's!
 Piikala Mwànà wa Nzambi Sungasunga, Yèyè
 ke wíkala mulombodi Awu
 Mu disangila dyà mu mpeepèlè adi. (Kaa!)

Nwakuumvwa bàmba bwà Mòsà mwànà mu
 malèngà,
 Nwakuumvwa bàmba bwà Davidi wa kàyì
 bwòwà ne ndundu wendè wa nyuunyi awu;
 Nwakuumvwa balonda bwalu bwà Yòzefù
 mwena ndòòtà,
 Ne bwà Danyèlè ne nyama yà ntambwe butùtù
 twimba misangu yàbùngì.
 Kaa, kàdì kùdì bakwàbò bààbùngì, bààbùngì
 mu Bible,
 Ne ndi njinga kutwilangana naabo bwònsò, ndi
 ngamba patòòke! (Ncyà bushùwà!)

Kàdì ndisànkà kaayi patwàtwilangana naabo
 Mu disangila dyà mu mpeepèlè adi. (Tudi
 bindile diine ditùkù adi!)

144 Ki binunu byènu lukàmà ne makumi ànaayi ne binaayi bilwalwà abi, byàkidilà Èvànjeeliyò paanyimà pàà twètù . . . kabèèna mwà kuMwakidila musangu wùmvwèwùmvwè wùdì Bukènkè pa bàà Bisàmbà byà bendè to. Beena Yudà bàdì munkaci mwà kuMuvila ne kuMusokoka. Mpindyewu, pàdì Bukènkè . . . bàà Bisàmbà byà bendè bambwibwa, díbà adi Nyumà ùdì ùlwa pa bàbìdì abu bwà kubàpèèsha bujaadiki, díbà adi beena Yudà bàdì bàMwakidila, bàdì binunu lukàmà ne makùmi ànaayi ne binaayi byà bisàmbà bijimine byà Izalèlèlà nebààkidilè Èvànjeeliyò; nènku Mukàjì-musèla mmmwabwibwe.

145 Mpindyewu, kùdì “virgò dikumi.” Tùbùndulàayi Maatàayi 21, dyàkàmwè. Nwamònu's, tucidi ànu ne ndambù wa díbà. Kaa,

mémè ndi munange Bible.

Pângààngata diikisha dyànyì mu Dyulu,
Neciikale Iwendu lulenga kaayipu's wè;
Kutèeleja bibilù byà mijiki kùdì kòralè wà mu
Dyulu,
Ne biibi byà wànyì...nêmmonè mpàla wa
Musùngidi wanyì;
Musòmbèle ku mwelelu wà musùlu,
Mwinshi mwà mucì wà mubìshi kashidi,
Ndi muswè kupìcishilakù diikisha dyànyì mu
Dyulu,
Kwèna muswè kulwa bwà kupicishila dyèbè
adi pàmwè naanyì anyì?

¹⁴⁶ Mpindyewu, mu—mu Mukàndà wa—wa Maatààyi Munsantu, ngeela meeji ku nshapità wa 25, ngeela meeji. Ndi mwambè ne 21, kî mmwômò anyì? Mvwa mucifunde mwab'ewu mu 21, kàdi aci's ncyà pàtupù. N'ku 25. Bivwa bikèngela bwà mémè kulwijakaja mu dindà emu, mvwa...mvwa mubiike mucyòke, ne pashiishe ne—ne mvwa—mvwa munkaci mwà kulwijakaja. Mvwa munkaci mwà kufùnda Mifùndu kampànda, kî mémè kufùnda 21 pèndè mwikale—mwikale 25.

Dibà adi bukalenge bwà mu dyulu nebwikale bu virgò dikùmi, bààkangatà mîndà yàbò, ne kuyabo bwà kutuutakeena ne mubàki.

¹⁴⁷ Mpindyewu:

Kàdi yìtaanu yà ku yòyi yìvwà yà lungenyi, ne yìtaanu yìvwà mikùtākàne.

Nènku eyi yìvwà mikùtākàne ayi yàkangata myèndù yààyi, kàdi kayààkangata maanyì to:

Kàdi yà lungenyi yàkangata maanyì mu mpanza yààyi ne myèndù yààyi.

Pàcìvwà mubàki ùnèngakana (aci's mmunda mwà bikondo byà èkèleeziyà ebi), yòyi...kubùngila ne kulààla tulù.

¹⁴⁸ Mu bikondo byònsò amu, bwònsò kufwàbo, kubùngilabo ne kulààla tulù, nwamònu's, bu mùvwàbo bènda bàya mu bikondo abi. Mpindyewu, kî mbajimine to, kàdi bàdi ànu “bàbùngile ne balààle tulù.” Mbindile, nwamònu's. Kabàvwa bàmba ne bàvwa bafwè to, kàdi bàdi “munkaci mwà kubùngila ne kulààla tulù.” Nwamònu anyì?

Nènku mundankulù lubilà lwàkeediibwa ne: Mònaayi, mubàki nyèyè awu ulwà; pàtukàayi bwà katuutakeena nendè.

Ne virgò yònsò ayi yàkabùika, ne kulongololayi myèndù yààyi.

Ki mikùtākàne ayi kwambila—kwambila yà lungènyi ne: Tùpèshaayikù maanyi ènù; bwalu myèndù yetù yikaadi mijime.

Kàdi yà lungènyi kwandamunayi, yàmba ne: Kabyèna nànkù; kî mmashààlemù makùmbàne bwètù ne bwènù to: kàdi ndàayi kùdi aba bàdi bààsùmbishà, ne nudisùmbilaayi. (Mfwilaayikù luse.)

Nènku pàvwàbo bàya kasùmba apu, mubàki kulwa; ne aba bàvwà badilongòlòle bààkabwela nendè mu dibàka: ne ciibi cyàkakàngiibwa.

Paanyimà kulwabo kàbidi kùdi virgò mikwàbò ayi, yàmba ne: Mukalenge, Mukalenge, tükàngwilekù. (Mpindyewu, nwamònu's, kabàvwa beena bupidyà to, bàvwa bantu bìmpè.) . . tükàngwilekù.

Kàdi dyandamuna . . . Kàdi yéyè wàkandamuna e kwamba ne: Bulelèlà ndi nnwambila ne, ncyèna munùmanye to.

Ki bwà cinyi tàngilàayi, bwalu kanwèna bamanyè nì nditùkù anyi dībà dīkalà Mwànà wa muntu mwà kulwa to.

¹⁴⁹ Mpindyewu virgò yà “lungènyi” yitaanu ayi. Mpindyewu, *maanyi* mu Bible ncimfwànyi cyà “Nyumà Mwìmpè.” Twètù bwònsò tudi bamanyè aci. Kì bwà cinyi tutu tulaaba babèèdi maanyi, ne maanyi ncimfwànyi cyà Nyumà Mwìmpè. Pa nànkù yà lungènyi yivwa ne Maanyi mu myèndù yàayi, cìvwà ciikàle Nyumà Mwìmpè, pa nànkù yivwa midilongolole bwà kubwela mu Didyà dyà Dibanji. Nènku tudi mwà kwalukila mu—mu—mu Yèhezèkèlè 9, ne bikwàbò, ne kucipàtula ne kuleeja, kàdi ndi ne mikwàbò Mifundu mitwè ku dikùmi ne yitaanu mifunda kaaba aka. Pa nànkù maanyi ncimfwà- . . . Ngeela meeji ne tukàadi bamane kucyàkula mu dilonga dyètù mu lumingu elu, bwà ne *maanyi* awu àtu, ncimfwànyi cyà “Nyumà Mwìmpè.” Twètù bwònsò tudi bamanyè aci.

¹⁵⁰ Mpindyewu tàngilàayi, bòbò . . . búbidi bwàbò bàvwa “baavirgò.” Mpindyewu twàngatàayi eci. Apa, twàngatàayi bàbidi aba mwab'ewu mene. *Ewu* m'virgò ne *ewu* m'virgò, *ewu* úvwa virgò mukùtākàne ne *ewu* úvwa virgò wa lungènyi, kàdi búbidi bwàbò bwònsò abu bàvwa baavirgò.

¹⁵¹ Mpindyewu bu nwènù mwà kwangata dīnà *virgò* adi ne kudikenketa, didi dyùmvwija—didi dyùmvwija ne “wa cijila, mukezùke, mujidiibwe.” Mwàku *mujidiibwe* ùdi ùfumina ku mwàku “musantwisha,” mbwena kwamba ne, “mukezùke.” Bu mùdi mwàku wà mu cyena Ebèlù . . . Mpindyewu, mmwàku wà cyena Ngelika, *kujidila* mbwena kwamba ne “kukezula.” Mpindyewu, mwàku wà cyena Ebèlù ngwà kuvwija “wa cijila.” Nwamònu anyi? Nènku wètù mwàku ùdi “mukezùke.” Mpindyewu, bàdi bangata myàku yisàtù, byenze bu ne mwàku

ne mwàku wònsò ùdi ne dyumvwija dyàmwomùmwè kàdi pààwù bàwàmba bishiilàngàne, bu mùdi mwàku ewu—ewu “mukezùke, wa cijila, mujidiibwe,” yònsò yìsàtù ayi yùmvwija mwàku ùmwèùmwè awu.

¹⁵² Bu mutùvwà twakula bwà mwàku bu mùdi *mbwa*. Ndi mufwànyine kwamba ne: “dog,” aci’s mmu Anglais. Bu mèmè mwà kwamba *mbwa* mu cyena Àlèmanyè, Fred, cidi ne “hund.” Mmwòmò anyi? Mwanèètù Norman, bu mèmè mwà kwamba *mbwa* mu cyena Espagne, cidi ne “ajo.” *Ajo, Hund*, ne *dog* byònsò bìdi ànu *mbwa* bwètù twètù, nwamònu’s. Nwamònu’s, bìdi—bìdi ànu nàнку, n’cibiikidilu.

¹⁵³ Pa nàнку, mwàku wa cyena Ngelika bwà *mukezùke* ùdi “kujidila,” mwàku wà cyena Ebèlù ùdi “wa cijila.” Wa cijila, mukezùke, ne kujidila, byònsò abi bìdi ànu mwàku ùmwèùmwè awu. Pa nàнку eci kacìvwa èkèleeziyà wa bukooyà, wa manyaanù to; ùvwa ng’èkèleeziyà mujidila, mukezùke, “*virgò* dikùmi yàkapàtuka bwà katwilangana ne Mubàki ayi.” Cidi cyùmvwija cinyi? *Èkèleeziyà* yònsò eyi. Kì. . .mpindyewu, kì mmu wa cyena Loomù *emu* to; kàdi mmubwele mu cyena màngumba, beena Nikàlàwù. Ba-Baptiste bàtu bàyiisha pa Dilwa Diibìdi dyà Kilistò; ba-Méthodistes bàtu bàyiisha Dilwa Diibìdi dyà Kilistò; Ba-Presbytériens bàtu bàyiisha Dilwa Diibìdi dyà Kilistò; ba-Nazaréens bàtu bàyiisha Dilwa Diibìdi dyà Kilistò; Ba-Pèlerins de la Sainteté bàtu bàyiisha Dilwa Diibìdi dyà Kilistò. Ncyà bushùwà anyi? “Bwònsò bwàbò bààkapàtuka bwà katwilangana ne Mubàki.” Mpindyewu nudi—nudi bavùlùke ne bóbò muntu ne muntu bàvwa mu njila bènda bàya bwà katwilangana ne—ne Mubàki. Mpindyewu, bu Nzambì ùneemekela aci, dìbà adi Yèyè ùvwa, kubàngata pààbò.

¹⁵⁴ Kàdi nudi bavùlùke cintu cìmwècimwè aci, mùvwa lusùmwinù dilòlòlò adi, pààkaakulà Nzambì neetù mu cikondo cyà èkèleeziyà ne kwamba ne “Baalàmà, dilongesha dyà Baalàmà.” Mpindyewu, ki Baalàmà ewu mwimane, cìvwa ciikale ditùnga dìmpè, dinène menemene dilongolola. Ne bàvwa beena kwitabuuja mu Nzambì, bwalu tàngilàayi nùmonè cyàkenzà Baalàkà pààkalwàye. . .Baalàmà’s wè, èyowà. Wàkalambula mulàmbù wà mwomùmwè awu kùdi Nzambì ànu umweumwe ùvwa nendè Izàlèèlà awu, Nzambì wa Izàlèèlà awu, Yèhowàh awu. Ki kwenzaye byoshelu mwandamutekète. Mwandamutekète ki nombà mukùmbànàngàne wa Nzambì.

¹⁵⁵ “Matùkù àsambòmbò Yèyè wàkakwàta mudimu, ne dyà mwandamutekète Wàkiikisha,” aci ncikùmbànàngàne, nwamònu’s, mwandamutekète. Matùkù àsambòmbò Yèyè wàkakwàta mudimu pa buloba. Bidimu binunu bibìdi byà kumpàla, bwàkabùtudiibwa ku màyi; bidimu binunu bibìdi biibìdi, Kilistò wàkalwa; ne eci ki binunu bibìdi biisàtù mpindyewu. Ku ndekeelu kwà binunu bibìdi byònsò, cintu kampànda citu cyènzeka, buloba bùyùkushiibwa

cyàkàbìdì. Munda mwà bidimu binunu bisambòmbò, Yéyè wàkiibaka buloba; bidimu binunu bisambòmbò èkèleeziyà kukwàta mudimu ùlwishangana ne buloba; nènku cinunu cyà mwandamutekète s'ki bidimu cinunu byà bukòòkeshi bwà Bukalenge bwà bidimu cinunu abu. Nudi nucyùm vwa mpindyewu anyi?

¹⁵⁶ Mpindyewu, èkèleeziyà ùdi ne Bikondo Mwandamutekète byà Èkèleeziyà, kàbìdì. Nzambi...Nènku ki nombà mu kaabujimà wa cikondo cyà èkèleeziyà, kwajiki, mwandamutekète. *Mwandamutekète* ki nombà mukùmbànàngàne wa Nzambi. Bikondo Mwandamutekète byà Èkèleeziyà, bidimu binunu mwandamutekète byà bufùki, byònsò bìdì bikwàta mudimu mu mwandamutekète.

¹⁵⁷ Mpindyewu, ki virgò ayi kupàtuka bwà katuutakeena Nendè. Ne virgò “mikùtākàne” ayi, mpindyewu, kayivwa ne Maanyi mu myëndù yààyì to, kàdì iwva ne bikwàbò byònsò: iwva mikezùke, iwva miitabùùje Kilistò; iwva iyiisha Dìyì divwàyi miitabùùje, dìngumba dyàyi ndifwànyine kuyilekela iyiisha, yàkayishi cyòci aci, Dilwa Diibìdì, Mulàmbù, Difuta dyà cibawu. Bàdì biitabuuja. Wèwè ukààdiku mudiswìke ne mumanyi wa dibàla mwimpè wa ba-Baptistes musangu kampànda, (huh) bikèngela ùmanye cyùdì wakula aci, uh-huh, bushùwà wikale naaci.

¹⁵⁸ Kàdì, nudi numòna's: “Batàmbe kufwànàngana menemene,” mùdì Maatààyì 24 mwambe, Maatààyì 24:24; nucibale dyàkàmwè nènku nenùmòne. Yesù mmwambè ne mu matùkù à ndekeelu aa nyumà yìbìdì ayi neyìikalè mifwànàngàne menemene mu mùshindù wà bifwànyine kuseeswisha ne Basungula mene bu ne bivwa mwà kwenzeka. Nebiikalè bifwànàngàne menemene mu mùshindù wà ne nebinyukushè beena Mpenta abu mu mùshindù wà dikèma. Bushùwà's! Mpindyewu, Maatààyì 24:24, kùdikù muntu naaci anyi? Nèivwa mufike naaci mwaba awu mene to. Udi nendè mwaba awu, mwanèètù wa bakàjì, anyi bàmwè bàà kunùdì? Maatààyì 24. Udi nendè anyi, Ben? Eyo, cibalààyì.

[Mwanèètù wa bakàjì kampànda ùdi ùbala ne: *Bwalu nekùjuuke* beena Kilistò bàà *mashimi*, ba-Kilistò bàà *mashimi*—bàà *mashimi*,—Muf.] *Ba-Kilistò bàà mashimi!* [*ne bapròfetà bàà mashimi,*] *Bapròfetà bàà mashimi!* [*ne nebàleeje bimanyinu binène ne maalu à kukema; mu mùshindù wà ne, bu ne bivwa mwà kwenzeka, nebàseeswishe basungula mene.*]

¹⁵⁹ Ki bwalu mbwòbù abu's. Mpindyewu, cyàjuukà ncinyi? Nekùjuukè ba-Kilistò bàà *mashimi*, bantu bàà *mashimi* bàmba ne: “Mèmè ndi wa Kilistò.” Bapròfetà bàà *mashimi*, bàmba ne: “Ndi *cikampànda* ne ndi *cikansanga*.” Nènku nebàseeswishe Basungula mene bu ne bivwa mwà kwenzeka. Ne kùdì

mùshindù ànu wùmwèpelè wùdiku mwà kusùngidiibwa, mpaùdi musungùdiibwe kumpàlà kwà difùkà dyà dyulu ne buloba; mbwena kwamba ne, Basungula, ku didyànjila-kumanya, dîna dyèbè dyàkafùndiibwa mu Mukàndà kuntu kwàka. “Bimanyinu binène!”

¹⁶⁰ Mpindyewu tàngilàayi èkèleeziyà yìbìdi eyi. Kaa, ngìkalakù mwà...bu ne kùvwa mùshindù kampànda wà mèmè mufwànyine ànu kufikisha bantu ku dicimòna. Cidi ànu cilàkuka kapyà mu musùkà wànyì! Eci...èkèleeziyà *eyi* mmikezùke ne yà cijila ànu bu mùdi ewu emu; piikalàbi ne bwònsò abu mbaavirgò, bwònsò's mbaavirgò, bakezùke ànu menemene. Dishilangana òmwèpelè òmwèpelè òmwèpelè òmwèpelè m'Maanyì mu mwèndù, Nyumà Mwìmpè. Nènku Nyumà Mwìmpè, piikalàYemù, Yèyè ùdi ùtwàla kapyà kàà mùshindù ùmwèùmwe ne kàkatwàlàYe dyà Mpenta aku. Kàdi kabèèna ne kapyà, anyi Maanyì nànsha makesè mu myèndù yàbò to. Bàdi ne mushingà wà èkèleeziyà, èkèleeziyà ànu wa mishingà ne—ne mwèndè mwònsò, dyanza dyà mishingà dìmpè (ncyena naabi bwalu), twitabàayi yìdi mifwànyine kunyùkula kondò kèèbè kàà mwoyi, ne misambu bu mùdi Banjèlò bimba amu. Nènku bàdi... nenwikale...kubàbanda ne bwalu mu webè...nsòmbelu wabo, kwena mwà kwenza nànkù to. Kàdi nànsha nànkù aci ncyà mafi! Kacyèna...cidi—cidi citùpà cyà Cyòci aci, kàdi kí n'Cyòci cyònsò to. Bàà mùshindù awu's kí bàdi bapangila Dyambwibwa. Nwamònu anyi? Bàdi ànu... .

¹⁶¹ Mpindyewu tàngilàayi. Ki Moàbà uvwa wenda upweka ewu. Nèncyàngacile ànu mwaba ewu bwà nwacimònaku. Ki Moàbà ewu, bulongolodi bunène, mèmè nèmfundè kaaba aka “*bwà*” bulongolodi, ki Izalèèlà ewu, “*kàyi*” bulongolodi. Ki Moàbà ewu, mwimànyike byoshelu cimwè, bibidì, bisàtù, binaayi, bitaanu, bisambòmbò, mwandamutekète; Izalèèlà ùvwa ne byoshelu cimwè, bibidì, bisàtù, binaayi, bitaanu, bisambòmbò, mwandamutekète. Èyo. Moàbà mwab'ewu wàkatèèka bimpàngà byà ngombe cimwè, bibidì, bisàtù, binaayi, bitaanu, bisambòmbò, mwandamutekète; Izalèèlà ne bimpàngà byà ngombe, cimwè, bibidì, bisàtù, binaayi, bitaanu, bisambòmbò, mwandamutekète. Èyo. Moàbà kwambayè ne: “Nekùlwe cikondo cyàlwà muntu kampànda (Kilistò) pa buloba, pa nànkù Yèyè neikalè Mwànà wa mùkòòkò wa Nzambì udi umusha mpèkaatù wa bàà pa buloba, netùteeke mwandamutekète” (cinyi?) “bànà bàà mìkòòkò pa cyoshelu eci”; Izalèèlà wàkamba ne: “Ncyà bushùwà menemene, bànà bàà mìkòòkò mwandamutekète pa cyoshelu.” Nwamònu anyi?

¹⁶² Mpindyewu, ku ntwàdijilu menemene, Kaayinà wàkatèèka cyoshelu, kufila mulàmbù, kukuukwila, kwenza byònsò byàkenzà Abèlè abi, kakùyì... (Kaa, akidilaayi Aci's!)... kàyi dibuulula dyà kùdi Nzambì to, pàdìbi ne, Èkèleeziyà mujimà mmwibakila pa dibuulula adi. Yesù ngwákamba nànkù

ne: “Pa lubwebwe elu Nèngiibakilèpu Èkèleeziyà Wanyì.” Bulelèla bwà mu nyumà bubuulula bwà Bunzambì butàmbe kutumbuka bwà Yesù Kilstò: “Pa lubwebwe elu Nèngiibakilèpu Èkèleeziyà Wanyì.”

¹⁶³ Mpindyewu, bu Nzambì mwà kuneemekela ànu mukàndà wà mishingà yènu, ne mishingà yènu ayi, bu ba-Méthodistes, ba-Baptistes, beena Mpenta, ne bikwàbò, piikalabi ne ki cidìYè ùtèkemena bwà nwènù kwenza, kuyiisha Dilwa Diibìdì ne bikwàbò bintu byònsò ebi (ne, kakùyì mpatà to ncyà mu Mifundu), bu mùdì ba-Baptistes, ba-Presbytériens, ne bakwàbò bènga, díbà adi Nzambì mmwenzèjìbwe bwà kubàngata bùbìdì bwàbò bwònsò bwalu ki cyònsò cìvwàYe mulòmbe. Kàdi, nudi numòna’s, kakùyì dibuulula to, s’ki virgò mukùtākàne awu; s’ki virgò wa lungènyi ewu’s. Bàvwa bulongolodi, ditunga dinène.

¹⁶⁴ Tuvwa babalè dilòlò adi, mwaba ùdìCi cyàmbe ne: “Bantu aba kabàakwikalaku bulongolodi to, bòbò nebiikalè bàlalakanyi mu ditunga amu, basòmbe mu ntentà, bapèlè, badipwekèshe.” Kàdi yèyè kwamba ne: “Kanùteecikù bwà kubèela mulawu to, bwalu Mémè ndi naabò.” Mpindyewu tàngilàayi! Bantu aba bàdì biitabuuja mukàndà wà mishingà wùmwe wùmwe wùvwàbò biitabùuje, ne bàkuukwila Nzambi umweumwe awu. Nwamònu anyi? Kàdi kabàvwa ne bimanyinu ne maalu à kukèma bibàlonda nànsha! Izalèèla ùvwa ne Nyòka wa cyamu cyà Kabanda, Lubwebwe lutuuta, disànkà dyà Mfùmù, dyondopa dyà kùdì Nzambi, baprófeta, bintu byònsò ànu lwà kwìnshì *eku*. Nèku kabàvwa, bàvwa ne mukàndà wà mushingà wà kabàyi ne—kabàyi ne dibènesha to, Maanyi.

¹⁶⁵ Cintu cimwècimwè aci ne virgò mukùtākàne ne virgò wa lungènyi awu, bwònsò bùbìdì bwàbò bàvwa bantu bajidiibwe. Kàdi *ewu* nùku yèyè ùvwa ne Maanyi. Ne *ewu* yèyè kàvwa ne Maanyi to, ki kwambabo ne: “Tudi bìmpè ànu munùdì pèènu amu.” Aci’s . . . Kakwèna nànsha umwe wa kutùdì udi mwìmpè to, bwà bìdì bitàngila bwìmpè. “Mòna’s, nwènù’s nudi musùmbà wa bansantu babùnguluki bàà mu malaba!” Èè, abi’s mbìmpè, uh-huh, abi’s mbìmpè. Kakwèna nànsha umwe wa kutùdì udi mwìmpè to, twètù bwònsò tudi benze mpèkaatu ne tudi bapangile butùmbi bwà Nzambì. Kàdi mùshindù wùmwepelè wuwikalàku mwà kuCìmanya, kí nku dikashàala wa mu èkèleeziyà kampànda to, kí nku kuteeta kwikala ne nsòmbelu mwìmpè to, kàdi mpaùdì upeta Kilstò. Ki ncìndì mèmè ngenza to; nku cìvwàYe. Kí ncìndì mèmè to; ncìdìYe. Yèyè wàkalwa mèmè bwà ngàmòna mèmè, ku ngàsà Wendè, mwà kulwa Yèyè, mwànà wa Nzambi. Nudi numòna aci anyi?

¹⁶⁶ Mpindyewu, virgò mukùtākàne, ne virgò wa lungènyi mwikalè ne Maanyi mu mwèndù wèndè. Mpindyewu, dyàkàmwe, kulwakù cyonà ne: “Mònaayi, Mubàki nyèyè awu ùlwa, ndàayi bwà katwilangana Nende!” Nèku bàakatàbuluka. Kàdi

pàakenzàbo nàнку, ewu ùvwà mwà kubwela bwalu ùvwà ne Maanyi mu mwëndù. Ki cìvwà dishiilangana ncyôci aci.

¹⁶⁷ Ewu nùнку kàvwà mwà kubwela to, mùvwaku kakùyi Maanyi mu mwëndù; kwalukilabò bwà kasambila, bwà kupetabò Nyumà Mwimpè. Kàdi, pàvwàbo bènda bàya apu, bwalu kujikabò. Màngumba àdi àmba ne: “Èè, pàmwàpa twètù tudi bapiile. Pàmwàpa mbimpè bwà twètù kwalukila, bwà kukeba dibàtiiza dyà Nyumà Mwimpè.” Ki cidìbo bateeta kwenza mpindyewu ncyôci aci. Nukààvwakù bamòne aci anyi? Ba-Presbytériens... Anji imànyikàku mukàbà wèbè wà mèyi katanci, ncyèna muswè kutèèla dîna edi to. [Katùpà kàà mukàbà wà mèyi munda mutupù—Muf.]...?... Mubàki wàkalwa. Nèнку, èè, mùshindù mwine ùdi dilwa Dyèndè pabwîpi díbà adì’s, pàkaadìbo bàya mpindyewu bwà kuteeta bwà kusumba’s! Èyo, tùngunukààku ne mukàbà wèbè wà mèyi awu, Gene. Mpindyewu, nwacyùmvù anyi? “Pàcìvwàbo bayè kasumba apu,” bàdi bateeta kusumba mpindyewu, èkèleeziyà yònsò yidi yiteeta kwenza ditabuluja, ditabuluja; yidi yiteeta bwà kwalukila.

¹⁶⁸ Mpindyewu, nànsha mene bwà Docteur Billy Graham, mwine wàkafùnda mu cikàndàkàndà cyà *Mukòbodi wa Diitabwaja*, nwàkacimòna, cyà ku Chicago aci, ki yèye ne “Katwèna mwà kudyombola nkwa ku cyena Mpenta to.” Nwamònu anyi? “Katwèna mwà...-bàdyombola to, bwalu bàvwà ne bantu bààbùngi bakùdimune mucimà mu cidimu cimwè kupita èkèleeziyà mikwàbò yònsò misanga ntete.”

¹⁶⁹ Aci menemene’s ki kapyà kàdi kàteemà, kàcìnyùkusha, kàkezula, kàkupa bukòndò ne kàbùpàtula. Nèнку paùdi wela bukòndò... Yesù wàkamba ne: “Bukalenge bwà Nzambi mbufwànàngàne ne muntu wàkaya e kwela bukòndò mu mbù, nèнку pàakapàtulàye, wàkapeta nkùvu, nyòka, ndimbà, nyòka, ne bikwàbò byònsò, kàdi wàkapeta ndambù wa mishipa, kàbìdi.” Ki cidì mukenji wà beena Mpenta wènzà, wùdi wùtangalaka pa buloba; wùkupa bukondo ne ùpàtula, tudi munkaci mwà kukwàta nkùvu, nshishà, nkàlà, bivuba, lombe, binyamankòòlà, ne bikwàbò byònsò muntwamu. Kàdi bwalu bùdi ne, mùdi ndambù wa mishipa, kàbìdi. Ayi’s ki yà Mfùmù.

¹⁷⁰ Èyo, bwà bàmwè bàà ku nwènù bânà bèètù beena ne ànu mikenji bàdi bàtèèleja mukàbà wà mèyi ewu, ndi muswè cìnùbwela menemene: Ndìbà kaayi dyàkalwayi mishipa? Mpààkayà bukòndò pambidi pààyì apu anyi? Yìvwà mishipa ànu kwine kwònsò aku! Ncyà bushùwà. Misungula kacya ku difùkà dyà dyulu ne buloba! Mfùmù kàvwakù mwanji kukwàta naayi mudimu to.

¹⁷¹ Ki ludimbà lwènù alu. Udi ubàkula ludimbà lwà kale ne ulwimansha ku mwelelu aku anyi, dyàkàmwè “nsopo, nsopo” lwàlukila buludi mu màyi.

172 Kàdi lushishà lukùlakàji lusòmbe mwaba awu, lwàmba ne: “Kya, aci’s mmusumbà wà bansatu babunguluki bàà mu malaba.” Ki lwólù lùdì lwàlukila lwàlwa ne: “Aa—aa—aa—aa—aa. Kaa, to!” Kwalukila buludi mu bitoci ne mwàlù mwònsò. Ncyà bushùwà.

173 Nyòka wa kale wenda ùya wela nshìbà ndambù ne: “Ndi ngeela meeji ne matùkù à bishimà àkaadi mapìte, Mulongeshi *Kampànda* ne *Kansanga* mbangambile.” Yèyè ne: “Aa—aa—aa—aa—aa—aa—aa—aa, kwèna mwà kuntàatakajakù mèmè ewu to!” Ki yèyè uyààya wàwa, buludi kwaka cyàkàbìdì, nudi numòna’s.

174 Nyòka, ànu kwìnè kwònsò aku! Ludimbà, ànu kwìnè kwònsò aku! Pòlò mmwambè mu Bible, bwà bàà mùshindù awu abu, mmwambè ne: “Bààkapàtuka munkaci mwètù bwalu kabàvwa bàà ku twètù to ànu kwìnè kwònsò aku.” Nwamònu anyi? Uhm! Èyo, virgò mukùtakàne awu.

175 Virgò wa lungènyi awu ne Maanyi mu mwèndù wèndè, yèyè wàkadilongolola.

176 Mpindyewu, “pàvwàye muye bwà kupeta ndambù wa Maanyi apu,” s’ki cidìbo bateeta kwenza mpindyewu mene ncyòci aci. Èkèleeziyà minènè yà butangadiki eyi, yiteeta bwà kupeta bintu binène ebi, nudi bamanyè’s, ne kwenza . . . kwalukila ku Bible, kwalukila ne: “tudi dijinga ne Dibènesha dyà Mpenta.” Mòna’s, nudi mwà kudifwànyikijila ne nebiikale ne disangisha dyà mùshindù kaayi, nwamònu’s. Kabàadyàkuyaku kuntwaku bwà kunyangakaja bilaabu byònsò bìdì pambidi pààbò abi, ne byònsò abi to. Kaa, to. Kabàadyàkulekelakù bisumbù byàbò byà baamaamù abì ne tusumbù twà bantu basungùlùke ne bintu byà mùshindù awu to. Bashààle bakùlame ku maalu à buloba bu Esawù, mu cyanza cìmwè, bateeta kukwàta Nzambi ne cìngà cyanza. Kanwena mwà kwenza nànkù to. Kwèna mwà kwikala mwena Kilistò wa mèsù a bulèngù to, nudi bamanyè’s, mwikàle mutàngile kùdì Nzambi ne ku maalu à buloba kàbìdì nànsha. Bikèngela ùshààle mudijaalàmije pa Kàlvaryò, kushààla ànu mwaba awu ne Cyòci aci.

177 Mpindyewu, kàdi ki bòbò bàyaayà bàba, ne bàdì bateeta bwà kwalukila. Nènku vùlukàayi mutùdì pabwìpì! Cikondo ciinè cyàkayàbo bwà kusumba aci, ke dìbà dyàkalwà Mubàki.

178 Kaa, Mwanèètù Stricker, tukàadi pabwìpì apu! Tukàadi pabwìpì menemene ne Kwètù. Kaa, dimwè dyà ku maadindà aa:

Mpungi wa Mukalenge neàdile, ne cikondo
kacyàkwikalakù kàbìdì to,
Ne dindà nedibwayikè dyà Cyendèlèlèlè,
dibàlakana ne dilenga;
Pàadisangishà basungidìibwe Bèndè bàà pa
buloba ku Nzùbù wabò dyàmwàmwà dyà
dyulu,

Necikalè cikondo kaayi’s wè!

179 Èyowà's, virgò mukùtàkàne. Neikale. . . Virgò mukùtàkàne ewu mpindyewu, nudi baswè kumanya cyàmufiikila. Ki mmwòmò anyi? Cintu cimwèpelè cindi muswè kuumvwija. Cìikalà mwà kwenzekela maèkèleeziyà aa ncinyi? Cyènzekelà bantu aba bàdi bàlwa citùpà cyà njila pàmwè ne Kilistò aba, ne bàvwa kabàyi balwè, anyi kabàyi bende njila mujimà ne Kilistò ncinyi?

180 Mpindyewu mu Loomò, ngeela meeji, 2:22, Bible mmwambè, Pòlò mmwambè ne: “Nyumà wa Nzambi Yèyè kàyì munda mwèbè to, wèwè kwèna wa Nzambi to.” Wèwè udi wa mu bulongolodi kàdi kwena wa Nzambi to. Nyumà wa Nzambi yèyè kàyì munda mwèbè to, kwèna wa Nzambi to. Nwamònu's. Bikèngela wikale ne Nyumà wa Nzambi bwà wèwè kwikala wa Nzambi. Cyà bushùwà!

181 Èyo, mukalenge: “Dikènga dinène.” Mpindyewu, mpindyewu wèwè. . . Nebikèngelè bwà kupicilabò mu. . . Mpindyewu, nudi nuvùluka ne, Yèyè mmwambè. . . Mpindyewu ngǎnji ngàngatè mikwàbò yàayi ayi ne: “Bààkeediibwa mu mîdimà yà pambèlu, ne nemwikalè myadi, ditwà dyà mikèmu, ne disumakaja dyà ménù.” Èyo, ki Dikènga dinène ndyòdi adi. Ki mmwòmò anyi? Dikènga dinène! Mpindyewu, paanyimà pàà Dikènga dinène edi, bantu abu. . .

182 Mpindyewu, ngǎnji ncyàmbùlùlèbi cyàkàbìdì mwab'ewu, bàshàadilè abu. Mpindyewu tàngilàayi! S'ki cipese cyà cilàmbà eci. Èyo, inàbànzà awu mmucyadije mwaba awu mùshindù ewu. Mpindyewu yèyè neàdyènzèle cintu kampànda, nudi bamanye's, civwàlù cyà mùshindù kampànda. Mpindyewu, ki cilàmbà cyònsò cì—cìvwaye naaci aci. Mpindyewu, kantu ne kantu kàaci nciilàmbà cyà mùshindù ùmwèùmwe awu. Mmwòmò anyi?

183 Bwònsò bàbìdì bàvwa virgò. Nwamònu anyi? Èyo. Bàvwa ne diitabuuja mu Kilistò, cimwènekèlu cyà difwàna dyà Nzambi, baye mu èkèleeziyà, benze bintu bimpè, dinanga, kakùvwa cintu nànsha cimwè cibì cifwànyine kwambiibwa bwà byenzedi byàbò ne bikwàbò to. “Ndi mumanyè byenzedi byèbè,” mwàkambàYe mu cikondo ne cikondo cyònsò. “Ndi mumanyè byenzedi byèbè, kàdi nànsha nànkù udi mupangile.” Nwamònu anyi?

184 Mpindyewu, pàdi mukàji awu. . . ùdi upàngadika mu meeji èndè mùshindù ùdiye ne citembelu eci, ne upànganadika mu meeji èndè mùshindù wikalaye mwà kukòsa citembelu eci, kwikalaci mwà kukòsediibwa aku. Ncyà bushùwà anyi? Èè, yèyè ùdi ùpeta cidìye wèla meeji ne ki citùpà cidì cikùmbàne ne citàmbe bwimpè cyà—cyà citembelu aci. Mmwòmò anyi? Bwalu cyònsò aci nciilàmbà cimwècimwè aci, kàdi ùdi ùcyàdija pàmwàpa mùshindù ewu anyi mùshindù wàwa, ùdi ùcyàdija panshì. Pashiishe ùdi wàngata kàshoolà kèndè ne ùcikòsa. Mpindyewu, bìdì bishààla abi bìdì bìbìikidiibwa ne “bishàadila.” Èyo. Mpindyewu, citembelu eci ncinyi? Cìvwa

cìmanyike bishi? Kùdi ewu...mwaba ùvwa inábànzà ewu musòbòle bwà kucikòsela.

¹⁸⁵ Nzambi, kumpàlà kwà difùkà dyà dyulu ne buloba, Ùvwa mumanyè ndekeelu kacya ku cibangidilu ku didyànjila-kumanya, Yèyè *wàkasungula* mwaba wa kukòsela. Ùvwa mumanyè dishiilangana pankaci pàà Esawù ne Yakòbò. Ùvwa mumanyè dishiilangana pankaci pàà ngènzàmpèkààtù ne munsantu. Ùvwa mumanyè dishiilangana. Mmumanyè kabingilà kàà mwoyi ne mwoyi wònsò, pa nàнку Yèyè kutùsungula kumpàlà kwà difùkà dyà dyulu ne buloba ne kufùnda mènà ètù mu Mukàndà wa Mwoyi wà Mwànà wa mùkòòkò; kàbìdi Mwànà wa mùkòòkò uvwa ne cyà kushipiibwa awu (ne kufùnda mènà ètù *kumpàla* kwà Yèyè kushipiibwa), ne Bible mmwambè ne Kilistò nguvwa Mwànà wa mùkòòkò mushipa kumpàlà kwà difùkà dyà dyulu ne buloba. Ne mènà ètù àkafùndiibwa mu Mukàndà pàvwàYe—pàvwàYe musungula kuntwaku bwà kwikala Mwànà wa mùkòòkò uvwa ne cyà kushipiibwa, twàkasungudiibwa bwà kwikala aba bààkaMushipeelabo abu. Nudi bacimòne anyi?

¹⁸⁶ Mpindyewu, bwònsò abu mbaavirgo. Mpindyewu, bàshààdilè bakesè *mbòbò aba*, kî mbiipàciibwe to. Kaa, to. Yèyè ùdi ùshààla mucilame, kàdi mmucitèèke paanyimà, ùdi mwà kukwàta naaci mudimu bwà cintu kampànda cikwàbò. Nwamònu anyi? Kàdi kabààkukwàta naaci mudimu *mwab'awu*, s'ki Èkèleeziyà mukòsa awu. Mpindyewu, nebikèngelè bwà kutwàlabò dilumbulwisha (bwalu bàdi bàpicila mu Dikènga dinène), abu mbàshààdilè. Mpindyewu nwacyùmvù anyi?

¹⁸⁷ Ki Èkèleeziyà uyààya *ewu*, Kumbèlu, ùdi wàlukila Kumbèlu. Bàshààdilè *mbòbò aba* bàdi bashààla. Ne ki binunu lukàmà ne makumi ànaayi ne bì naayi *mbòbò aba* pa Mukùnà wà Sinaayi, beena Yudà. Kî mbakàji-basèla bàsàtu bashiilàngàne to. Huh! M'Mukàji-musèla; bàshààdilè; ne binunu lukàmà ne makumi ànaayi ne binaayi. Menemene. Kàvwa yèyè ùdya cingà cintu to ànu Cyàkudyà cyà Nyumà Mwîmpè kuntwaku, ngeela meeji, pa nàнку ùvwa ànu bìmpè, kakùvwakù cintu cyà cibi kùdi Yone to. Nwamònu anyi? Nènku's ki—ki bòbò abu.

¹⁸⁸ Mpindyewu, ku ndekeelu kwà cikondo, mbanganyi bàdi bamanyè ne Bible ùdi wàmba ne “bansantu nebàlumbulwishe buloba”? Pòlò ngudi mwambè nàнку. Tùbuululàayi mpindyewu mu—mu Mukàndà wà Danyèlè ne twàngatàayi Nkwasa wa butùmbi Mutòòke. Tudi bafwànyine kucipàtula mu Bwàkabuulwibwà kàdi ndi muswè kucyàngacila mu Danyèlè, ncintu cimwècimwè aci. Danyèlè 7, ne netùpetè Nkwasa munène Mutòòke wa—wa Cilumbulwidi kaaba aka. Tùbangilàayi ku mvensà wa 8 wa nshapità wa 7 wa Danyèlè:

Nènku *mémè kutàngila nsèngù, ne, mònàayi, munkaci mwàayi kujukamù kaalusèngù kakesè* kampànda,

kumpàla kwàlù kwàkajoomonyiibwa nsèngù yìsàtù yà dyàmbedi: (Mpindyewu, tudi bamanye ne tudi mu Loomò amu, mpindyewu. Nwamònu anyì?) *nènku, mònanyi, mu lusèngù elu mùvwa mèsù... à muntu,* (Mpindyewu, vùlukàayi ne, lusèngù elu kalwàkapeta cifulu cyà butùmbi to, civwa ncintu cyà budimù. Nsèngù mikwàbò ayi yàkandamuka nyama. Ewu ùvwa muntu wa budimù, ùvwa mmuntu, pàapa pamutù pàa mumpàngaanù, nudi numòna's.) *ne mukana mwikàle mwàkula bintu binène.*

189 Mpindyewu tàngilàayi, mvensà wa 9:

Ngàkatàngila too ne *pàakadijiibwà nkwasà yà butùmbi,* (Ki ndekeelu wa makalenge ónsò à bàà Bisàmbà byà bendè awu. Mupròfetà ewu ngudi wakula. Mpindyewu vùlukàayi ne, cyònsò cyà ku bintu byàkambayè abi ncyenzeke too ne ku cintu cyà ndekeelu eci, tudi bamanyinè aci ku bwètù bwalubulonda butùdi tulonga ebu.) . . . *bùvwà... ùvwa—ùvwà nkwasà yàkatèèkibwa, ne Mukùlùmpile matùkù awu wàkasomba, mvena bilàmbà bivwà bitòòke bu nèjè,* (Nudi bamanyè ne awu ùvwa nganyi mu cikèèna-kumòna aci dilòdòlò kampànda adi's? Yesù.) *ne nsuki yà mutù wèndè yivwa bu... myòsà yà mùkòòkò mikezùke, ne nkwasà wèndè wa butùmbi ùvwa bu ludimì lwà kapyà, ne nkàtá yèndè bu kapyà kàà kàlàkuka.*

Ne *musùlù wà kapyà ùvwà ùpweka ùpàtukila kumpàla kwèndè:* bantu binunu kuvudija *ku binunu bàmukuacila mudimu,* (Ki Èkèleeziyà udi walukila Nèndè awu, nwamònu's.) *ne binunu makumi kuvudija ku binunu makumi biimàne kumpàlà kwèndè:* (Ki Mukàji-musèla ulwàlwa awu, ne bakwàbò bàà pa buloba.) *ne cilumbulwidi cyàkatwàdija, ne mikàndà yàkakàngudiibwa.*

...cilumbulwidi cyàkatwàdija, ne mikàndà yàkakàngudiibwa.

Ki *mémè kubàtàngila bwà dîyì dyà myàkù minène yivwà lusèngù alu lwàkula,* ne *ngàkatàngila mene* too ne *pàakashebeyiibwà nyama wa lwonji, ne mwàkabùtudiibwa mubidi wèndè, ne kwediibwawù* mu kapyà kàà kàlàkuka *aku.*

Nènku *bwà bafwè bàvwà bashààle abu, aba beena bukòòkeshi bwàkanyèngiibwa ab-...* (ndi muswè kwamba) . . . *nyama mikwàbò* (ndi muswè kwamba), *bukòòkeshi bwàbò bwàkanyèngiibwa kùdibo, kàdi nànsha nàнку myoyi yàbò yàkalepeshiibwa bwà cipòòlù kampànda cyà cikondo.*

¹⁹⁰ Mpindyewu, cilumbulwidi cyàkatwàdija ne Mikàndà yàkakàngudiibwa. Apu mpàdi Mukàji-musèla wàlukila ne ùtwàdija cilumbulwidi, ne Èkèleeziyà musungula . . . Èkèleeziyà udi mwambwibwe awu neàpingane paanyimà pàà bidimu bisàtu ne citùpà abi, ne paanyimà pàà cikondo . . . Ne lwà mu Bwàkabuulwibwà mmùdici cìcifila, mbambe ne—ne—ne “bafwè bakwàbò kabàvwa ne mwoyi kàbìdi to munda mwà bidimu cinunu.” Nwènù, mbanganyi bàkaadi bacìbalè? Misangu yàbùngì, yàbùngì menemene. “Kabàvwa ne mwoyi to munda mwà bidimu cinunu.” Yesù ùdi wàlukila ne Mukàji-musèla, pàmwè ne Mukàji-musèla.

¹⁹¹ Mpindyewu vùlukàayi ne, ànu mungàmbi amu, byònsò bìdi mu isàtù. Dilwa Dyèndè dìdi mu isàtù: musangu wà kumpàla, Yèyè wàkalwa bwà kupikula Mukàj’Èndè-musèla; musangu mwibìdi, Ùdi ùlwa bwà kwambula Mukàj’Èndè-musèla. Byenzè mùdi bwalu bwà dinanga, ùlwa ne ùmwiba mu mèbà à bufukù, ùmuumusha pa buloba ùya nendè, “kutwilangana Nendè mu mpeepèlè.” Dilwa dyà mu musokoko dyà Mukalenge, nwamònu’s. Musangu mwibìdi wùdiYe ùlwa, mbwà kwakidila Mukàj’Èndè-musèla. Musangu wà kumpàla, bwà kuMupikula; musangu mwibìdi, bwà kuMwangata; ne musangu mwisàtù, pàmwè Nendè, Mfùmù ne Mukalenge-mukàji’s!

¹⁹² Nènku ki Yèyè udi walukila ewu bwà kulumbulwisha matùnga. Pòlò wàkamba ne: “Nganyi wa kunùdi bwònsò utu udìdinga uya ku tubàdi pàdiye cilumbu ne mukwàbò? Kanwènakwà mwà kutàngila tuntu tukesè etu, kanwèna bamanye ne bansantu nebàlumbulwishe buloba anyi?” S’ki cilumbulwidi cyàkapèèbwa Kilistò ne lubadi Lwèndè ncyòci eci; bàdi bandumbùlùlà ku tubàdi, nènku ki Yèyè awu musòmbe mu Nkwasa wa butumbi. Mukàji-musèla nyèyè ewu, ndumbùlùlà awu.

¹⁹³ Kàdi ki bóbò bàlwalwà aba. Mikàndà yàkakàngudiibwa, ne Mukàndà mukwàbò ùdi mwikàle Mukàndà wà Mwoyi.

¹⁹⁴ Mpindyewu, Mukàndà wà kumpàla wùvwa m’Mukàndà wa ngènzàmpèkààtù, uvwa mubèngiibwe awu. Èyo. Yèyè mmupiihiibwe ànu kwìnè kwònsò aku. Ki—ki mbuji nyòyi ayi. Kèna nànsha ne mpungà to, wamònu’s, yèyè nngènzàmpèkààtù ànu kwìnè kwònsò aku. Èyo, mpindyewu, yèyè mmubèngiibwe.

¹⁹⁵ Kàdi bwà mìkòòkò, yàkàpìcila ku cilumbulwidi. Byàkakèngela bwà yilumbulwishiiibwe, nènku bansantu ki bàvwa ne cyà kubàlumbulwisha. Nzambi kàtu ne kansungànsungà to. Piikalàku bampàngaanù mu ditùnga mwàmwa, eku twètù twibaka myaba minsantu yà dibandila yà milliyò mwandamukùlù anyi dikumi yà ndola muneemu mu Àmèrikè pamutù pàà kubàtwàdila Mukenji kwàka, Nzambi neàtwomèkèle bujitu abu, kàdi neàbeepùle. Bushùwà’s! Nzambi kàtu ne kansungànsungà to.

196 Wêwè—wêwè ewu, ní kùtu mwanji kumònaku Cyôci eci kacya kwònsò eku to, udi—udi mwà kwikala kùyi mwomekela bujitu abu to, kàdi udi mwambule bujitu abu mpindyewu! Nudi numòna anyi? Nwènù bwònsò nudi bambùle bujitu. . . Ne twètù tudi bambùle bujitu bwà kutwàla Mukenji, udi mwambùle bujitu bwà kuWùtèeleja anyi kubènga.

197 Mpindyewu, bampàngaanù nebàjuuke, bantu bàdi kuntwaku biikale bàkuukwila mwaba munsantu wà dilwa kubandila abu. Ki mbamanyè cìdi citàmbe bwîmpè to. Ki mbamanyè kantu nànsha kàmwè pa bìdi bìCitàngila to. Nzambi kàtu ne kansungànsungà nànsha, Yèyè kí mmufwànyine kubàpiùsha kàyi mubàpèeshe mpungà to. Nènku nebàbàpèeshe kaaba.

198 Ne pa nàнку mu Èkèleeziyà, bwà ne cikondo ne cikondo cyònsò too ne mu cikondo cyà èkèleeziyà eci, kubangila—kubangila ànu ku Efèsò twenda tupweka too ne kwinshì *eku*, Mukenji, Mukenji mulelèlè wà Kìlistò mùvwàWu ku cibangidilu amu (dibàtiiza dyà Nyumà Mwîmpè, bukolè, dibìikà dyà ku lufù, dyakula dyà mu myakulu, dyandamuna dyà myakulu, mapà à dyondopa, dibatiiza mu Dîna dyà Mukalenge Yesù, bintu byònsò byàkalongeshàYe abi), yònsò udi mu Mukàji—musèla awu neìmanè bu ndumbùlùlà.

199 Ki bwalu bwà muntu kampànda bùlwalwà ebu: “Wêwè uvwa mwenze disangisha mwaba *Kampànda*, ùvwa mumwambile anyi?”

200 Mpindyewu ndumbùlùlà awu: “Èyowà, mvwa mumwambile.” S’ki cyôci aci mu Mukàndà amu, kwena mwà kucivilaku to, nànsha meeji ètù miine adi Mwômù amu. Nwamònu anyi? Kanwèna mwà kucivilakù to. “Èyowà’s, ngàkamwambila ne ùdi ne cyà kubàtijiibwa.”

“Mu Jeffersonville, mu tabernacle mwàmwa, mwômò amu?”

“Èyowà’s, Mukalenge, ndi—ndi. . . Wêwè. . .”

201 “Èyowà, s’ncyôci eci mu Mukàndà, wêwè wàkabàmbila ne bàdi *ne cyà* kucyènza. Bààkakèbulula too ne mu Mifùndù ne kusangana ne n’Cyà bushùwà, kàdi kabààkacyènza to.”

202 “NguuMùkilaayi apa, nwènù beena mudimu bàà bubi, Ncivwa nànsha munùmanyè to.” Nwamònu anyi?

203 Pòpò apu ki pàdiYe ùtàpulula mbuji ne mìkòòkò, nudi numòna’s, ùtèeka bàmwè ku dyàbalùme ne bakwàbò ku dyàbakàji. Apu’s ki pàdi misumbà yènù yisàtu ayi yàlukila kàbìdi.

204 Kàdi, *aka* kasumbù kakààkudisangaku ne *kàka* kasumbù to, awu m’Mukàji—musèla. Nènku, nudi numòna’s, Mukàji—musèla ùdi Nendè mu Ntempèlù. Bakwàbo bàdi bàkwàta mudimu ne batwàla butumbi bwàbò mu Bukalenge, kàdi Mukàji—musèla ùdi ne Mubàki dîbà dyònsò. Bakwàbò kabààkubwelamu to; bu mùdi

bàdi kwinshi eku *aba*, nebàkwatè mudimu, kabààkwipaciibwa to, bwalu Yèyè wàkabàtâpulula bu mikòòkò ne mbuji. Kàdi yèyè. . .

²⁰⁵ Kàdi mbuji kàvwa umvwaMù kantu to, kàvwa ùBìcyùka to. Yèyè ùvwa mbuji, ne musankishiibwe bu mbuji, nàнку awu kufwàye ànu bu mbuji nènku aci ki ndekeelu wendè. Kùmba kujika, nwamònu's.

²⁰⁶ Kàdi mùkòòkò, yèyè. . . bu Nzambì mwà kupàngadika bwà mèmè kwimana ku cilumbulwidi aku ne bampàngaanù bàtù kacya kabàyiku banji kuumvwa cintu abu. Pa nàнку wèwè muyiishe bantu Èvànjeeliyò ewu. . .

²⁰⁷ Nènku bikèngela ngiimane ku cilumbulwidi. Kanwènaayiku bavùluke mu ditentemunyiibwa dinène dyàkampèèshàYe ànu àbìdì àdì panshì aa, ne nebikèngele bwà mèmè kwimana ku cilumbulwidi ne bantu abu ne—ne nengiikale mwambùle bujitu bwàbò anyi? Kì mèmè kumòna miliyò ayi miimàne mwaba awu, mèmè kwamba ne: “Nwènu bwònsò nudi ba-Branham anyi?”

Yèyè ne: “To.” Yèyè ne: “Mbaùdi wèwè mukudimwishe mucimà.”

Kì mèmè kwamba, mèmè—mèmè kwamba ne: “Ndi muswè kumòna Yesù.”

Yèyè ne: “Kì mpindyewu to. Nekwanji kupita cikondo kumpàla kwà kulwaYè. Kàdi Yèyè nealwe kùdi wèwè dyàmbedi ne wèwè neulumbulwishiibwe ku Dìyi diwàkayiishà adi, ne bòbò mbiikishile pa Cyòci aci.”

Mèmè kwamba ne: “Nebikengelè bwà kwikalabi nàнку bwà bwònsò anyi? Nebikengelè bwà Pòlò kulumbulwishiibwayè anyi?”

Yèyè ne: “Èyowà, Pòlò ùdi ulumbulwishiibwa pèndè, ne musumbà wèndè wàkayiishàye.”

Mèmè kwamba ne: “Ndi muyiishe Mukenji ùmwèùmwe wàkayiishàye awu.”

²⁰⁸ Kì miliyò ayi kwelabò byanza muulu e kwambabò ne: “Pa cyòci aci mpatùdi biikishile!” Kì bwalu mbwòbù abu's, nudi numòna's, ànu mwaba awu! Èyowà's. Yèyè ne: “Pashiishe bwònsò pàmwe netwàlukile pa buloba bwà kupeta mubidi ùdi mwà kudyà, ne twètù kunwà, ne kusòmba pàmwe munda mwà bikondo byònsò byà kabìyi ndekeelu abi.” Kì dilwa dyà Mukalenge ndyòdi adi. Èyo.

²⁰⁹ Mpindyewu, anji indila kakesè. Mpindyewu, ku. . . Twenda tuseemena ndambù mpindyewu, bwalu mbyenda biya bitàngile ànu bu ku. . . díbà dyà mwanèètù wa balùme ewa kaaba aka bwà mudimu wa dibàtiiza anyi cyònsò cyàkwàtàyè naaci mudimu aci.

²¹⁰ Èyo, mpindyewu, mu cikondo cyà èkèleeziyà eci. Kaa, eci's ncintu kampànda cilenga cyà dikèma's. Mèmè ntu munange

cyôci eci bîmpè be. Munda mwà bikondo byà èkèleeziyà ebi, kùdi nyumà yibidi yidi munkaci mwà kukwata mudimu yàmba kufwànangana menemene kubangila ànu kwònsò aku too ne *apa*; umwe ndingumba, mukwàbo n’Nyumà Mwîmpè. Ki Yesù kwambaYè ne: “Yivwa mitàmbe kutwàngana nkundù mu mùshindù wà mifwànyine kuseeswisha ne Basungula mene bu ne bìvwa mwà kwenzeka.” Nyumà yibidi eyi yidi munkaci mwà kutwà bantu bàayi citampì bwà cilumbulwidi cicilwalwà. Sàtaanà wàkalaya ne wendè...ne yèyè neikale ne bàabûngi kutàmba Kilistò, ne ki cidìye mupete. Mpindyewu, tàbàleelàayi eci ne ntèmà, ne ntèmà menemene mpindyewu patùdi twenda tuseemena ku eci: bitàmbe ne mùvwabi bifwànyine kwikala, kutwà bantu citampì.

²¹¹ Bàabûngi mbafwànàngane ne Evà. Evà wàkiimana ànu ntàntà bule bukùmbàne bwà kuseeswishiibwayè. Bu ne kàvwakù mwimane to, nùnkù kî nkwenzekeku diseeswishiibwa to. Kàdi Evà wàkiimana, ne pààkiimanàye, ki kwàkapetelàye diseeswishiibwa dyèndè nkòkò aku. Pamutu pàà kulamakaja bidya ne...Nudi—nudi nulonda—nundonda ne ntèmà mpindyewu anyi? Tèelejàayi! Cyàkenza ne Evà àseeswishiibwè...Tùcyàmbàayi bwònsò cyàpàmwè, bwà ngiikalè mutwishiibwe ne nudi bacyumvwè: “Cyàkenza ne Evà àseeswishiibwè, yèyè kàakalamakù Dìyi dyà Nzambi mu kaabujimà to.” Sàtaanà wàkamutèelelaDì, kàdi kàakamwambilaku Bulelèlà *bwònsò* to. Nànsha dingumba dyèndè kadyakucyènzaku to. Nwamònu anyi? Kàdi yèyè wàkashàala ntàntà bule bukùmbàne bwà kupeta citùpà cyà Dìyi, kàdi kàyi mwangàte Dìyi *dyònsò* to.

²¹² Nènku ki lutàtù lùdiku leelù ewu ndwòlò alu, virgò mukùtākàne awu wàkashàala ntàntà bule bukùmbàne bwà kupeta citùpà cyà Dìyi kàdi kaciyi Dìyi *dyònsò* to. Èkèleeziyà museeswishiibwe ùdi ùshàala ntàntà bule bukùmbàne bwà kupeta citùpà cyà Dìyi kàdi kaciyi Dìyi *dyònsò* to, kàdi bàvwa ne meeji matòòke ne bàà kweyemena pa bwalu abu. Evà wàkaseeswishiibwa! Bible mmwambe ne: “Wàkaseeswishiibwa.”

²¹³ Adàmà kî ngwàkaseeswishiibwa to. Adàmà ùvwa mumanye ànu menemene ne yèyè ùvwa wenza bibi; kàdi mukàjèndè, munkaci mwà kwenza bintu bìvwaye wenza abi, ùmuswisha bwà—bwà kwabanyangana nendè cìvwà cikàndika aci. Mòna’s, yèyè’s ùvwa muntu mulùme, nwamònu’s, nènku bìvwa—bìvwa menemene bimutàngile bwà yèyè...Nudi bùmvwè’s, nwamònu’s. Ùvwa mumanye ne ùvwa wenza bibi, kàdi Evà ùvwa wela meeji ne ùvwa wenza bîmpè.

²¹⁴ Kaa, kanwènaayikù numòna anyi? S’ki bwà cinyi Pòlò wàkamba ne kabìvwa bikèngela bwà mukàji kuyiishayè Èvànjeeliyò to. Uh-hum. Yèyè ùvwa—yèyè ùvwa mu...Yèyè nguvwa museeswishiibwe. “Ncyèna ngaanyishila mukàji bwà

kulongeshaye, anyi bwà kwangatayè bukòòkeshi nànsha bwà bishi to, kàdi bwà kwikalayè mupùwe.” Nwamònu anyi? “Bwalu—bwalu Adàmà ngwâkenjiibwa dyàmbedi, ne pashiishe Evà. Ne Adàmà kî ngwâkaseeswishiibwa to, kàdi mukàji ngwâkaseeswishiibwa, yèyè mwikàle mu dishipa dyà mikenji.” Yèyè ne: “Nànsha nànkù, mpindyewu, kî mmujimine to; neàsungidiibwe mu kulela kwà bânà (piikalàye ne mulùme), ne bikwàbò, yèyè ùtùngunuka, mu diitabuuja ne didipòpa ne cijila cyònsò mùshindù awu, yèyè neàsungidiibwè. Kàdi kànwitàbidiku nànsha umwe bwà kulongeshayè anyi bwà kwangatayè bukòòkeshi to!” Nwamònu anyi? Pòlò wàkamba ne: “Kanwènji nànkù to!” Yèyè ne: “Mpindyewu, ndi ngeela meeji ne ndi ne meeji à Mukalenge,” mwàkambàye.

215 Bòbò kwamba ne: “Mòna’s, kùdi . . . Mòna’s, baprófetà kuntu kwàka bàakamba ciprófetà ne bàakatwàmbila ne ‘bivwa bikèngela bwà twètù kuyiisha.”

216 Yèyè ne: “Cinyi? Díyi dyà Nzambì ndipàtùkile kunùdi nwènu anyi, ne ndifumine ànu kunùdi nwènu nkàayènu anyi? Muntu yèyè ùdyàmbridila mùdiye wa nyumà anyi muprófetà, àmanyè ne bìndi ngàmba ebi m’Méyi matùma à Mukalenge.” Nwamònu anyi? Ncyà bushùwà. Úvwa mumanyè bivwàye wàmba abi.

217 Kàdi kwambaye ne: “Yèyè mwikàle mupangi, ikale ànu mupangi. Kwajiki. Yèyè—yèyè kàyi muswè kuCitéèleja, èè, mulekèlaayi ànu àtùngunuke, ùyaaya mutàngile buludi ànu mu lupòngò. Nwamònu’s, kàdi tùngunuka wèwè ànu ne kuya mutàngile kumpàla.” Kàdi mwaba awu, nyumà yibidì ayi.

218 Dilukakaja dyà meeji. Ànu mùdibò ne bakàji mu bisùmbù byà bampùlushi, mu mìsèèsù amu. Aci’s mbundù bwà dibendelà dyà beena Àmèrikè, bwà kutèeka baamaamù abu mu mùsèèsù. Pàdi binunu makumi byà bantu balùme kabàyi ne mudimu to! Mòna’s, nditùnga dyà mukàji, mmwaba wà mukàji, mukàji neakòòkeshè. S’ndikuukwila dyà mukàji. Nnyumà muswikakaja wa cyena Kàtòlikè awu, bàkuukwila mukàji bu nzambì kampànda. Eci’s ki cidì ànu . . . Ncisòmbe ànu bimpè, kanwèna numòna dilongolola adi anyi?

219 Kakwèna cintu nànsha cìmwè cidì Nzambì mufwànyine kwikala mupèeshe mulùme cyà kalolo kutàmba mukàjèndè to, mukàji wa cyà bushùwà. Kàdi pàdi mukàji ùpeta cintu kampànda cipite apu, yèyè’s—yèyè’s wàyi kwà nàka. Aci’s ncyà bushùwà menemene. Nzambì kàtukù ne meeji à bakàji kukwàtabo mudimu mu myaba yònsò eyi ne kwenzabò bintu byà mùshindù awu nànsha. Bakàji aba, nudi . . . bikèngela biikale ne bânà ne bakoleshè bânà bààbò balela abu. Bòbò bwònsò mbyaiishi bakesè, muntu ne muntu wa kùdibo, kàdi bàdi ne bumpaasàtà bwàbò sungašunga kumbèlu ne bânà bààbò, bàkolesha bânà bààbò balela. Èyo.

220 Mpindyewu, nyumà yìbìdì, yàmba kufwànanngana ànu menemene. Ànu mǔvwa Evà, bu nànkú awu. . . Mòna's, Sàtaanà, yèyè kwamba ne: "Nzambì mmwàmbe. . ."

"Uh-hum."

"Nzambì mmwàmbe. . ."

"Uh-hum, aci's ncyà bushùwà."

"Nzambì mmwàmbe. . ."

"Uh-huh."

221 "Nzambì mmwàmbe, kàdi, kaa, ncyà bushùwà ne Yèyè kàvwakù mufwànyine kutùpìisha to nànsha bu twètù babàtìijìibwe mu dìnà dyà: 'Taatù, Mwànà, Nyumà Mwímpè.' Aci kí ncfwànyine kwikala ànu cyakàne menemene anyi?" Cyena lubombo naanyi wè! Èyowà's, mukalenge. Nzambì kàtukù mwàmbe *nànkú* to!

222 Cintu bu nànkú kacitukù to, twamb'eku twamb'eku. S'mbifwè! Cintu bu nànkú kacitukù to! Ngambilaayi mwaba wùdì dìnà dyà "Taatù, Mwànà, ne Nyumà Mwímpè" disanganyibwa. Kakwèna dìnà bu nànkú to, dībà adì's ndifwè! Ndifwànyine kupàtukila penyi? Mu *Sàadi*, èkèleeziyà "mufwè" awu. Cintu bu nànkú to! "Udi ne dìnà dyà ne udi 'ne mwoyi,' kàdi wamba mùdì 'èkèleeziyà wa beena Kilistò,' kàdi's udi mufwè!" Ncyà bushùwà, kakwena cintu pààci ne ndìnà dyà "Taatù, Mwànà, Nyumà Mwímpè to."

"Kaa, èè, kabyàkwikalaku ànu bímpè anyi?"

223 Kàdi kabyàkwikalaku nànkú to, Pòlò mmwàmbe ne kabìvwa mwà kwikala nànkú to; mmwàmbe ne: "Nwakapeta Nyumà Mwímpè kacya nwitabuuja anyi?"

"Katwèna bamanyè ne kùdikù. . ."

224 Yèyè ne: "Kàdi nwàkabàtìijìibwa mùshindù kaayi?" Yèyè ne: "Lwàyi nubàtìijìibwè cyàkàbìdì mu Dìnà dyà Yesù Kilistò!" Yèyè ne: "Mwanjèlò yèyè mufùme mu Dyulu, mulongèshe cìngà cintu, èdiibwè mulawu!"

225 Ki Bulelèlè mbwòbò abu's! Mémè ndi mwambule bujitu ànu bwà kuBwàmba. Nudi nuumvwa, kí nwènù nangananga to, mbwà mikàbà yà mèyi bündi munkaci mwà kutàndila ebu, nwamònu's, bwalu ndi mumanyè kuyaayayi (myaba yònsò), nènku ki cidìku ncyòci aci. Èyo. Kí. . .

226 Evà wàkaseeswishiiibwa, wàkamòna citùpà cyà Dìyì. Moàbà wàkaseeswishiiibwa. Virgò mukùtākàne wàkaseeswishiiibwa. Èkèleeziyà mmuseeswishiiibwe. Màngumba mmaseeswishiiibwe. Nwamònu anyi?

227 Shààlaayi ne Dìyì! Ki mùshindù ùmwèpelè ngwòwò awu. Shààlaayi ànu naaDì, kanùumuku nànsha ku kantu kàmwè kàaDì to. Shààlaayi naaDì, tungunukaayi ànu ne cidì Nzambì

mwambe bwà kwenza. Nànsha ní nganyi mwámbe cinyì, lamàayi bulombodi bwà Nzambi.

228 Mpindyewu, virgò mukùtākàne awu, yèyè wàkajimija kaaba kèndè, aci tudi bamanyè. Ùdi ùpicila ku cilumbulwidi. Nènku piikalabi ne yèyè ùkaadiku muumvwe Bulelèlè, mmupiishiiabwe. Ncyà bushùwà. Kwàdyàkupetaku Yesù mwaba nànsha ùmwè to ànu mwaba wùdi muMushiile awu.

229 Yudààsè's ùvwa mwà kulwa . . . Vùlukàayi! “Virgò mikùtākàne' mùdi wamba, 'bàvwa mwà kwikala basonsòdiabwe kùdi dyabùlù' anyi?” Kakuyi mpatà to! “Batùngùnuke ànu ne kwikala ne nsòmbelu mukezùke anyi?” Èyowà's, mukalenge. Yudààsè wàkenza nànkù; musùngìdiabwe, mujidiabwe, muyiishe dyondopa dyà kùdi Nzambi, wàkiipata badémons. Mòna's, ùvwa ànu ne nsòmbelu mujalàme, ànu menemene cintu cyà mwomùmwè civwà bakwàbò abu aci. Kàdi pàakafikabi ku Mpenta, ki kwàkaleejaye meekala èndè. Kàakapeta Nyumà Mwimpè to, kàdi kunyemayè ne kuvilayè Mukalenge Yesù. Ki cyòci aci menemene cyàkenzà maèkèleeziyà. Pàakafikabi ku Dibènesha dyà Mpenta, bòbò kuumukaKù. Kaa, kanwènaayikù nucimòna anyi, nwènu batèeleji?

230 Kaa, mpindyewu dilòdò edi Dibwe dinène dyà mùsongà. Kàdi ànu katanci kakesè cyanààna, ngeela meeji ne tucidi ne ndambù mukwàbò wa díbà mwab'ewu, ndi muswè kufika ku cintu cikwàbò kampànda. Ndi muswe kunùle- . . . ci—cimanyinu cyà nyama wa lwonji. Cimanyinu cyà nyama wa lwonji, twàngatàayi Bwàkabuulwibwà 13, katanci kakesè cyanààna. Bwàkabuulwibwà 13:15, ne túbalàayi ànu cidi . . . cyènzàye. Bwàkabuulwibwà 13:15:

Nènku ùvwa ne bukole bwà kufila mwoyi ku cimfwànyi . . . (Mpindyewu, mbwena kwamba ne: “kùdi èkèleeziyà yà Mishòònyi, èkèleeziyà yà Mishòònyi.”)

231 Yèyè ùvwa ne bukole, bwalu bàakenza cimfwànyi: èkèleeziyà yà Mishòònyi. Kupicila ku—ku Nsangilu wa Maèkèleeziyà, ùdi ulongolola kaaba kàkèngela bwà bwobùmwe bwònsò bwà beena Mishòònyi kудisangabò. Mbanganyi bàdi bamanye anyi babale bwà nzùbu munène Musanga udibò nendè bwà maèkèleeziyà à pa buloba? Cyà bushùwà. Nwamònu anyi? Buludi mu . . . mwaba awu mpindyewu, ànu bu mùdi matùnga à O.N.U. Ne yònsò ayi yidi muntwamu, yònsò ne yònsò wa ku yòyi, nànsha mene ne beena Assemblées de Dieu. Bàdimù! Bàdimù, nwamònu's. Cintu's mbwa yidyàngana. “Ànu mùdi ngulube wàlukila ku bitoci byèndè, ne mbwa ku bilùshi byèndè,” mbaalùkile buludi ku cintu cimwècimwè aci (Kakuyi mpatà to!), pabwipi ne kuvila kaaba kààbò kàà butangadiki aku. Nènku's ki bwalu mbwòbù abu, baswè kwikala banène, baswè kwenza maalu bu bakwàbò bwònsò bàà pa buloba, ànu mwàkenza Izalèlèlè pàakamònabo bamfùmù ki kwambabò ne “tùtèèkèle mfùmù.” Nwamònu anyi?

Ne yêyè . . . wàkenza cimfwànyì cyà nyama wa lwonji, ne bivwa bikèngela bwà cimfwànyì cyà nyama wa lwonji aci kwakulaci, ne kwenza ne . . . búngì bwónsò bwàbèngà kukuukwila cimfwànyì cyà nyama wa lwonji abu . . .

²³² *Cimfwànyì cyà nyama wa lwonji, “dingumba dyà Mishònyì”* adi, kadiyì dyà Kàtòlikè to. UdiYè wàmba apa ewu ng’Àmèrikè, nudi numòna’s, bwalu nshapità wa 13 ewu ùdi pa beena Àmèrikè, nyama udi upàtukila mu . . . Nwamònu’s, nyama mikwàbò yònsò yàkapàtukila mu *mâyì*, cìdì cyùmvwija ne “dyungwila ne misumbà yà bantu.” Kàdi nyama wa lwonji ewu, ùdi upàtuka bu mwànà wa mùkòòkò, ùpàtukila mu buloba mùvwa kamùyì muntu to; ùvwa ne nsèngu yìbidi, ne pashiishe kwakulayè bu dragon. Ki kwenzabo cimfwànyì cyà nyama wa lwonji uvwa mu Europe awu, ne kumwenzelabo cimfwànyì cyèndè lwà apa nùnkù. Nsang- . . . ùsanga maèkèleeziyà pàmwè ne kwenza bwobùm wè bwà beena Mishònyì ebu, kì pashiishe kwenzejabò èkèleeziyà mikwàbò yònsò ku bukolè, mu mùshindù wà kabàyiku nànsha mwà kusumba anyì kusumbisha anyì ní ncinyì cìkwàbò kabàyì ne cimfwànyì eci cyà nyama wa lwonji to.

²³³ Mpindyewu tàngilàayi nùmonè cìdì cyènzekà kaaba aka:

Nènku yêyè kwenzaja bwónsò, bwónsò . . . banène, babanji . . . bapèlè, badiikàdile . . . bapika, bwà kupetabò cimanyinu pa cianza cyàbò cyà dyàbalume, anyì mu mpalà mwàbò:

Nènku bwà ne muntu nànsha umwe kamònkuku mwà kusumba anyì kusumbisha to, too ne pùkalàye . . . mupetè cimanyinu, anyì dìnà dyà nyama wa lwonji, anyì nombà wa dìnà dyèndè.

Ki lungènyi ndwòlò elu. Ewu udi ne luumvu àbalè nombà yà nyama wa lwonji, bwalu ùdi . . . nombà wa muntu; ne nombà wendè ùdi Nkàmà yisambòmbò makumi àsambòmbò ne yisambòmbò. (Citùdì bamanyè ne nganyì mwine awu; mbalombodi bàà myânzù bàà Loomò: pààpa.)

²³⁴ Ntu nkàadi mufike mwaba awu mene ne mudìmweneçi, mufwànyine kumanya, lwà kwaka pa mwaba wèndè apu (cyenza bu, nkwaswa wèndè wà butùmbi’s) bu mwàkashikikabo Boniface wa kumpàla, mwisàtù, lwà ku ntwadijilu wa cikondo cyà Kàtòlike eci. Nènku lwà kuulu kwàka kùdi *Vicarius Filii Dei*, mbwena kwamba ne “mupinganyì wa Mwànà wa Nzambi.” *Dei, Dei*, “Bunzambi,” nwamònu’s. Nwamònu’s: “Mupinganyì wa Mwànà wa Nzambi.” Mu ngaakwilù mukwàbò ne: “Ànu mùdì Mwànà wa Nzambi musòmbè pa buloba apa,” nwamònu’s, “makolè ónsò bwà kushintulula Bible,” kushintulula cyònsò cidiye muswè kushintulula aci. Ki bwà cinyì ne: “Amba ‘Mwoyo Màriyà!’” Pààpa ùdi wàmba cinyì? “Netwikalè ne ‘Mwoyo

Màriyà'!" Aci's ncikòse bwalu. Uh-huh, uh-hum. "Èè, netwènzè *cikampànda*." Cidi pàapa wàmba aci, ki cyôci, ki cyôci aci. "Mupinganyi pa kaaba kàà Mwànà wa Nzambi."

²³⁵ Ànu àbìdi àdi panshi aa bàakapatula díyì diswika adi dyà ne "Màriyà kààkajiikiibwakù to," (Pààbi kùdi lukità lwèndè ne byònsò bifùnda mwaba wàkajiikiibwaye awu.) kwambabò ne: "To, wàkajuuka cyàkàbìdi ne kubiishiibwa ku lufù." Pàapa kwambaye ne: "Bìdi nànkù!" ne ki cyôci aci ànu nànkù. "Kabyèna mwà kupangilaku to, wamònu's," pàapa awu ngwàkamba nànkù. Nwamònu's: "Mupinganyi wa Mwànà wa Nzambi."

²³⁶ Ki yèyè ne: "Mpindyewu, muntu yònsò udi muswè kumanya ne nyama wa lwonji awu nganyì, ne kùdi bwinè bukolè ebu bufùmine," Mbambemù ne: "balàayi nombà ayi ne ewu udi ne lungènyi. . ." Mwaba awu, ki òmwè dyà ku mapà à Nyumà Mwimpè ndyòdi adi, lungènyi. Nwamònu anyi? Ewu udi ne lungènyi àbalè nombà yà muntu, bwalu cidi. . . àbalè nombà yà nyama wa lwonji, bwalu nombà wa muntu, ne nombà wèndè ùdi nkàmà yìsambòmbò makùmi àsambòmbò ne yìsambòmbò. Mpindyewu, nudi nwangata kùdi. . . ne nwamba maleeta à dìnà adi, V-i-c-o, nènku—nènku ànu bilondèshile ne myàku ayi, kàdi nwlè mushoonyi mwìnshì emu ne. . . anyi kusangisha biishiferi byà cyena Loomò abi, nènku nenùsangane mwab'ewu ne nudi ne nkàmà yìsambòmbò ne makùmi àsambòmbò ne yìsambòmbò. Ncyà bushùwà.

²³⁷ "Nènku mpindyewu twènzàayi cimfwànyì cyà nyama wa lwonji awu." Nènku mu ditùnga edi mbènze cimfwànyì: nsangilu wa màngumba masanga ntete, beena Nikàlàwù bàdisanga ne bàdivwija dìngumba. Ne ndekeelu wa byònsò nebàsangishe bwànà bwètù ebu, kì mbyà kubwelamù bu mwena Kàtòlikè to, kàdi nebùikalè bàdisange bu bwànà bwètù bwà kuteeta kutònkola Communisme.

²³⁸ Ne Bible mmwambe ne Nzambi wàkajuula Communisme bwà kusombwela pa matùnga bwà bidìbò benzèle bânà bàà Nzambi. Aci's ncyà bushùwà menemene. Yèyè ne: "Nènku bôbò—bôbò—bôbò bàdi bàfila bukolè bwàbò ne bikwàbò byònsò kùdi nyama wa lwonji bwà díbà òmwèpelè, nènku bwà kusombwela cisàmbà, kùdi. . . bwà mashi àkeelabo panshi." Ne piikala bômbè bwà mushindà abu anyi ní ncinyi cyònsò mwà kulenga Cimenga cyà Vatican aci, ne bulombodi bwà beena Loomò abu kabwàkwikalakù kàbìdi to, Mbàmbe ne: "Ne munda mwèndè mwàkasanganyibwa mashi à mufwile diitaba yònsò wàkashipiibwaku pa buloba awu." Nènku's ki yèyè awu. Nènku ki cimfwànyì cyèndè ncyôci aci, nsangilu wa maèkèleeziyà.

²³⁹ Kakwàkunenga to netwìkale ne cyà kukanga biibi abi kuntwaku, ncyà bushùwà, anyi kwangata cimanyinu cyà

cyena mângumba. Nènkù netùkange biibi, ncyà bushùwà, netwikale. . .tudi bamanyè bimpè bipite apu.

²⁴⁰ Mpindyewu, mpindyewu, ndi muswè, ànu bwà dicinta citùpà cidi cilonda, kumpàla kwà twètù kuumuka mu tusunsa tukesè tudi tulondà etu. Mpindyewu, *Citampì* cyà Nzambi cidi “Nyumà Mwimpè.” Bwònsò mbamanyè aci, kî mmwômò anyi? Èyo, twètù bwònsò tudi bamanyè aci, ne *Citampì* cyà Nzambi n’Nyumà Mwimpè. Mpindyewu aci cidi cisanganyiibwa. . . Angàtà Bwàkabuulwibwà 9—9:1 too ne ku 4, neùsanganè ne bwònsò bàvwa ne citampì pa mpàlà pààbò. Kolintò wa Kumpàla 1:22, Pòlò mmwámbe ne: “MùdiYe mutùtwishile citampì kùdi Nyumà Mwimpè Wendè too ne ku ditùkù. . .” Efèsò 4:30, ùdi wàmba ne: “Kanùbungamiji Nyumà Mwimpè to,” awu m’Mwanjèlò wàkapàtuka awu mwikàle ùtwa citampì pa mpàlà pààbò. Mpindyewu, aci kî mbwena kwamba ne wèwè. . .ne Yèyè ùdi wàngata ne ùtèeka ditòba mwaba awu; mpàlà webè ki dibuulula dyèbè, wamònu’s, ne cyanza cyèbè ki cintu cyùdi wèwè wenza pa bwalu abu. Wamònu’s, ncimanyinu cyà nyumà. Nwamònu anyi? Kèna wàngata citampì cinène bwà kukutwà mùshindù *awu* to. Kaa, to.

²⁴¹ Ànu mwàkambàbo mwaba ewu ndambù wa bidimu bishààle ebi, pàvwà N.R.A. mupàtùke, cìvwa *cikampànda*, *cikansanga* anyi. . .Kanwindidi aci to, cìkaadikù. Bible mmwámbe ne cyàkabanga kacya kale wàwa, cìkaadi ku ndekeelu mpindyewu. Nwamònu anyi? Ncyà bushùwà.

²⁴² Kàdi Yèyè wàkenza cimanyinu pa Batwibwe citampì. Nwamònu anyi? Mpindyewu, mmunyi—mmunyi mùvwà citampì cyà kumpàla, cìvwa cìfwànàngane ne cinyi? Bààkuujiibwa tètè ne Nyumà Mwimpè, ncyà bushùwà, ne byenzedi byàbò bìvwa byenzedi byà Kilistò. Bàvwa bàtentekela babèèdi byanza ne babèèdi bàsàngala, bàvwa bènza bimanyinu byà mùshindù yònsò ne bishimà ne maalu à kukèma. Ne pa mpàlà pààbò, bààkatwibwa citampì kùdi dibuulula dyà ne Yèyè ùvwa Mwànà wa Nzambi, nènkù bàvwa—bàvwa bàkwàta Nendè mudimu (Bunzambi bwà—bwà Kilistò), ke cimanyinu ncyôci aci.

²⁴³ Wèwè udi wamba ne: “Èè, mpindyewu, Yèyè’s m’mpèrsonà mwisàtù, anyi mupèrsonà mwibid- . . .” Kwèna mwanji kwikala ne citampì to, pa nànkù Cilekele ànu—ànu kwàci kwà tálàlà. Wamònu’s, wèwè ukaavwa kwà nàka, mumana kuumusha mwaba awu, pa nànkù kakwèna cintu cyà mùshindù awu mu Bible to. “Tudi tubènesha. . .Tudi twitabuuja bùsatu bunsantu.” Udi kule. . .Kwèna nànsha pabwipi ne bwalu mpindyewu to, wamònu’s, bwalu cintu pààci ne *mbùsàtù* kacitukù nànsha citèèdiibwe mu Bible to. Petaayi mwàku *bùsàtù* mu Bible kàdi nùlwe.

²⁴⁴ [Katùpà kàà mukàbà wa mèyi munda mutupù—Muf.] . . ?. . . mu Mwànà, mubiikidiibwe ne buumwànà; mpindyewu Yèyè

ùdi munda mwèbè, dibàtiiza dyà Nyumà Mwímpè; Nzambi umwèumwè awu. Nyumà Mwímpè nguvwa Taatù wa Yesù Kilstò. “Katancì kakesè aka bàà pa buloba kabààkuMmòna kàbìdi to,” mwàkamba Yesù, “Ndi mufùme ku Nzambi, ne Ndi ngààlukila ku Nzambi (Nyumà Mwímpè cyàkàbìdi). Ne Nèngìikalè neenù, munda mwènù mene, too ne ku ndekeelu (ku dikumbàna dyà maalu ònsò). Ku ntwàdijilu ne ku ndekeelu, Nèngìikalè ànu mu nwènù ànu mùvwa. . . Ne byenzi mene bìndi Mémè ngenza nenùbyènzè pèènù. Bintu bìndi ngenza nebitungunuke ànu nànkù, ki bìikalà cimanyinu cyà mwena kwitabuuja too ne ku ndekeelu. Ndàayi nukayiishè, nubàbàtiize mu Dìnà dyà Mukalenge Yesù, ne nebùujiibwe ne Nyumà Wanyì; nènku piikalabi nànkù, bimanyinu ebi nebifile bàdi biitabuuja, too ne ku ndekeelu kwà buloba. Ndi neenù misangu yònsò, too ne ku nshìikidilu kwà buloba.” Yèyè wàkambwibwa mu Butumbi. Ki cyòci aci, ne tudi batèkèmène ne Yèyè nealwe dīngà ditùkù. Mpindyewu, ki Citampì cyà Nzambi ncyòci aci, aci tudi bamanyè.

245 Nènku vùlukàayi ne, kùdi ànu bantu binunu lukàmà ne makumi ànaayi ne binaayi byà beena Yuda batwibwe citampì, bàvwà bashààdile bàà beena Yuda bashààle kuntwaku. Kàdi mu cyòci eci, mu Mukàji-musèla wa bàà Bisàmbà byà bendè, mu Mukàji-musèla wa bàà Bisàmbà byà bendè, kùvwa binunu makùmi kuvudija ku binunu, byà aba batwibwemù citampì, bwalu ki bòbò abu bafwile diitaba ne bikwàbò bàvwà bapicile mu bikondo amu; nebàjuukè mu ditùkù dyà cilumbulwidi.

246 Nudi nwela meeji ne ncinyi cyènzekà pàdi makàsà à cilumbulwidi cyà cyamu cyà kalaabi aci ciimane mwaba awu mu ditùkù adi ne bafwile diitaba abu biimane mwaba awu kumpalà kwà beena Loomò abu (pàmwàpa beena Nikàlàwù kuntwaku bàvwà babwòshile ku makunji à cyoshelu ne babiimanshe mu biinà byà nyama yà ntambwe ne bintu byà mùshindù awu), kàdi biimane mwaba awu bu ndumbùlùlà wabò ku cilu- . . . tubàdi aku? Nènku Nzuji musòmbe mwaba awu pa nkwasà awu ne: “Wèwè uvwa mubàyiishe Èvànjeeliyò anyi?”

“Mémè ngàakafila mwoyi wànyi bu citampì kwaka mukana mwà ntambwe bwà bwalu bwàbò.”

247 Akàà, mwanèètù! Wamba bwà ne “nguuMùkilaayi apa,” iferno neikalè mutambe bulenga bwàbò bòbò! Aci’s ncyà bushùwà menemene.

248 “Kwàtaayi bikolè. Ndi mumanyè aba bàtù bàdibìikilà. . . (Beena Nikàlàwù), kàdi bàdibìikila mùdibo ‘buujiibwe ne Nyumà’ kàdi kabiyi nànkù to.” Mwaba awu, nwamònu’s, ki bwalu mbwòbù abu. Kaa! Ndìbà kaayi dilwalwà, ncikondo kaayi cyà cyènzà bwòwà. Nzambi neàsombwele’s! “Nènsombwele,” mùdi Mukalenge wamba, “Nèmfilè difutu’s!” Ne cyenzi cibi cyònsò necipeté ànu. . . Cintu cyònsò cyùtuku mwenze anyi

mwelè meeji mu nsòmbelu webè nebakubadilèci kuntwaku, pa cintu cinène cyà cikwata bintu aci ne meeji mabì ónsò àdi mapicìle mu meeji ènù awu. Nyingàlalaayi, nwènú bàna!

²⁴⁹ Kùdi mùshindù ànu ùmwèpelè wà kushiyangana naawu, kubwela mu Kilistò, nènku paùdi ubwela mu lubadi Lwèndè lunanga lwà mpùtà yìtaanu amu, mpùtà yìtaanu yà mushinga mukolè mu mubidi Wèndè, paùdi umòna dizòloloka dyà mashi kuntwaku nènku neùsokomenèmù, wamba ne: “Lubwebwe lwà Bikondo, ncyèna mwímpè to. Nsokòkemu, Lubwebwe lwà Bikondo.” Òmwwa Nyumà Mwímpè wa mushinga mukolè awu, fwàku ànu wèwè ne wendele pa mazuwa mu mubidi wà Kilistò; ubiike, bwà kubiishibwa ku maalu mapyamàpyà, díbà adi mbantu bapyabàpyà bakunyùngùlùkile. Mpèkaatù yùvwa kale wàwa munange ayi mmishààle paanyimà pèèbè. Kaa, kakwena cintu nànsha címwè cicilwalwà, cintu nànsha címwè cidiku mpindyewu, lufù, cintu cikwàbò nànsha címwè kacýakukutàpululaku ne Cyòci aci to. Udi mutwibwe citampì too ne ku ditùkù dyà bupikudi bwèbè, kùdi Nyumà Mwímpè. Udi mupetè dibuulula dyà ne Yèyè ùdi Nganyì. Udi mumanye munda mwà mwoyi webè ne ukàadi muumùke ku lufù muyè ku Mwoyi.

²⁵⁰ Tàngilàaku byenzi byèbè ne byanza byèbè díbà adi, udi umòna’s. Kucyèna kàbìdi wiba to, kucyèna wenza kàbìdi maalu mabì to. Byanza byèbè kabyèna ne mashi to. Nènku udi ujjuuka, uyiisha Èvànjeeliyò, wamba cidì cilelèlè, ne mwikale ne nsòmbelu mujaalàme, ne wenza cidì cimpè, ne Nyumà Mwímpè ùdi neebè ùleeja bimanyinu ne maalu à kukema ditùkù dyònsò edi; Nzambì ùkufikisha ku dimanya ne: “Wèwè udi mwànà Wanyi mubènèshìibwe ne Ndi neebè, Ndi—Ndi ànu neebè. Nànsha wèwè usanganyibwa penyì, mèmè Ndi neebè. Nènye neebè mu mèbà à mídimà ne mu myaba yònsò.” Kaa, Lwongò kaayi—kaayi’s wè!

Ngèdi lwongò lwà musùukà wànyì mu mwaba
wà diikisha,
Bwà kubenga kwendela kàbìdi ne màzuwà pa
mbù mitombòke;
Kaa, cipeepèlè cìkolè cidì mwà kutuuta bibi,
cyà cipupu cìkolè,
Kàdi mu Yèsù ndi mu dikubiibwa kashidi ne
kashidi.

²⁵¹ Nànsha mene lufù lulwè kwimba lukunyùngùlùkile àmwè à ku matùkù aa, ne lùbùuka lunyunguluka bu lubùlùbùlù ku mutù wèbè mùshindù awu, udi mwà kwamba ne: “Wèwè lufù, kalonda kèèbè kàdi penyì?”

²⁵² Bu mwàkafùnda Sarah dìndà kampànda, mwanàànyì mukèsè wa bakàji udi musòmbe paanyimà pààpa wàwa. Òvwa ufùnda tuubintu pa mabèji, yèyè ne mwànà wa bakàji mutekète wa Mwanèètù Collins, ngeela meeji, pa címvwà njinga

kwamba aci. Pa nàнку mvwa mbala cibèjibeji aci, mamwèndè ne mèmè, ki yèyè ne: “Mukàndà wà ditombokela ditùnga.” Amen. [Mu Anglais myakù *bwàkabuulwibwà* ne *ditombokela ditùnga* yìdi yàmba kufwànangana mu nshindumwinu—Muk.] Yèyè ne . . . Nènku nudi bamanye kaabwalu kakesè kàmvwà mulondè ku ndekeelu bwà *lufù* aku, nudi bamanye’s. Nukaadi bakùmùmvwè, *kalùyì ne kalonda to*. Ùvwa mwaba ewu dîbà adi pààkalondiibwàku anyi? Nwamònu’s, lufù musangu kampànda lùvwa ne kalonda munda mwàlù, kàdi pàvwà . . .

253 Sàtaanà kàvwa mutwishiibwè ànu menemene ne Muntu awu ùvwa Mwànà wa Nzambì anyi to. Nudi bafwànyine kumumòna mwimane mwaba awu pàvwà . . . Sàtaanà ùlwa kùdiYe wàmba ne: “Èè, bu Wèwè mwà kwenza bishimà, paWìkala mwenji wa bishimà, Udi Mwànà wa Nzambì awu. NènKwàmbilè, mbafunde mu Bible, nwamònu’s, ne . . . Nènku—nènku piikalabi ne—piikalabi ne Wèwè udi, Enzaaku cishimà tumòne. Mpindyewu, Wèwè udi ne nzala, Kwèna mudyè munda mwà matùkù makùmi ànaayi to, cyÙdì kùyì wangacila dibwe dyàdya ne udyèna dyàmpà kàdi kusòmba panshi ne kudyà cinyi? Cyenzebi Wèwè tumòne nènku nèngitabuujè ne Wèwè udi Mwànà wa Nzambì.”

254 Yèyè ne: “Muntu kààkwikala ne mwoyi ànu ku dyàmpà nkààyaadi to, kàdi ku Diyì dyònsò.” Kaa, ekelekèlè! Kumanyaye ne kàvwa mutuutakèène ne Mòsà mwaba awu to, kì mmwòmò anyi? Mòsà wàkiimansha mabwe à mèyì matuma ne kuàcibula; kàdi ùvwa mumanyè ne mmudituute ku mutàmbe Mòsà.

255 Pashiishe kuMutùntumunaye, kwambaye ne: “Udi umòna makalenge ònsò à pa buloba anyi? Kùdi États-Unis, kùdi Grande Bretagne, kùdi bwònsò abu balwè muneemu mu bidimu bilwalwà ebi.” Yèyè ne: “Nebiikalè bàànyì mèmè muntu ne muntu, bwà aci’s Udi mumanyè.” (Awu’s ki udi uàkòòkeshà.) Yèyè ne: “Ngàànyì mèmè ne nèngènzè naawù, ndi ngàtuma ku mvità, ndi ngènta naawù cyònsò cindì muswè kwenza aci. Ngàànyì mèmè.” Yèyè ne: “NènKupèèshèwu bu Wèwè ànu mwà kunkuukwila.”

256 Yèyè ne: “Nkàtùkilaapù, Sàtaanà.” Ùvwa mumanyè ne Yèyè nguvwa mwà kulwa mupyànyì wawù nànsha bìshi, ku ndekeelu, ki kwambaYè ne: “Nkatùkila apà, Sàtaanà.”

257 Ndekeelu wa byònsò pààkaMupwekeshabo kuntwaku dîngà ditùkù, ki bóbò—bóbò kwangata mukùsù wà cilàmbà kuMujingilabo kwisù mùshindù *ewu*, ndi ndifwànyikijila lubondya lwà kale lwà manyaanu, kàdi kwangata . . . kuMujingilalù ku mutù. Kàdi musòmbè kwàka, ùzònta mashi ne mutàpa mputà. Lupeepèlè lwà dîndà, lwà mashìka lùtuuta. Bàkaavwa baMwele mfinbù, ne mashi biMupwekela pa makaaya, kuMukupilabo cintu kampànda cimunyùngùlùke mùshindù *awu*; ne mashi awu àMupwekela paanyimà, wa bwalu

musòmbè mwaba awu, ne cifulu cyà mèbà ciMukokela mwísù mùshindù awu. Ne mashi, ne makòdi à kùdi bàsàlaayi, kwísù Kwèndè kwònsò, musòmbè mwaba awu. Aci kacivwa cintu cyà mmwenekelu mubi kumòna anyi? (Éyi Nzambi wa yààya!)

258 Wèwè udi wamba ne: “Èè, bu ngikalakù, nùnkù’s ndi mwenze cintu kampànda pa bwalu abu.” Èè, bwà cinyi kùyiku wenza cintu kampànda pa bwalu abu mpindyewu? Bwalu bu wèwè. . . Nùnkù’s udi mwenze cintu cimwècimwè cyùdi wenza mpindyewu eci.

259 Ki Yèyè awu, musòmbè mwaba awu, musekiibwe ne mutwila matè. Kì bayiidi abu biimanè paanyimà apu, bàmba ne: “Kaa, ekèlekèlè, Cyôci aci ncifwànyine kwenzeka bìshi? Muntu awu, Yèyè uvwa mwà kubiikila muntu mufwè bwà kupatuka mu lukità awu, kàdi n’Yèyè awu mwaba awu.” Kàdi bòbò bààkapanga kumanya Mifùndu. Kì cyôci aci, nwamònu’s.

260 Ne pa nànkù, mashi ne makòdi mwísù Mwèndè. Bòbò kuMujingila mukùsu kwísù, bàmba ne: “Udi mumanyè’s, mbangambile ne ‘Yèyè uvwa ne dijingulula dyà nyumà, udi mumanyè’s. Yèyè mmupròfetà, Úvwa mwà kwambila bantu maalu. Wàkambila mukàji wa ku ciinà cyà màyi bwà mpèkaatù yèndè. Kàdi’s Wàkambila Simona ne dìnà dyà tatwèndè dīvwa n’Yona, ne byònsò abi.’ Twànji tumònààyi bi ní Údi ne mùshindù, cidiYe mwà kwenza mpindyewu aci.”

261 Kwambabò ne: “NetùMupèèshè kaaditeeta kakesè.” Awu ndyabulù munkaci mwà kukwàcila mudimu munda mwà bantu abu. KuMujingilabò mukùsu kwísù mùshindù awu, kwangatabo dikombo ne kuMuboboladi munkaci mwà mutù, bàmba ne: “Ní Udi mupròfetà, utwàmbilèbi wàKutuutù awu.” Kààkabuululaku nànsha mukana Mwèndè to, Wàkasòmba ànu mwaba awu.

262 Sàtaanà kwambaye ne: “Udi mumanye ne aci kaciyèna mwà kwikala. . . aci—aci kaciyèna mwà kwikala Nzambi to.”

263 Ncintu cimwècimwè aci cidi dingumba dyà kale adi dyàmba leelù ewu ne: “Musumbà wa bansantu babunguluki bàà mu malaba bàaba, aci kaciyèna mwà kwikala Nzambi to.” Kàdi kì mbamanyè to. Kì mbamanyè to. “Aci kaciyèna mwà kwikala Nzambi udi wenza bintu abi to, aci’s ndubùku. Bòbò—bòbò mbatèmpi bàà mbùkù.” Kabàvwa ànu bàCyùm vwa to, kwajiki.

264 Kì kubangabo—kubangabo kubanda kakùna aku, kuMujingilabo mùzàbi awu pambidi. Bilàmbà bimwèpelè bìvwàYeku naabi abi, ngeela meeji, pàvwàYe muntu, Mariyà ne Marta mbààkaMutelelè kàà mùzàbi kakesè aku, katela kònsò, kakàyi mutelu. Kukatèèkabo paanyimà Pèndè. Nènku kùvwa tuumatoba tukesè atu pa cinkùtù Cyèndè pàvwàYe wènda ubànda kakùnà apu; wènda ùdikoka, ùtondoka ne nkùrusè wa kale awu. Nènku kaamubidi Kèndè kakesè, kàà kalèndàlèndà aku kènda kàya; ne bòbò biikale bàMwela mfimbu, ne bikwàbò byònsò, bàMufikisha ku ditungunuka mùshindù awu. Nkùrusè

wa kale awu udikuma ne: “mbon-mbon,” ne ùpùlula makaaya Èndè, eku Yèyè utetuka, kàdi Ûvwa ànu mutungunuke.

²⁶⁵ Nènku tutoba tukesè atu kwendatu ànu tutàmbà kudyunda, mu mùshindù wà ne paanyimà pàà katanci kudyenzatù twònsò mu dikeji dimwè dinène. Sàtaanà wa kale awu kuseemenaye, nudi bamanyè's, mu mmwènekulu wa “lubùlùbùlù,” lwà *lufù* alu, nudi bamanyè's, kwambaye ne: “Ha, ha, ha! Acì? Nzambì kàvwaku mufwànyine kwenza nàнку to.” Yèyè ne: “Ùdi ànu muntu, Ûvwa ànu ùseeswishangana.” Ûcìdi ànu wela meeji nàнку. “Ùdi ànu useswishangana, nàнку's nèmMusùmè. Wìkala Nzambì Kàvwa mwà kufwà to. Nàнку mèmè—mèmè nèmMusùmè kàdi tumòne cyenzeka, mùshindù awu. Mèmè—Mèmè nèmMuteetè.”

²⁶⁶ Pa nàнку pààkaMupetelàYe pa nkùrusè, kuMucìmpikaye kalonda aku; kàdi pààkenzaye nàнку, kujìmijaye kalonda kèndè aku. Awu's ùvwa mutàmbe ne muntu, wàkasùma Nzambì musangu awu!

²⁶⁷ Nènku ki bwà cinyì wàkamba ne: “Wèwè lufù, . . .” pàvwa Pòlò . . . Nudi—nudi bamanyè's, lubùlùbùlù, paanyimà pàà lòlò lumanè kusùma mu ndòndò, kalwèna mwà kusùma kàbidì to. Dìbà adi nkujike bwà lubùlùbùlù alu's. Lùdi mwà kukungula ne kwenza mutooyi, kàdi kalwèna—kalwèna—kalwèna mwà kusùma to, bwalu kalwèna ne kalonda to. Pa nàнку lufù kalwèna kàbidì ne kalonda to. Pòlò, pàvwàbo balongolola mwaba bwà kumukosa mutù, lufù lùvwa lùsùm- . . . lukungula lumunyungulukila, yèyè ne: “Wèwè lufù, kalonda kèèbè kàdi penyì?”

²⁶⁸ Lukita kwamba ne: “Pòlò wèwè, nènkupetè. Nènkuminè.” (Ngàkaya mwaba wàkamukòselabo mutù ne kumukupabo mu mùkidì wà mwìnshi mwà buloba awu.) Lukita kwambalù ne: “Nè—nè—nènkunyè mubidi wèbè, Nènkubolèshè.”

²⁶⁹ Ki yèyè ne: “Kaa—kaa, Wèwè lukità, bucìmunyi bwèbè bùdi penyì?” Nwamònu anyì? “Kàdi twasàkidila kùdi Nzambì Udi utùpèèshila bucìmunyi ku Mukalenge wetù Yesù Kilistò!” Lufù lwàkajìmija kalonda kààlù bwèndè yèyè. Yèyè ne: “Ndi mulwangane mvità mimpè, ngàjikijì lubilu lwànyì, ngàlami Diitabuujà. Nènku kubangila ku leelù kùdi cifulu cyà butùmbi cyà bwakàne cintèekela kumpàla eku cyàmpèèsha Mukalenge Nzujì mwakàne mu ditùkù adì. Kàdi kì ng' ànu mèmè nkààyanyì to, kàdi aba bwònsò bàdi banangè dimwènèka Dyèndè.” Amen! “Nkòsaayi mutù mpindyewu panwìkala baswè.” Huh! Kaa, ki—ki cyòci aci. Ki mùshindù ngwòwò awu, mwanèètù. Ki—ki Nyumà mulelèlè wa bwena Kilistò awu.

²⁷⁰ Mpindyewu—mpindyewu, wèwè mupete mpùngà, udi upeta cimanyinu cyà nyama wa lwonji munyi? Ndi njinga kwamba nùнку ànu bwalu mvwa ndyàmbidila ne nènjikijè mu kwamba kwà bwalu ebu. Udi upeta cimanyinu cyà nyama wa lwonji

munyi? Nudikù baswè kumanya anyi? Bipeta bìdi cinyi? Cimanyinu cyà nyama wa lwonji ncinyi?

²⁷¹ Tudi bamanyè cidi Citampì cyà Nzambi. Citampì cyà Nzambi ncinyi? Èè, tubuululaayi mu Efèsò 4:30, nènku dîbà adi—dîbà adi nucyũmwè, pashiishe ùcibale wèwè mwine mwaba awu. Anyi—anyi bàmwè bàà kunùdi bàdi mwà kupeta Bwàkabuulwibwà—Bwàkabuulwibwà 9:1 too ne ku 4. Ne bakwàbò, Kolintò Mwibìdi 1:22. Kùdi myaba yàbũngì. Ndi mufunde ndambù kaaba aka. Kàdi twàngatàayi Efèsò 4:30, ne dîbà adi nudi mwà kumòna cidi Citampì cyà Nzambi; ne bakwàbò aba, anyi nî mpenyi pònsò. Kebaayi ànu mwaku *citampì* mu mukànda wènu wà myaba yidi myàku awu, wèndè naawu mwaba wònsò ùdi muswè awu. Èyo, Efèsò 4:30, tèèlejàayi eci:

*Nènku kanùbungamiji Nyumà Mwímpè wa Nzambi,
unùdi batwibwe nendè citampì too ne ku ditùkù dyà
bupikudi bwènu to.*

²⁷² Citampì cyà Nzambi ncinyi? Nyumà Mwímpè. Bushuwà's. Èyo, mpindyewu: “Ewu udi kàyì ne Nyumà wa Nzambi kî Ngwanyì to.” Pawikala ne Nyumà Mwímpè, udi citùpà cyà Nzambi bwalu udi Wèndè Yèyè. Yèyè's—Yèyè's mmukutwè citampì ne Ùdi munda mwèbè, ùkwàta mudimu munda mwèbè, ne bimanyinu bìdiYe wènzà udi ubyènza wèwè pèèbè. Mpindyewu, bantu bònsò bàdi bumvwa aci anyi, nwènu batèèleji? Bikèngela Nyumà Mwímpè bwà kwikala wa Nzambi; Nyumà Mwímpè. Nènku wèwè wa Nyumà Mwímpè, udi wenza byenzedi byàkènzà Yesù. Nwamònu anyi? Dinanga dyèbè. . .

²⁷³ PààkaKutwilàbo matè mwísù ne kuKutuutabo bintu mùshindù awu, kakùvwa muji wà bululu to. KupwekeshaYè mèsù kùdibo, kwambaYè ne: “Taatu, bàfwilè luse bwalu kî mbamanyè cìdibo bènza aci to.” Nwamònu's, kabàvwa bamanyè to.

²⁷⁴ Nudikù mwà kudifwànyikijila aci anyi? Bàna Bèndè Sungasunga's bèèla mbilà bàlòmba Mashì Èndè! Mufùki wa maulu ne buloba mulembèlèle pa nkùrusè uvwaYè muDyenzèye awu, mumutòlòkeshe mu buloba. Ne bàna Bèndè Yèyè Sungasunga! (Anji elàayibi meeji bwà bàna bèènu balela, nwènu baataatu, bàna bèènu balela.) BaMwelela lubila ne: “Muumùshaayi! Tupèèshaayi Baalàbààsà, mwivì ùdi kwàka wàwa.”

²⁷⁵ Kaa, mèmè's mvwa Baalàbààsà awu, mèmè's nguvwa mukùmbànyine kufwà kàdi Yèyè wàkangata kaaba kàanyi. Mùshindù mwine wùvwà mukùlumpè Baalàbààsà awu ne cyà kwikala mudyũmwè mu dindà adi pàvwà mukùmà wà makàsà à kamànda kàà mäsàlaayi lukàmà awu munkaci mwà kupweka muntwamu, ne kuunzululaye ciibi. Nènku mukùlumpè Baalàbààsà kwamba ne: “Kaa, ekèlekèle! Mu katùpà kakesè

emu's bwànyì mbutùùke. Mémè ndi mushebeyanganyi, ndi—ndi mwívi. Leelù ewu bàdi bànsipa, ndi mumanyè ne bàdi bànsipa. Nditùkù dyà paasàkà, pa nànkù ncyà bushùwà ne ndi—ndi . . . Ndi mumanyè ne mfwàfwa leelù ewu.” Mubindùlùke, bufùkù bujimà, wàtwa eku ne eku ànu bu ngènzàmpèkààtù mukwàbò yònsò ewu. Katanci aka anyì, ki mulami ulwàlwa ewu. Yèyè ne: “Kaa, kaa, s'ki yèyè ewu. Bikèngela nye, bikèngela nye.” Ki nsapì kudilayi mu cikùvu amu.

Mulami awu kwimanayè tëndé ne: “Pàtukà, Baalàbààsà!”

“Uh-huh, èyowà's. Èyowà, ndi mumanyè ne nyaayà, nyaayà.”

“Bwàlà, ndaaku ùkenza cyùdì muswè kwenza aci.”

“Cinyì?”

“Nda wènzè cyùdì muswè kwenza aci. Patukàaku, udi mudishikàmìne.”

²⁷⁶ “Ndi mudishikàmìne? Mòna's, wèwè's ngudi munkòsèle cibawu cyà lufù.” Ncyà bushùwà, Nzambi mmukòsèle bangènzàmpèkààtù bwònsò cibawu cyà lufù. “Nuvwa bankòsèle cibawu cyà lufù, mmunyì mùndi nya mudishikàmìne?”

²⁷⁷ “Baalàbààsà, vwila kunu. Tàngila, udi wenda ubànda ne kakùnà kwàka wàwa, tèèleja mùdì nkùrusè wènda ùtòndoka mu malaba. Tèèleja mùdì misonso yiMubwela mu byanza. Mutàngile umòne mùdiYe wela lubila mwaba awu, binsonji byà lukèlèkèlè ne mashi bisambàkane bipwekela mu mpàlà Mwèndè. Wàkangata kaaba kèèbè, Baalàbààsà, Wàkakufwìla.”

“Udi uswa kwamba ne Yèyè mmufwè bwà mémè kwikala mudishikàmìne anyì?”

“Èyo.”

²⁷⁸ “Èè, èyo, nèmbangishilulè dishebeyangana dibà adi.” Kaa, ndipangila dyà disàkidila kaayipu's wè! Udi ukùmbanyina kufwà.

Pàndì—pàndì mbandila Nkùrusè wa butùmbi,
Kwàkafwila Mfùmù wa Butùmbi,
Luumu lwànyì lwònsò lùdi ànu lwà patupù.

Kaa, ekèlekèle! Kabyèna bikèmesha to pàakambà mwedi wa kasàlà ne:

Mu kwikala ne mwoyi, Yèyè wàkannanga; mu
kufwà, Yèyè wàkansùngila;
Mujiikiibwe, Yèyè wàkaya ne mpèkaatù yànyì
kule;
Mu dijuuka, Yèyè wàkambingisha cyanàànà
bwà kashidi:
Dìngà ditùkù Nealwe—kaa, ditùkù dyà
butùmbi's wè!

279 Mmunyi mûndiku mufwànyine kuMubènga pândi mmòna cidiYe mungenzèle? Mmunyi mûndiku mwà kwenza nànkú? Ndi mufwànyine kujinga bwà kujìmija mulunda yònsò ûndiku nendè pa buloba apa. Mmunyi, pândi. . . ndi mufwànyine kwikala mudilongolole bwà kwediibwa pambèlu kùdi malongolodi ne kwipaciibwa mene, ne bikwàbò byònsò abi. Pândi ntàngila kwàka, pâmvwà mupiishìibwe bwà lufù, ne Yèyè wàkangata kaaba kàànyi! Cyà bushùwà, Mukalenge. Bintu byònsò, ndi mbala bintu byònsò ebi bu dijimija dyà dîbà. Kaa, ndekèlè nguupukileku Nkùrusè, Éyi Mukalenge.

Munkaci mwà mbwebwe yìtaayika ne maulu
makwàte mîdimà,
Musùngidi wanyi kwinamijayè mutù Wèndè ne
kufwà,
Cilàmbà cikùdika cipandike cyàkasokolola
njila
Udi ufikisha ku masànkà à Dyulu ne ditùkù
dyà kadiyi ndekeelu.

280 Kaa, lekèla—lekèla nshààle pabwîpi Neebè, Yesù. Kungiipàciku kule ne luseke Lwèbè lwà mushinga, bwà kumòna mpùtâ Yèbè yìtaanu yizòloloka mashi. Éyi Mfùmù wa mu Dyulu, mwàkafwàYe, kufwà pa kaaba kàànyi! Kufwà bwà ngaamònâ mwà. . .

281 Mupiishìibwe. . . mu nkànù yà mpèkaatù, mu nzùbu wa buloko wa iferno, mupiishìibwe, mupiile, ngenda nya bwà kabùtudiibwa kashidi, ne Muntu kampànda kwangatayè kaaba kàànyi. Nènkú pashìishe bóbò. . . Munkaci mwà kudima mwab'ewu pâmvwà mu-. . .; pâmvwà ne bidimu bitwè ku dikumi ne mwandamukùlù, makumi àbìdi, dîngà ditùkù Nyumà Mwîmpè. . . Mémè kwamba ne: “Èè, ndi nganyi? Ndi mufùmìne penyi? Nkwèpi kùnyààyà?”

282 Yèyè ne: “Wàkangata kaaba kèèbè, wèwè uvwa wenda uya *kuntwaku*. Wàkangata kaaba kèèbè, ki Yèyè awu.”

283 Mémè ne: “Éyi Mwànâ wa mùkòòkò wà Nzambi! Éyi Mwànâ wa mùkòòkò wà Nzambi, ndwâlwa! Ndi ndwa! Ncyèna ntwâla cintu nànsha cimwè mu mabòkò àànyi to, ncyèna ne cyà kuKulàmbula to, Mukalenge, ànu ku nkùrusè Webè nkùndi nkulama; ki cyònsò cîndi naaci.” Ki kumbwejaYè. KumvwadikaYè bu taatù ne mwànâ mutùùlâvi, kumvwadika civwâlù cipyacipyà pambidi, civwâlù kaciyi cyanyi to, Civwâlù Cyèndè cyà bwakànè Bwèndè cyàkamvwadikàYè pambidi; ne mpètâ wa dibàka ku munu wànyi, ne nêngiikalè mu Mukàji-musèla mu ditùkù adi. Mpindyewu kânâ kâà ngombe kâà maanyi nkashipiibwe, ne tudi tucyònkomoka bwalu musangu kampànda mvwa mufwè ne mpindyewu ndi ne mwoyi, Musangu kampànda mvwa mujimine kâdi mpindyewu ngâpetèkì.

Ngàsà udi ukèmesha! cyonâ cipòle kaayi,

Wakasungilà mukèngeledi wa luse bu mémè!
 (Mubi mutàmbe Baalàbààsà.)
 Kale wàwa mvwa mujìmine, kàdi mpindyewu
 ngäpetèki,
 Mvwa mpofo, kàdi mpindyewu nkàadi mmòna.
 Ngàsà ngwàkalongèsha mwoyi wànyì bwà
 kuciina,
 Ngàsà ngwàkuumusha bwòwà bwànyì;
 Mùshindù mwine wàkamwèka ngàsà awu wa
 musinga mukolè
 Dìbà dingàakiitabujilàkù's wè!
 Patwikalemu bidimu binunu dikumi,
 Bàkenka bikolè bu dìbà; (Kakùciyi kàbìdì
 mìtootò to, Dìbà.)
 Katwàkwikala ne matùkù mashààdile à
 kwimba butùmbi Bwèndè to
 Kutàmba patwàkabanga dyàmbedi. (Dìbà adi
 netwikale mu Cyendèlèlè.)

²⁸⁴ Kaa, mùshindù mwinè wùndì munange Yesù, bwalu Yèyè wàkannanga kumpàla. Kaa, mùdìbi bilenga's wè!

Buulùlaayi pàmwè naanyì mpindyewu mu Ekèsòodè, nwènu baswè, nshapità wa 21.

²⁸⁵ Dikànkamika dyà “Nyumà” Wendè, mpindyewu netwikalè mwà kwakula mpindyewu bwà mùshindù wà kupeta. . . Mvwa munùleejè, ne nnwambila bipeta ne: “s'ki Yèyè *awu*.”

²⁸⁶ Mpindyewu, mmunyi mùdì upeta cimanyinu cyà “nyama wa lwonji”? Nènku nènkuleejè cidì kabùtù kèèbè *kuntwaku*. Mpindyewu, cimanyinu cyà nyama wa lwonji, Ekèsòodè nshapità wa 21. Tuczàngacila mu Dipungila Dikùlùkulu bwà nwàmòna mwà kumòna kaaba aka. Kàbìdì mu Dipungila Dipyadìpyà ndi ne Mifùndu bùngì cyanàànà myadija mwab'ewu yitùdì twètù bwònsò bamanyè. Mpindyewu tubalàayaaku:

Mpindyewu ebi ki bilumbulwidi biwìkala mwà kubàtèekela kumpàla.

Wèwè musùmbe musadidi wa beena Ebèlù, (Mpindyewu, vùlukàayi mpindyewu ne, mmwena Ebèlù, mmwena kwitabuuja, nwamònu's.) . . . musadidi wa beena Ebèlù, yèyè neàkwatè mudimu bidimu bisambòmbò, ne mu cyà mwandamutekète yèyè neàpatukè mudishikàmìne kàyì ùfuta kantu nànsha kàmwè to.

Pùikalaye ùwva mubwelemu nkàayèndè, neàpatuke nkàayèndè: pùikalayè ne ùwva musèlangane, dìbà adi mukàjèndè neàpatuke pàmwè nendè.

Pùikalabi ne mfùmwendè. . . mmumupèèshe mukàji, . . . mumulelèlè bânà bàà balume anyi bàà

bakàjì; mukàjì ne bânà bèndè nebùikalè bàà mfumwèndè awu, ne yèyè neàpatukè. . . nkààyèndè.

287 Ncyàkwikala. . . Ndi—ndi—ndi—ndi mumanye ne dîbà dyànyì dyàyi. Mfwileku luse, Mwanèètù Neville, kàdi bidi bikèngela bwà mèmè—mèmè kutùkija eci nùnkù, mwanèètù.

288 Tàngilàayi kuneeku. Ki ncidì mamwèbè, anyi cidì tatwèbè aci to, bwalu mbwèbè wèwè! Ki mmukàjèèbè to, wamònu's; mukàjèndè kàvwa ùbadiibwa to, bânà bèndè kabàvwa bàbadiibwa to. Bwalu mbwèndè yèyè! Nànsha byòbì ne. . . Mamwèbè ùvwa mufwànyine kwikala munsantu, tatwèbè ùvwa mufwànyine kwikala munsantu; s'ki mùvwà tatwèndè wa Esau ne mamwèndè, kàdi yèyè ùvwa cijijibulundù. Nwamònu anyi? Kàdi, yèyè. . . kàdi mbwalu bwà muntu—nkààyà bwèbè wèwè.

289 Wèwè udi wamba ne: “Tatwànyì's mmuyiishi.” Aci kacýèna ne bwalu neebè to. “Mamwànyì mmukàjì wa difwànà dyà Nzambì. Kaa, yèyè's ùdi mu Dyulu.” Aci ncifwànyine kwikala cyà bushùwà, kàdi bìshi bwèbè wèwè? Bwalu mbwèbè wèwè!

Kàdi pùkàla mwena mudimu. . .

290 Mpindyewu, apa mpààvwàye. . . Mpindyewu tàngilàayi cimanyinu cyà nyama wa lwonji eci mpindyewu. Mpindyewu, ncyèna—ncyèna ne dîbà dyà kwalukila mu bulongame to, bwalu nkushààle tusunsa makumi àbìdì. Kàdi ndi muswè kunwàmbila.

291 Mpindyewu, kulwaku cikondo civwàbo bàkòbola cidimu cyònsò cyà mwandamutekète. Aci civwa mbidimu bisambòmbò. Mu cidimu cyà mwandamutekète (balongi bàà Bible, bambi, ne bikwàbò bàdi basòmbe mwab'ewu, mbamanyè ne eci ncilelèlà.) civwa cibìkidiibwa. . . cidimu cyà mwandamutekète civwa cibìkidiibwa ne ncidimu cyà cyanga; byònsò bìvwa bìikisha. Kabàvwa bàkuna bintu mu cidimu cyà mwandamutekète to, buloba bùvwa bwikisha, bintu byònsò. Bàvwa ànu bàpùmbulula, nwamònu's. Bintu byònsò bìvwa bìikisha mu cidimu cyà mwandamutekète. Nènku mu cidimu cyà mwandamutekète kùvwa mwa—mwakwidi uvwa wela mpungi. Nènku muntu ní uvwa mupika, nànsha mabànza èndè miikale munyì, yèyè ùvwa ùshààla mudishikàmìne.

292 Mpindyewu, aci's ncifwànyìkijilu cyà Mpungi wa Èvànjeeliyò. Udi mufwànyine kwikala mukwàcile dyabùlù mudimu bidimu byònsò ebi, mu nkanu, ne kunwa kwà maala, kunwa kwà mfwankà, kunaya kwà twarta twà mfranga, ne mpèkaatù, ne bintu byà manyaanu, cyùdì mwenze nànsha ciikàle cinyì, kàdi paùdì ànu utèèleja Mpungi wa Èvànjeeliyò ùdila, ncimanyinu cyà ne udi mwà kuya mudishikàmìne. Udi mwà kuya! “Diitabuuja dìdì difùma, [Disangisha dìdì dyàmba ne: “Ku ditèèleja.”—Muf.] ditèèleja dyà, Dìyì dyà Nzambì.” Mpindyewu nukàadi bumvwe Èvànjeeliyò mu kaabujimà, kabyèna bikèngela bwà wèwè kushààla kàbìdì muswikìibwe to.

293 Mpindyewu, wêwè ànu mwà kushààla musòmbe kwamba ne: “Kaa, mvwa muMutèèleje, kàdi ncivwa muMumvwè to.” Nwamònu anyi? Èyo, díbà adi Kàvwa bwèbè wêwè to. Huh-uh. Ngwa aba bàdi bàMutèèleja. Èyo, bu wêwè mwà kuumvwa.

294 Mpindyewu tàngilàayi cyàkambàYe kaaba aka. Mpindyewu bwà kujaadika cyôci eci, mpindyewu tàngilàayi ne ntèmà yònsò ne nùlamè ngeelèlù wenù wa meeji mpindyewu bwà tusunsa tùbidi anyi túsàtù tùdi tùlondà etu.

Kàdi mwena mudimu (S’ki muntu uvwa ne—ne cyà kushààla mudishikàmine awu.) yêyè mwambe patòòke ne: Ndi munange mfumwànyi, . . .

295 “Kaa, ndi muswè kuya mu dijà dyà maja. Ncyèna ndekela maja àanyi bwà muntu nànsha umwe to. Ncyèna ndekela *cikampànda*, *cikansanga*, anyi *cikankènga*, bwà muntu nànsha umwe to; mukàjàanyi, bàna bàanyi, bintu byà pa buloba ebu bìndi munangè abi. Mpindyewu, tàngila kùneeku, Mwanèètù Branham, nènkwambilè, udi uswà kwamba ne bìdi bikèngela bwà mèmè. . . ?” Kabyèna bikèngela bwà wêwè kulekela cintu nànsha cimwè to. Udi ubwela ànu cyanààna, cidi cidiimanyina nkàayaci. Kàdi—kàdi wêwè udi wamba ne: “Èè, ncyèna mufwànyine kwenza aci to. Kabyèna bikèngela bwà mèmè kwenza nàntu to, mèmè ndi wa mu èkèleeziyà ne ndi mwimpè ànu mùdi wêwè anyi muntu mukwàbò yònsò ewu.” Èyo, mwanèètù. Abi’s bìdi ànu bìmpè, udi muumvwe cidi Bulelèlà. “Èè, mpindyewu, tèelejàayi mwab’ewu, kî n’“Taatu, Mwàna, Nyumà Mwimpè’ . . . ?” Èè, wêwè muswè kulama mùshindù awu, nda wêwè ànu kumpàla.

296 Udi muumvwe mùdi Mpungi mudile, ne udi muumvwe cyóna cidiYe mufile. Kàdi Bible mmwambe . . . (Èyi Nzambì wa yààyà!) Tàngilàayi aci! Aci kî ncifwànyineku kumpèèsha cyena-bwalu mpindyewu mene bwà díbà didi dilondà anyi? “Mpungi yêyè ùpàtula mwadi mulubidile.” Piikala dingumba dyènù dyamba ne “Taatu, Mwàna, ne Nyumà Mwimpè,” aci kaciyena cyumvwika bu Mpungi to. “Mpungi yêyè ùpàtula mwadi mulubidile, wadìlongolola ku mvità nganyi?”

. . . mupika yêyè mwambe patòòke ne: Ndi munange mfumwànyi, . . .

297 “Ndi—ndi munange dyabùlù utu—utu ungenzeja bintu ebi awu, abi’s bìdi ànu bìmpè. Kàdi ncyèna ngeela meeji ne . . . Ngeela meeji ne nwènù nutu ànu ne mmwènenu mubùlàkane kuntwaku—kuntwaku. Ndi ànu ngeela meeji ne nudi batàmbe kubulakana be.” Èyo. “Ndi munange bintu. Ndi—ndi ngeela meeji ne bivwa bikèngela twètù kwikala ne bintu binène ebi mùshindù *kampànda*, ne kwenza *cikampànda*, bàà pa buloba . . . Nènku tudi ne maja, tudi ne manayi à mubèlà mu èkèleeziyà wetù, ne bintu byà mùshindù awu, ne twètù bònsò tudi tucyònkomoka, ne bòbò’s bàdi ànu bìmpè mùdi musumbà

kàna wónsò unùdì naawu kuntwaku awu's." Èyo, abi's mbîmpè. Mbîmpè.

. . . ne *ncyàkupatika* kuya mu budishikaminyi bwà Nyumà bùdì wamba ebu to:

Pashìishe mfùmwendè (dyabùlù) neàye nendè kùdì balumbulwishi; ne neàye nendè kàbìdì ku ciibi, . . .

²⁹⁸ Hmm! Cinganyi? Ciibi nganyi? [Disangisha dìdì dyàmba ne: "Yesù Kilistò."—Muf.] "Ndi mutèeke kumpalà kwèbè aku Ciibi." Cimanyinu cyà nyama wa lwonji aci cyàkalwa dîbà kaaayi? Mu cikondo eci mùvwa Ciibi citèèkîibwe. Eci cimany- . . . ditwîbwà dyà ndekeelu dyà cimanyinu cyà nyama wa lwonji edi.

. . . *kumufikisha ku ciibi, anyi ku . . . dikunji; (aci's—aci's ki Kàlvaryò, èyo) . . . ne mfùmwendè neàtùbule dici dyèndè . . . neàtùbule dici dyèndè ne mulonda; nènku yèyè neàmukwacile mudimu bwà kashidi.*

²⁹⁹ "Udi uswa kwamba cinyi, Mwanèètù Branham?" Wèwè muumvwe Bulelèlà bwà Èvànjeeliyò kàdì kubenga bwà kwendelaMu, dîbà adi Nzambì ùdì ùtwa dici dyèbè cimanyinu mu mùshindù wà kùyìku mwà kuDitèeleja kàbìdì to. Ukaadi mumane kusambuka mukalu wà pankaci pàà Mwoyi ne lufù. Pashìishe neùtungunuke ne bulongolodi bwènù, dingumba, matùkù èbè ònsò à mwoy- . . .awu, kashidi. (Endèlaayi mu Bukènkè, nwènù bânà. Ncyà bushùwà.) Neùkwacilè mfùmù awu mudimu bwà kashidi.

³⁰⁰ Biikalè . . . Kanwèna baswè bwà . . . Nwamònu's, Mpungi wàkadila ne yèyè ùdì mwà kuya mudishikàmìne, n'ngàsà wa Nzambì. Neidimu cyà cyanga, dyoya dyà maalu ònsò. Ditùkù dyà mpèkaatù dyàjiki, mwanèètù. Ndi ngambila muntu ne muntu wa kunùdì udi ukwacila mpèkaatù mudimu (pa mukàbà wà mèyi, anyi batèeleji bàdì bàmweka ne mèsù aba), nudi . . . yònsò ùdì ukwàcila mpèkaatù mudimu awu, ditùkù dyà mpèkaatù dyàjiki! Yesù wàkafwà, kabyèna bikèngela bwà wèwè kwenzela kàbìdì mpèkaatù mudimu to. Kabyèna bikèngela bwà wèwè kushààla mukòbame ku twitabàayi ne màngumba nànsha. "Ewu udi Mwànà muvwijè mudishikàmìne ùdì mudishikàmìne bushùwà." Pawikala muswe kuya mudishikàmìne ne kwikala mudishikàmìne mu Mwànà, tàpulukà ne bintu byònsò ne ùMukwacile mudimu, lwàku!

³⁰¹ Kàdì wèwè kùyì muswè to, dîbà adi bulongolodi bwènù, mfùmwebè, yònsò ùdì ukwacila mudimu awu, neàkutwè cimanyinu ku dici dyèbè nènku kwàkwikala kàbìdì ne mùshindù wà kuDyùmva nànsha. Nzambì Yèyè ànu mudìdinge mwakule ne mwoyi wèbè ne "Lwàku, ki cikondo ncyòci eci," kàdì wèwè muCibènge, dîbà adi udi wangata cimanyinu cyèndè, mupapishìibwe ku Bulelèlà. Ki citampì cyà dyabùlù aci's, cimanyinu cyà nyama wa lwonji. Nudi numòna anyi? Cimanyinu cyà nyama wa lwonji cidi cyènza cinyi? Cidi cinwàluja buludi

ku Bwena Loomo, bwena màngumba, nènku kwàkubwelamu ne kushààla mudishikàmìne to; ucikwacila mudimu bwà kashidi. Ki cimanyinu cyà nyama wa lwonji ncyòci aci.

³⁰² Aci's ncikolè, balunda bàànyi, aci's cidi cìtapa, kàdi's ki cidi . . . Mèmè ncyèna mwambule bujitu bwà . . . ànu cidi Bible wàmba.

³⁰³ Mpindyewu, aci cìvwa ncifwànyikijilu mu Dipungila Dikùlukulu cìvwa cìleejà mundidimbì wà dyumvwa dyà Èvànjeeliyò wa luumù lwìmpè ne "Wàshàadi mudishikàmìne!" Kabyèna bikèngela bwà wèwè kuswikiibwa kàbidi to, kakùyì mpatà to udi mudishikàmìne mu Kilstò Yesù. Kakùciyì kàbidi mpèkaatù ne bikwàbò to. Kwèna . . .

³⁰⁴ Nwènu bàdi banange maalu à pa buloba abu, Bible mmwambe ne: "Wèwè munange buloba anyì bintu byà pa buloba, dinanga dyà Nzambi kadyèna nànsha munda mwèbè to." Ncyà bushùwà anyi? Wèwè munange buloba anyì bintu byà pa buloba, dinanga dyà Nzambi kadyèna munda mwèbè to. Kàdi twàmbè bishi bwà bintu byònsò binène bìdi munkaci mwà kwenzeka pa buloba leelù ewu mu dìnà dyà ntèndeleele ebi? Bintu byà pa buloba! Nènku bantu bàtu ànu babyùpukila bu ngulube mu lupangu lwà ngulube, nwamònu's, "Kaa, ebi's mbilenga. Kakwèna kantu nànsha kàmwè pa *Bwalu* abu to!" Nwamònu's, mbatwìbwe citampì ne batwìbwe citampì bwà kashidi. Nwamònu anyi?

³⁰⁵ Mpindyewu nudi bumvwè cidi bàshàadilè bàà beena Yuda abu ne ncinyi, binunu lukàmà ne makùmi ànaayi ne binaayi abi anyi? Mwaba ùdibo basòmbèle, munkaci mwà kwindila mpenyi's? Ànu pa dìbà mene. Nudikù mwà kumòna mpindyewu ne virgò mukùtākàne wíkala kàyì mwà kwangata . . . kàyì mwà kwangata Maanyi awu to, kàdi wíkala mwà kubika ne kwikala mutàpulùke, bimpè ne bibi ku ditùkù dyà nshìkidilu awu anyi? Nudi nuumvwa ne pàdi virgò mu—mukùtākàne utwàdija kwakidila, ànu mùdibi mpindyewu emu, ne yèyè ùdi dijinga ne Eci, wàkaya wènda ùCikeba; cìvwa ànu mpa dìbà adi mene dyàkalwa Mubàki's?

³⁰⁶ Dìbà adi tudi batàmbe kuseemena bishi's? Mpindyewu mene! Tudi naabi mpindyewu ànu mu citùpà cikesè emu, ncyèna mumanyè bìdi mwà kwikala ntàntà bule munyì to. Ncyèna mufwànyine kwamba ne ndìbà kaayi to, ncyèna—ncyèna mumanyè to. Mbifwànyine kwikala cidimu cikwàbò, mbifwànyine kwikala bidimu bikwàbò dikumi, bidimu makumi ànaayi, mbifwànyine kwikala tusunsa makumi ànaayi. Ncyèna—ncyèna mumanyè to, ncyèna mwà kwamba to. Kàdi ndi mumanyè ne tukàadi pabwìpi, tukàadi pabwìpi menemene. Ne Nyumà wa Mukalenge . . .

³⁰⁷ Mpindyewu, nekùlwe cikondo, katanci aka, cùkala èkèleeziyà mwà kubanga ànu kukwàta mashika. Mpindyewu,

mbanganyi bàdi—bàdi bamòne dikwàcika dyà mashika dyà èkèleeziyà mu ndambù wa bidimu bishààle ebi? Cyà bushùwà. Necikabwele mu cinyi? Laòdikiyà. Pàdìbi ne, netwàngacile ku dilòòlò edi ne tùpátule mwanjèlò wa èkèleeziyà wa Laòdikiyà, kucipatùlamu bwà nwámòna mwà kucimòna, ne kumòna Mukenji wèndè ne cìkalaWu, ne ku ndekeelu kwà Cíkondo cyà Èkèleeziyà wa Laòdikiyà pàdiye utentemangana ne ùkadimwanga mu Cyendèlèlèlè dībà adi.

³⁰⁸ Kaa, mèmè ndi ànu muMunange. Kàdi nwènù? Èyowà's, mukalenge. Kaa, kùdi. . . Cìtampì cyà Nzambi ncinyi—ncinyi? Nyumà Mwímpè. Cìmanyinu cyà nyama wa lwonji ncinyi? KuMubènga. Ki bìbìdì abì's. Cìmwè nkumòna, ne. . .

³⁰⁹ Èè, bàdi. . . Kàdi mbanganyi bàvwà pa buloba bàvwà kabàyi baMupetè? “Bwònsò bàvwà kabàyi batwìbwe cìtampì bàkangata cìmanyinu cyà nyama wa lwonji.” Bwònsò, bàvwà kabàyi ne Nyumà wa Nzambi abu, bàvwà ne cìmanyinu cyà nyama wa lwonji. Cìtampì cyà Nzambi's n'Nyumà Mwímpè. Bible ngudi mwambe nànkù. Mwaba wònsò mu Mifùndu wùdi wàkula bwàCì, wùdi wàmba ne n'Cìmanyinu cyà Nzambi, “Cìtampì cyà Nzambi.” Kàdi bwònsò bàvwà kabàyi naaCì abu, ki biine bààkaCìbènga's. Kàdi bààkaCìbènga munyi's? Mu kubènga kuCìtèèleja. Ncyà bushùwà anyi?

³¹⁰ Mpindyewu vùlukàayi ne, mmunyi mùdi upeta diitabuuja? “Ku ditèèleja.” Cìvwa citwìbwa penyì? Mu cyanza anyi? To. Ku mutù anyi? To. Ku dicì, nwamònu's. Ku *dicì*, “ku ditèèleja.” Cyàkenza cinyi? Kwediibwa ku luumvu. “Kwanyì kwajiki,” mùdi wèwè wamba's, “ncyèna muswè kuteeleja kabìdì Aci to. Ncyèna ne cikwàbò cyà dyanza Nendè to. Ncyèna ne cyà dyanza ne Cyòcì aci to.” Bidi ànu bu bòbò. . .

³¹¹ Mwanèètù Neville, nê—nê—nê—nèndekelelè ànu nànkù too ne pìikalà bàmwè. . .

³¹² Mvwa ne cyà kunwambila bwà bwalu bwà ne “mbikolè bwà aba bàvwà bakenkeshila musangu kampànda,” nudi numòna's, “bwà kufikabò ku—ku dibwela mu Bukalenge,” nudi numòna's. Mbyenze ànu mùdi beena kwitabuuja bàà ku mikàlu abu:

Tàngilàayi, *mbikolè bwà aba bàkaavwà musangu kampànda bamana kukenkeshila*, . . . bavwijìibwe *baabanyanganyi bàà Nyumà Mwímpè*,

. . . balabùle bukolè *bwà buloba—bwà buloba bucilwalwà*,

Bu bòbò mwà kupona, bwà kudyàlujululabo bòbò biine cyàkabìdì ku kanyinganyinga; bu mùdìbi ne bòbò bàvwà mwà kupoopela bwàbò bòbò biine Mwànà wa Nzambi pa nkùrusè. . . ne kumufikisha ku bundu bwà patòòke.

ne . . . bamòne mashi à cipungidi, àvwabo basantwishùbwe naawu awu, cintu cyà cyanààna, . . .

313 Nwamònu's, bwà Basungula kwenza ciine aci, kakùyi mpatà to, kabyèna mwà kwenzekakù to nànsha bishi. Kàvwa mwà kucyènza to, nwamònu's. Bwalu cìvwaye mufwànyine kwenza ncinyi? Nwamònu anyi? "Kàdi kubala Mashi à Cipungidi . . ." Mpindyewu, nudi numòna's, pìikalàye musungula ne mu cisumbù aci, kêna mwà kucyènza to. Mbwalu bùdi kabùyi mwà kwenzeka to bwà yêye kucyènza's.

314 Mpindyewu, twàngàci, bacyondole ne mwinshi:

. . . bwalu mvùla . . . ùtu ùlwa pa buloba misangu mivulè, bwà kubwàkaja . . .

. . . ne mèbà ne mingonga bìdi . . . bìdi pabwìpi ne kubengiibwa; ndekeelu wabi nkwohùbwa. (Blé ùdi ne cyà kwangaciibwa Kumbelu mu Diyeèbà.)

315 Kàdi mvùla mufidi wa mwoyi ewu utu umacila byònsò bìbìdi bisoosà bibi ne blé. Bùbìdi bwàbi bìdi bisanka ne bidyumvwa ànu mùshindù ùmwèùmwe awu bwà bwalu abu pàdi . . . ne disànkà pa kumòna mvùla ulwa. Kàdi ku mamuma abo nkunwàbàmanyinà, ní bàdi ne mamuma àbo à cisoosa cibi anyi mamuma à lutete (mpindyewu, lwà blé).

316 Mpindyewu, mònaayi cìdì cìcyènza. Mpindyewu bwà kuleeja mwaba ùdi mukàlu ewu, mwaba ùdi eci . . . ndi nteeta bwà kunùtwadila *virgò* ewu, nudi numòna's, pa nàнку nenù—nenùmwè. Mpindyewu mu mwena kwitabuujja wa ku mikàlu, tàngilàayi nùmonè cyàkenzeka pàakafikàbo ku Kaadèsà-baanèa, bàna bàà Izàlèèlà. Ngàakatwà naaci kumpàla ne nyimà mu Genèsè, ne mpàla ne nyimà mu Ekèsòodè, ne mwaba mukwàbò kàbìdi, nteeta bwà kunùfwànyìkijilaci, nudi numòna, bwà batèèleji kabàcìpangìdiku to.

317 Mpindyewu, pàvwà bantu aba mu—mu cyòci eci . . . mu cimwangì, pàakafikàbo ku Kaadèsà-baanèa, Kaadèsà-baanèa ùvwa nkwasà wa cilumbulwidi wa buloba, mwine musangu awu. Ki kwàkapetela Izàlèèlà nkwasà wendè wa cilumbulwidi aku. Bwà ne bàvwa ànu . . . Kùvwa ànu matùkù dikumi ne òmwè kuumukila ku mukùnà kwàkapetelabo mèyi matùma too ne mwàkafikàbo ku cilumbulwidi, "lwendu lwà matùkù dikùmi ne òmwè ku mpengà kwà mbù," mùdi Bible mwambè. Lwendu lwà matùkù dikùmi ne òmwè, ne bàakafika ku Kaadèsà ne ki bóbò kulumbulwishiiwbakù. Paanyimà pàà Nzambì mufwànyine kuya naabò kuntwaku, munda mwà matùkù matwè ku ànaayi, bààkaalukila too ne mu cipèèlà mwàmwa ne bààkalalakanamù; ne kupeta mèyi matùma awu—awu ne bintu byà bwena abi, ne kwalukilabo, kàdi mùshindù mene, ne cyàkenzeka's. Pashiishe kufikabo mwaba ewu . . . Nènku matùkù dikumi ne òmwè kuumukila apu, kufikabo ku cilumbulwidi cyàbò cyà ku Kaadèsà-baanèa aci.

318 Cyàkenzeka ncinyi? Wàkangata muntu umwe mu cifuku ne cifuku cyònsò ne kwamba ne: “Ndàayi kuntwaku nukatentèkèlè ditùnga adi, ne numòne ne mbuloba bwà mùshindù kaayi abu.” Èè, bwònsò kuyabò e kutàngilabò.

319 Bàbidì bàabò kubwelabò ne kwangata cisùmbù cinène menemene cyà tumuma twà mvinyò. Kaa, cisùmbù cinène menemene, s’byàkakèngela bantu bàbidì bwà kucyàmbulabò.

320 Mpindyewu, cyàkenzabò ncinyi pààkaalukilàbo ne kumònabo ne civwa mbuloba bwà mùshindù kaayi? Bàakamòna beena—beena—beena Amòlà ne—ne—bawkwàbò bashiilèshiiilàngàne abu muntwamu, ki kwambabò ne: “Mòna’s, bóbò’s mbantu bàà mfyondo!” (Aci’s civwa, mu bushùwà bwà bwalu, bàna bàà Kaayinà bàvwà ndekeelu wa byònsò bajuuke muntwamu mu—mu ditùnga adi abu.) Yèyè ne: “Bòbò—bòbò—bòbò mbantu bàà mfyondo!” Ki yèyè ne: “Katwèna—katwèna—katwèna ne mùshindù wà—wà kubùkwàta to. Àbo—àbo—àbo—àbo malaba mmeela ònsò mu mpangu, ne bimanu binène byà menemene. Nènku, mòna’s, twètù’s tudi tumweka ànu bu tupasu, ku luseke lwàbò.”

321 Cìvwàbo benze ncinyi? Mòna’s, kakùyì mpatà to bàvwà—bàvwà bamòne buloba abu. Bàvwà balabùle bimuma byàbò. Nwamònu’s, Kaalèbà ne Yoshùwà bàakaya e kwangata—kwangata cileeeji ne kwalukilabò naaci, bàvwà bacyambule pa makaaya. Bàvwà bàlabule mamuma! Ncyà bushùwà. Kacya bóbò kabàvwakù bayè kuntwaku to, kàdi Kaalèbà ne Yoshùwà bàakaya dyàmwàmwa, bààkaalukila ne cileeeji. Kaalèbà ne Yoshùwà kwambabò ne: “Twètù tudi ne bukolè bwà kubwàngata!” Nwamònu anyi? Bwà cinyi? Bwalu Kaalèbà ne Yoshùwà bàvwà batàngile ku Dìyì.

322 Nzambì ùvwa mwambè ne: “Buloba abu mbwènù. Bwònsò mbùle ne beena Amòlà ne beena Hivi ne mishindù yònsò yà bakwa ne beena muntwamu, kàdi” mwàkambaye “s’mbwènù. Ne mwaba wònsò wùdi dikàsà dyèbè didyata, Mémè nènkupèeshèwu.” Ncyà bushùwà. “Tùngunukà ànu ne kwenda, wamònu’s, mbwèbè wèwè.”

323 Kàdi kwambabò ne: “Kaa, to! Katwèna bafwànyine kwenza ditabuluja bu nàнку to. Kaa! Kaa, kaa, mòna’s, udi mumanyè mùdi bwalu anyi? Mwèpiskòpò mutàmbidile awu, anyi mwèpiskipò, anyi bakùlù, anyi muntu kampànda mmutùùluke kàdi kututwà misèba kutwèla pambèlu.” Huh! Tùngunuka, ncyà bushùwà, netùbwàngatè.

324 Mpindyewu, ki pashìishe bàbidì aba kwalukilabò kuntwaku ne kwambabò ne: “Twètù tudi batàmbe ne bukolè bwà kubwàngata, bwalu Nzambì ngudi mwambe nàнку! Tuyayyi tükabwàngatè!”

325 Kàdi, nwamònu’s, beena kwitabuuja bàà ku mikàlu aba, bàdi bàbànda ntàntà mukùmbàne bwà—bwà kuBulabula. “Aci’s

cìdi cyumvwika cîmpè's, èyowà. Kàdi, kaa, katwèna mwà kucyenzakù to.”

³²⁶ Mpindyewu, aci ncinyi? Ke mwena kwitabuujà nyèyè ewu leelù ewu. Mpindyewu, tàngilàayi mulùmyànà udi apa ewu. Nzambì mmumubiikile. Uh-huh. Èyo, mpindyewu yèyè mmusungidiibwe. Mamwëndè ùtu usukula bilàmbà pa dibaya dyàdya, ne mumutume kule ku cilongelu citùmbùke kampànda bwà kulongaye mwà yèyè kuyiisha. Èè, ùdi ùpàtuka muntwamu, ùcìdi ànu wèla meeji ne ùdi . . . musangu wònsò wùdiye ùmòna bakàji bàdi bavwàle mvwàdilu wa masandi abu, aci's cidi . . . cimunsulula; dîbà dyònsò didiye—didiye ukoka mupùùyà wà mfwanka, mbikolè bwà bwà kulekelaye kumunwa. Yèyè's mmumanyè ne mbibì. Ki mmuswè kwenza aci to. Pa nàнку kwambaye ne: “Mukalenge, njidileku, umùsheku bintu abi mu mèmè emu.”

³²⁷ Nzambì kwamba ne: “Èyo, Nèngènzè nàнку bwèbè wèwè, mwanàanyi wa balùme, mbyùmùshè byònsò mu wèwè.”

³²⁸ Dilòlò kampànda ùbwela wènda ùtètuka mu kaèkèleeziyà kakesè mwaba kampànda, ne ùmvwa bwà dibàtiiza dyà Nyumà Mwîmpè. Yèyè ne: “Àmbà tûng!”

³²⁹ Yèyè ùkaadi mwela cidya cyà kumpàla, dibingishiibwa; mwela cidya ciibìdi, dijidiibwa; mpindyewu ùkaadi mudilongòlòle bwà Dibàtiiza. Nwamònu's: umwe, ibìdi, isàtù. Ùkaadi mudilongòlòle bwà Dibàtiiza. Pàdiye ùfika mwaba awu, ùdi ùbala mu Bible, wamba ne: “Ki cyòci aci menemene cyàkenzàbo's. Èyowà's, aci's mmwòmò menemene. Dibàtiiza mu Dîna dyà Yesù adi, ki cyàkenzàbo. Ncyà bushùwà. Wàkamba bwà 'kucibalulula,' ndi mucibale mu Bible mujimà ne mmwambe bulelèlè menemene pa Bwalu abu.”

“Mwèpiskòpò, cyùdi wèwè. . .”

“Nànsha cîmwè cyà ku lukutukutu alu!”

“Kaa, ngùmù.”

³³⁰ “Bààkapeta Nyumà Mwîmpè, bààkaakula mu myakulu, bààkenza bintu ebi, bààkondopa babèèdi. Kaa, èyowà's, aci's mmwòmò menemene.” Ùvwa mutàngile dyàmwàmwa, nudi numòna's, ùvwa mutàngidile ku mikàlu.

³³¹ “Kaa, bu mèmè mwà kulongesha Cyòci aci mu èkèleeziyà wanyì. . . Kaa! Mèmè's ndi Presbytérien, Méthodiste, Bapti- . . . nudi bamanyè's. Kaa, mwèpiskòpò's neàngiipate. Èè, katwèna ànu mwà kwenza aci to. Katwèna mwà kwenza disangisha dyà mùshindù awu mu èkèleeziyà wetù to, muntu ne muntu wa kùdìbo's mmufwànyìne kujuuka ne kupàtuka.”

³³² “Ewu wàkakenkeshiibwa musangu kampànda, ne mulabule Mapà à mu dyulu, bu yèyè mwà kudishinda kuya kule ne lwendu alu mbimukolèle, bwà kwalùkilaye ne kudyàlujulula cyàkàbìdi ku kanyinganyinga bwalu mmwenzele Nzambì mpèkaatù. . .”

Mpèkaatù ncinyi—ncinyi? Bupidyà! Yêyè mmwenzele Nzambi mpèkaatù. Kàdi cidiye mwenze ncinyi? Mmuvwije Cipungidi, kuvwaye musantwìshìibwe aku, cyenze bu ne Cìvwa ncintu cyà patupù, ne mudyombole midimu yà ngàsà yidì mimufikishe too ne kuulu aku ayi. Kakwèna kùshààla kàbìdì mulàmbù bwèndè yêyè to, ànu dindila dyà dikwàcisha bwôwà dyà cilumbulwidi cyà kapyà ne cijì cyàbutulà mulwìshì. “Bwalu busombwedi m’Bwànyì,” mmùdì Mukalenge wàmba.

³³³ “Bwalu Dìyì dyà Nzambi nditàmbe kutwà, diikàle ne bukolè kupita mwelè wà mvità wà nseke yìbìdì, dikosa too ne ku ditapulula dyà mufùba, ne dijinguludi dyà meejì ne mapàngadika à mu meejì.” S’ki bwalu mbwòbù abu’s, s’ki bwalu mbwòbù abu. Paùdì umòna Bukènkè, endèlaMù! Enda! Kwèna mumanyè kùyaaya to, kàdi tùngunukà ànu ne kwenda kuya. Wenda mutàngile ku Kàlvaryò, kacya wàtàngila ne ntèmà mikolè ku Kàlvaryò. Mumòngane ne kwenda! Mumòngane ne kwenda!

³³⁴ Éyì Nzambi, swàku bwà dîngà ditùkù... Èkèleeziyà, udi cifwànyikijilu cyà Henòkà awu. Bidimu nkàmà yìtaanu yêyè wàkenda kumpàlà kwà Nzambi. Mumòngane ne kwenda! Wèndela mu Bukènkè, ne bujaadiki bwà ne “Cyònsò cidi Nzambi mwambe, yêyè mmucyènzè.” KààkaMubìpila to. Cyàkamba Mukalenge bwà kwenzayè, Henòkà wàkacyenza. Mpindyewu, yêyè ùvwa cifwànyikijilu, nwavùlukaayi. Mushèètè wa cipungidi ncifwànyikijilu cyà beena Yudà, binunu lukàmà ne makumi ànaayi ne binaayi bàdì bangàcìibwe abu, bàdì Noà ne musùmbà wèndè abu; kàdi Henòkà wàkaalukila Kumbèlu ànu kakesè ndambu kumpàlà kwà mvùla wa Noà awu. Aci’s nudi bamanyè. Pa nànu Henòkà wàkatùngunuka ànu ne kwenda mu Bukènkè. Ki dîngà ditùkù kudyùmwayè makàsà èndè àmbuka pa buloba, kutùngunukaye ànu ne kwenda, ki kwendaye too kubwela mu Butùmbi kàyì mene mufwè nànsha. Ncyà bushùwà. Nzambi kuumushaye bwalu ùvwa wèndela mu Bukènkè, mwikàle ne bujaadiki bwà ne “ùvwa wèndela mu Bukènkè bwà Nzambi.” Mutùngunuke ne kwenda kuya, wènda wènda.

³³⁵ Tùlwatàayi bisàbaatà byètù byà lwendu, Èkèleeziyà:

Tùngunukà ne kwenda mu Bukènkè, Bukènkè
bulenga be,
Bùlwa mwaba wùdì mamata à lumuma à luse
àbàlakana;
Kènkèshàku mu nyùngulukilu wetù mwònsò
muunya ne butùkù,
Yesù, Bukènkè bwà bàà pa buloba.

Tùwìmbàayi mpindyewu:

Netwèndelè mu Bukènkè, Bukènkè bulenga be,
Kaa, bùlwa mwaba wùdì mamata à lumuma à
luse àbàlakana;

Kenkèshàku mu nyùngulukilu wetù mwònsò
muunyà ne butùkù,
Yesù, Bukènkè bwà bàà pa buloba.

Nwènù bònsò bansantu bàà Bukènkè
kobolàayi patòòke ne:

Yesù, Bukènkè bwà bàà pa buloba;
Dìbà adi ngonga yà mu Dyulu neyidilè,
Yesù, Bukènkè bwà bàà pa buloba.

Netwèndelè mu Bukènkè, Bukènkè bulenga
bwà dikèma's,

Kaa, bùlwa mwaba wùdi mamata à lumuma à
luse àbàlakana;

Kenkèshàku mu nyùngulukilu wetù mwònsò
muunyà ne butùkù,

Kaa Yesù, Bukènkè bwà bàà pa buloba.

³³⁶ Twinyikaayi mitù yètù, bwà katanci kakesè cyanààna mpindyewu. Ndi ndikonka ní kùdikù bàmwè mwab'ewu bàdi baswè kwenza dilabula dyà kwikala bùjùibwe ne Nyumà Mwimpè, ambà ne: "Wamvùlukakù, Mwanèètù Branham. Wamvùlukakù, èkèleeziyà. Ndi muswè kwendela mu Bukènkè. Ndi muswè bupolè abu, kakùyì muji wà bululu mu mèmè to, ndi muswè kwikala ànu musadidi wa Nzambi." Ela cyanza cyèbè muulu, wamba ne: "Wamvùlukaku, Éyì Mukalenge." Èyo, byanza makumi àbìdi anyì bipite apu, mbyela muulu.

³³⁷ Mpindyewu lamàayi ànu mitù yènù miinyika patùdi twimba bitùùlùbitùùlù cyàpàmwe apa:

Kaa, Yesù, Bukènkè bwà bàà pa buloba.

Netwèndelè mu Bukènkè ebu, m'Bukènkè
bulenga bwà dikèma,

Bùdi bùlwa mwaba wùdi mamata à lumuma à
luse àbàlakana;

Kenkèshàku mu nyùngulukilu wetù mwònsò
muunyà ne butùkù,

Yesù, Bukènkè bwà bàà pa buloba.

Lwâyi, nwènù bansantu bònsò bàà Bukènkè,
kobolàayi ne:

Kaa, Yesù, Yèyè ùdi Bukènkè bwà bàà pa
buloba;

Dìbà adi ngonga yà mu Dyulu neyidilè,

Kaa, Yesù, Yèyè ùdi Bukènkè bwà bàà pa
buloba.

Kaa, netwèndelè mu Bukènkè ebu, m'Bukènkè
bulenga bwà dikèma,

Bùdi bùlwa mwaba wùdi mamata à lumuma à
luse àbàlakana;

Kenkèshàku mu nyùngulukilu wetù mwònsò
muunyà ne butùkù,

Éyì Yesù, Bukênkè bwà bàà pa buloba.

³³⁸ Mukalenge Yesù, pàcidìbo bimbila musambu ewu mu matama apa, bàjinga kwendela mu Bukênkè bwà Èvànjeeliyò, angàtaku myoyi yà mushinga mukolè ayi, Mukalenge. Mbèèbè Wèwè, ùbàkezule, ùmushè bubì bwònsò, bupidyà bwònsò, swàku bwà Yesù Bukênkè bwà bàà pa buloba bubwele. Mìshwalà mmyadija mwab'ewu, Mukalenge, bwà babèèdi ne bàdi ne ntàtu. Lwàku kùdìbo, Mukalenge Yesù, ne bõndòpèku bwà bààmòna mwà kwendela mu Bukênkè. Enzaku nàнку, Mukalenge.

³³⁹ Tudi tuKusàkidila bwà dileesònà dyètù, bwà Bwikadi bwà Nyumà Mwìmpè, bukaadi neetù kaaba aka ne butùlame, mèbà ne mèbà, basòmbe mwab'ewu. Bantu basòmbe mu cibambalu cyà luuya lukolè eci, bindìle. Mbatèkèmène ne bindile ne bàdikonka, Mukalenge. Bwalu bõbò mbafike ku dyumvwa, pàdìbo bumvwa Dìyì dibadiibwa ne, tukaadi ku cikondo cyà nshìikidilu. Kakùcyena cintu nànsha cìmwè cìdi cìshààle to, ànu cisànkasanka cyà pa buloba aci. Nènku dìmwè dyà ku matùkù aa byà ditentulangana nebìjikè.

³⁴⁰ Nènku ndi ndòmba, Nzambi, bwà Ûsungilè muntu yònsò udi mu Bwikadi bwà Nzambi awu, ùmusungilèku ku Nyumà Webè. Nènku swàku bwà Nyumà Mwìmpè àlwe pa yònsò wa kùdìbo ne ùjè myoyi yàbò ne bwìmpè ne ditalala, bwà bõbò kukwàma mamuma à Nyumà, àdi miikale, mwoyi mule, kalolo, ditalala, lutùùlù, bupolè, diitabuuja, mu Nyumà Mwìmpè. Enzaku nàнку, Mukalenge. NènKulàmbulèbu mpindyewu bwà mudimu Webè, mu Dìnà dyà Yesù Kilistò, Mwan'Èbè. Amen.

Netwèndelè mu Bukênkè. . .

Twèlàayi byanza muulu patùdi twimba apa.

. . . Bukênkè bulenga be,
Bùlwa mwaba wùdi mamata à lumuma à luse
àbàlakana;
Kenkèshàku mu nyùngulukilu wetù mwònsò
muunya ne butùkù,
Kaa, Yesù, Bukênkè bwà bàà pa buloba.

Ndi muMunange, ndi muMunange
Bwalu Yèyè wàkannanga kumpàla
Ne wàkampetela lupàndu
Pa mucì wà Kàlvaryò.

³⁴¹ Kaa, Yèyè kí mmulenga wa dikèma anyi? Netwènzè mudimu wa dibàtiiza bwà tusunsa tutwè ku dikùmi mpindyewu, dikùmi ne tùtaanu, anyi cinyi. Mwaba awu. . . Ngeela meeji ne kùdi inàbànzà mutekète kaaba aka wa kubàtiiza. Ncyà bushùwà anyi? [Mwanèètù Neville ùdi wàmba ne: “Bàdiku mulongolongo.”—Muf.] Èyo, mbanganyi bàdi ne cyà kubatiijiibwa mu dindà emu bàdi kabayi mwà kwalukila dilòlò edi bwà mudimu wà dibatiiza wa dilòlò edi? Umwe, bàbidi,

bàsàtù, bàsàtù bàdì kabàyi mwà kulwa mu mapingaja emu anyi kumpàla kwà disangisha dyà dilòòlò bwà kubatijiibwabò mu Dìnà dyà Yesù Kilstò. Nzambi ànùbènèshè, nwènù bânà. Ndi ne disànkà dyà mùdì Nzambi mutèèke kumpàla kwènù Ciibi cyunzulula. Nènku nukàadi badilongolole bwà kubwelamù mpindyewu, nudi nubwela mu lukità, bwà ne bintu byònsò byà kale abi bikaadi bifwè ne bijikiibwe. Mpindyewu, nwavùlukaayi ne, dibatiiza dyènù didi ànu dileeja dyà patòòke dyà ne cintu kampànda ncyenzèke lwà *emu*.

Ne pashiishe netwèndelè mu Bukènkè ebu,
(Munkaci mwà kudilongolola anyi?) Bukènkè
bulenga be, (. . . ? . . .)

Kaa, kenkèshàku mu nyùngulukilu wetù
mwònsò muunya ne butùku,

Kaa, Yesù, Bukènkè bwà bàà pa buloba.

³⁴² Kaa, bwobùmwe bunène ebu! Kanwenaayikù nudyùmwa bîmpè anyi? Kaa, ndi ànu mundyumvwe bîmpè byà kacya. Mbyenze bu cintu kampànda címvwàmu naaci, òmwè dyà ku manyukà à cyena kale à kunyanuna naawù, kàdi wèwè ànu mudítwe mu kunyanuna ne nsabanga wa bilàmbà's.

³⁴³ Mwanèètù wa balùme awu mmwambe ne pàmwàpa nwènù bwònsò bàdi baswè bwà kubatijiibwa mu dindà emu, dilongòlolaayi. Nkooci ne bikwàbò nebiikale bibolè bolebole dilòòlò edi, kàdi bìdi ànu bîmpè panwìkalà baswè kwenza nànkù's. Kàdi panwìkala badilongolole bwà kubatijiibwa mu dindà emu, mbîmpè's.

³⁴⁴ Ngeela meeji ne nebiikengele bwà twètù kutentemuna eci, kí mmwòmò anyi, Mwanèètù Neville? Èyo, mukalenge. Mpindyewu, mbanganyi bàdi baswè kushààla bwà kumòna dibàtiiza? Anji angàtaayi ànu tusunsa tukesè cyanàànà, ekèlekèle, pàmwàpa kanùtukù banjì kumòna nànsha òmwè dyènzeka to. Pawikala kùyì mwà kushààla to, èè, nànkù ikala mutwishiiibwe ne neùpinganè dilòòlò edi. Kàdi ndi njinga bwà nùshaalèku, ndambù wa tusunsa bwà kubandila mudimu wà dibàtiiza. Netùtentemune eci nènku kùdi lumwènu lunène lwà paanyimà apa lùdi lùleejà muntu yònsò udi ubwelamù mu màyi awu. Nebinulenge, ndi mutwishiiibwe. Tudi tujiikiibwa ne Mukalenge mu dibàtiiza. Amen. MwàkafwàYe, tudi bajiikiibwe mu lufù Lwèndè; babiishiiibwe ku dibìikà Dyèndè dyà ku lufù, bwà kwendela mu bupyabùpyà bwà mwoyi. Mukalenge ànùbènèshè.

³⁴⁵ Mbanganyi bàdi bamanyè cidì dileesònà dyà dilòòlò edi? Laòdikiyà, dyà ndekeelu, ne katòngòbèlè kàà Bikondo byà Èkèleeziyà.

³⁴⁶ Èyo, netwènzè mudimu wà dibàtiiza. Teddy, bu wèwè mwà kuswà . . .

³⁴⁷ Udi muswè kwikala mubàti-. . . ? [Katùpà kàà mukàbà wà mēyi munda mutupù—Muf.] . . ukàadi mumane kubàtijiibwa.

Kùdi bàmwè bàà kùdìbo bàdì ne cyà kuumuka batàngile ku Chicago mpindyewu mene, nwamònu's.

Tùsambilàayi:

³⁴⁸ Mukalenge Yesù, mbasòmbe ne batèèleje masangisha ku ntwadijilu ne ku ndekeelu. Tudi tubàlàmbula Kùdì mpindyewu, Mukalenge, bu mùyayabo ku Chicago emu. Ndà naabo, Mukalenge, ne swàku bwà muntu ne muntu àngatè Bukênkè bulenga ebu ne àBùtangàlàjè, Mukalenge, mu cimenga cijimà cyà Chicago, kwònsò kwayàbo aku. Ikàlàku naabo. Too ne patwàsangilà, swàku bwà nyumà yàbò yikalèku myéle lwongò mu Wèwè. Mu Dìna dyà Yesù. Amen.

³⁴⁹ [Mwanèètù Neville ùdi wàmba cipròfetà ne: “Èyowà, kunùdì nwènù, cisàmbà cyànyì, mu dindà emu cyàkàbìdì, èyo Ndi nkwambila wèwè musadidi Wanyì ne: Ndi mukwitabuuje mu kufila kwà Dìyì Dyànyì. Nènkùlonde ne nèngàakule neebè pàà nkààyebe, èyo, Nènkuleeje njila wa wèwè kulonda. Èyowà, Nèngiikalè neebè ne nènkuwènèshè.]

³⁵⁰ [“Èyowà, cisàmbà cyànyì, ndi nkwambila mu dindà emu ne: Ndi Nzambì wa Bukolè bwònsò. Ndi ngenza mudimu ne dibungu edi, mu dindà emu, bwà kulwilaku kùdì wèwè. Ndi nkwambila ne kùkomikù nyimà ku Nyumà Wanyì to, kùlekedikù Dìyì didì dyàkula neebè adi to. Ndi neebè bu muwikalà naanyì. Lekela njila yèbè ne lekela ngeelelu webè wa meeji ne ngiitàbùùjè Mèmè bwalu Ndi neebè. Bu wèwè mwà kulwa kùNdi ne kuNdonda mu dibàtiiza, Nènkubènèshè ne nkulaminyine, Nènkubwejè mu kaabujimà kàà dikumbana dyà maalu ónsò. Èyowà, ngàmányì kwamba, Ncyàkukumbaja anyì? Èyowà, MÙDÌ MUKALENGÈ WÀMBA.”—Muf.]

Twèlàayi ànu byanza muulu cyanàànà twámbe ne: “Twasàkidila, Mukalenge Yesù, Dìna Dyèbè ditumbè.” Twasàkidila, Mukalenge.

³⁵¹ Tudi tujungulula aci, Mukalenge, ne Wèwè. . . dingingà ditùkù Nyumà wàkatùulukila muntu kampànda, mu Bible, ne kwamba ànu bwalu busokome bwònsò bwà Nzambì, cìvwà ne cyà kwenzeka. Taatù, tudi bamanyè ne Wèwè ucìdi ànu Nzambì umwèumwè awu. Nènkù's ki Wèwè udi mutùulùkile pa mpaasàta mukèsè, mudipwekeshe ewu, Mukalenge, mu dindà emu, uvwa kale wàwa mu beena Nikàlàwù, kàdì Wèwè kumunyùkusha, kumònyè Bukênkè ne kupàtukayè. Nènkù mwoyi wèndè ngwewù muunzulula mu mùshindù wà ne Wèwè wàkule nendè, mu mùshindù wà kàyì nànsha mumanyè ciine ciikalàye mwà kwamba aci to, ne ùjuuka kuulu ne ùlekela Nyumà Mwìmpè ùkwàcila mudimu munda mwèndè mu Dìyì dyà cipròfetà kutùdì. Twasàkidila, Taatù. Nènkù nèngiikale—nèngiikale mwà kuKwindila bwà njila yà kulonda. Amen.

³⁵² [Mwanèètù wa bakàjì kampànda ùdi wàkula mu myakulu. Katùpà kàà mukàbà wà mèyì munda mutupù. Mwanèètù

wa bakàjì mukwàbò ùdi wàndamuna—Muf.] Amen. Nùmvù aci's, kí mmwómò anyi? Nudi numòna civwa aci anyi? Tàngilàayi cyonà cyà díyì dyà mukàjì ùmwèpelè awu didì dyàkula adi, ne tàngilàayi dyandamuna didì dilonde adi ne cyonà ànu cimwècimwè aci. Nwamònu anyi? Kùdi bakàjì bàbìdì bashiilàngàne, ndi ne mpatà yà ne bôbò abu bàdi mene bamanyàngàne ewu ne mukwèndè. Kabèèna—kabèèna bamanyàngàne ewu ne ewu to. Ki Nyumà Mwîmpè awu, tàngilàayi dilondangana dyà cyonà cyà díyì mùshindù awu. Kanwènaayiku nufika ku dyumvwa ne awu n'Kilistò munkaci mwà bantu bàdi apa aba anyi? Ncyà bushùwà.

³⁵³ Udi ne cintu kampànda cyùdì muswè kubala, Mwanèètù Pat? Balààku, wamònu's. [Mwanèètù Pat ùdi wàmba ne: “22:16 wa Bwàkabuulwibwà ndi mbala mu Dîna dyà Mukalenge Yesù: Mèmè Yesù ngudi mutùme mwanjèlò wanyi bwà kunùjaadikila maalu aa mu maèkèleeziyà.”—Muf.] Amen.

³⁵⁴ Mpindyewu, aci's ndilombola dyà mu nyumà, dyà kùdi Nzambi. Nwamònu's, Nyumà Mwîmpè mwikàle ùnyungakana mu beena kwitabuuja, ùpatuka pambèlu pàapa, wàkula. Kaa, Yèyè kí mmulenga wa dikèma anyi? Pa kwela meeji, balunda bàanyi, ncintu cimwècimwè aci cidì Bible mwambe. Nènku's ncyôci eci apa lelù ewu, kabyàkukèngela bwà twètù kuditàacisha kàbìdì bwàci to. Kaa, lwàyi nùMwakidilè, nwènù cisàmbà cyànyi cyà mushinga mukolè. Lwàyi, nùMwakidilè.

³⁵⁵ Teddy, patùcìdì tudìlongolola bwà dibàtiiza apa, (nènku ndi ndomba bwà Nzambi àlongolole myoyi yènù) *Kwandombola Ye Mèmè Nèndondè*.

³⁵⁶ Ndiku mwà kunwàmbulwisha mwab'ewu anyi bàna bèètù wanyi? Èè, bikèngela—bikèngela nukange bikòlokolo abi. Uhum. [Katùpà kàà mukàbà wà mèyì munda mutupù—Muf.]

³⁵⁷ Ndi nkutumina díyì ku Nzambi udi ne Mwoyi ne ku dikankamika dyà Díyì Dyèndè bwà wèwè kulwa kubàtijiibwa mu Dîna dyà Yesù Kilistò. Vùlukàayi ne ndi ngenza nàнку bwalu Bible ùdi ùtwenzeja bwà kwenza nàнку. Ne—ne Pòlò ngwàkamba bwà kucyènzà; kàdi mwanjèlò yèyè mulongèshe cingà cintu, èdiibwe mulawu. Nènku ndi—ndi muswè kwamba eci ànu ku ndekeelu kwà njila wanyi mwàkambàye: Ncyèna mudikande bwà kunwambila mubelu wònsò mujimà wà Nzambi bu mùndì pàanyi muwùmanye, ànu menemene to. Mashì à muntu nànsha umwe kaènakù pambidi pèètù to.

³⁵⁸ Kaa, kanwènaayikù baMunangè anyi? Kaa, mùshindù mwinè wùndì muMunangè's wè. Èyo, tùjuukilàayi kuulu patùdì twimba musambu wètù wa ditangalajangana naawù awu apa. Èyo, too ne ku cikondo aci netwikale:

Angata Dîna dyà Yesu wèndè naadi,
Wèwè mwànà wa kanyinganyinga ne dikenga.
Nedikupè disànkà ne busàmbi,

Nda naaDi kwônsò kûyaayà.

Dîna dyà mushinga, (Dîna dyà mushinga!) Éyì
dyà bupolè be! (Éyì dyà bupolè be!)

Ditèkemena dyà buloba ne disànkà dyà Dyulu.

Dîna dyà mushinga, (Dîna dyà mushinga!), Éyì
dyà bupolè be! (Éyì dyà bupolè be!)

Ditèkemena dyà buloba ne disànkà dyà . . .


Mpindyewu patùdi twinyika mitù yètù apa twimbààyi ne:

Twinamina Dîna dyà Yesù,

Tupòna mikookwela ku makàsà Èndè,

Mfùmù wa bamfùmù mu Dyulu netùMwase

cifulu cyà butùmbi,

Pààjika lwendu lwètù. 

60-1211M Virgò Dikumi, Ne Beena Yuda
Binunu Lukàmà Ne Makumi Anaayi ne Binaayi
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org